

# WANITOK

NIUSPEPA BILONG OL PAPUA NIUGINI STREET

52 pes

Namba 881

Wik i stat long Fonde 23 Me, 1991.

40 toea

## Ol memba apim pe

PALAMEN i pasim tok orait pinis long apim pe bilong ol memba long 5 pesen. Dispela tok orait i bin kamap long las bung bilong Palamen long Trinde 22 Me, 1991.

Dispela nupela pe bai i stat long Julai 1, 1991.

Na tu aninit long dispela tok orait, ol memba bai i kisim moa alowens mani long raun, moa lip mani, moa mani bilong baim telepon, ka, haus na duti trevel.

Nupela pe em Praim Minista bai i kisim long olgeta yia em K35,472.51. Na Deputi Praim Minista em K29,740.46, Sif Jastis em K42,560.62, Sif Ombusmen em K35,068.08, ol gavman minista em K26,006.21, na bilong ol memba nating long oposisen na gavman em K17,088.71

Entetenmen alowens mani bilong praim minista em K40,000. Na bilong ol minista em K6,000.

Na tu aninit long dispela tok orait, Praim Minista bai i mas yusim wampela ka i wankain olsem "Toyota Crown".

Nesanel Kot Sas bai i yusim ka i wankain oslem Ma da 929, na ol arapela minista bai i yusim ol ka i wankain olsem Ma da 323.

Praim Minista, Sif Jastis, na Oposisen Lida bai i kisim K600 alowens mani long olgeta wik. Ol minista na deputi spika bai i kisim K400 bilong baim haus.

Antap long dispela senis, olgeta wokman husat i kisim opis aninit long tok orait bilong mamalo bai i mas kisim 4-pela wik malolo long olgeta yia.



•Strongpela hapbek bilong Vipers, Stanley Haru i danis liklik wantaim bal taim Mosbi Vipers i lus 26-28 las wiken. Inap Haru i helpim tim winim Bombers - Ragbi Lig Nius.

•Dipatmen makim tripela hap graun bilong setelmen long Mosbi...pes 2

• Bikhet bilong ol kalabus...pes 3

• Maprik plis stesin bagarap...pes 5



• Kavieng gat nupela Katolik bisop...pes 6

• Gavman rausim setelmen long Lae...pes 7

RAU

• Wagambie ske-lim Vipers 1991 na las yia

• Intasiti Kap ripot bilong Goroka Lahanis na Mendi Muruks

NEWS

• Nius bilong Helt long Papua Niugini


### Nupela pe em bai i stat long Julai 1, 1991.

Praim Minista	K35,472.51
Deputi PM	K29,740.46
Sif Jastis	K42,560.62
Deputi Sif Jastis	K40,126.32
Ol Sas	K35,063.08
PAC Siaman	K35,063.08
Sif Ombusmen	K35,068.08
Palamen Kuskus	K29,037.50
Minista	K26,006.21
Memba Palamen	K17,088.71

### NAMBAWAN TRAKTA LONG PNG

Massey-Ferguson i gat planti kain kain trakta. I gat liklik MF 1020 i save mekim wok insait long ol gaden na fam. Na i gat planti arapela kain trakta tu i go inap long bikipela trakta tru em MF 390. Dispela MF 390 inap pulim ol kain kain samting o tanim graun insait long fam. Em i gat 83hp ensin.

YU LAIK SAVE MOA LONG OL DISPELA SAMTING BIKIM DISPELA... AUM MAN



PH 421215 - 422322 GRAHAM FLEMING  
TELEX NE 42432 - FAX 433661  
PO BOX 3182 LAE  
MOROBÉ PROVINCE

**ELA MOTORS**

EM 3832

MEMBA BILONG BUNGS PUBLIK PNG 1991/92



**DISPELA WIK LONG PALAMEN**

**Lens dipatmen makim tripela hap graun bilong ol stelmen long Mosbi**

DIPATMEN bilong Lens bai makim tripela hap graun long Mosbi siti bilong putim ol manmeri bilong setelmen long en.

Minista bilong Lens, Sir Hugo Berghuser i tokaut long tupela hap graun long Tokarara na wanpela long 9-Mile. Em i tok dispela tingting i stap l8 mun olgeta wantaim Dipatmen tasol Len Bot i no hariap long bihainim.

Minista i tok, "Mi mas yusim pawa bilong mi long kamap wantaim wanpela tingting hariap bikos yumi mas gat sampela graun bilong ol stelmen long Nesenel Kapitel Distrik."

Tasol hevi ol i painim nau em sampela man husat i sindaun nau long graun bilong Gavman long Boroko i no laik go long Moitaka o 9-

Mile. Sapos dispela hap graun i stap nating na i go bek long NCDIC, em bai mekim ol stadi na makim graun bilong setelmen.

Sir Hugo i wok long bekim ol askim bilong memba bilong Sinasina/Yoggamugl, John Numi. Numi i askim tu sapos minista i sapatim dispela nupela lo ol i kolim long Vagrancy Act. Dispela lo i tambuim ol manmeri long sindaun nating long graun bilong narapela man o gavman.

Tasol Sir Hugo i tok yumi no inap long kisim ol dispela lain na tromoi ol nating long wanpela hap. Em i tok sampela bilong ol i stap long Mosbi moa long 30 krisman pinis. Na em i no inap larim graun i go long ol manmeri bilong Mosbi yet.

**Spak brus save lusim PNG isi tru**

OL plisman i holim pinis planti bikpela sip i bin laik hait na karim spak brus i go long ol narapela kantri.

Ol plisman wantaim ol wokman bilong Kastoms i bin holim wanpela bikpela sip i karim spak brus long Papua Niugini i go long Honolulu long 1988. Ol plisman i painimaut long dispela taim olsem sip ya i bin karim 11 tan spak brus i kam long Kimbe insait long Wes Nu Briten provins.

Narapela sip, MV Lady "V", i wok long karim l3 tan spak brus i go long Australia long 1989 taim ol plisman i kisim ripot. Dispela sip i lusim Sri Lanka na i laik go long Wes Irian. Na namel long ron bilong en, sip i bin malolo inap long tupela wik long Madang.

Long 1981, ol plisman i painimaut long wanpela sip i karim marasin nogut bilong kantri Lebanon i kam

long Papua Niugini. Dispela marasin i strong moa long spak brus na ol i kolim Haship. Opis bilong Plis Dipatmen i lukautim wok bilong spak brus na ol marasin nogut i tokaut olsem ol i bin holim tripela man long dispela taim.

Bos bilong Kriminal Investigesen (CID), Fred Sheekiot i tok i gat ol kain kain rot we ol man i save hait na karim spak brus i go long narapela kantri. Sampela ol waitman i go pas long dispela kain wok.

Sheekiot i tok Papua Niugini i gutpela ples bilong dispela kain wok long kamap. Bikos spak brus i ken gro gut tru na tu i gat planti rot bilong salim i go long ol narapela hap kantri.

Em i tok ol plisman long Papua Niugini i mas was gut long ol dispela kain wok, tasol hevi ol i gat nau em long mani, ol wokman na ol samting bilong yusim long wok.

**Lo bilong vot i no gat bilip i stap wankain yet**

TOKTOK bilong senisim lo bilong vot i no gat bilip i no kamap yet long wanem Govman i no gat inap namba long winim vot.

Palamen i vot gen long dispela senis long Tunde na 63 memba tasol i sapatim na 19 memba i egensim. Na pastaim long em i kamap lo, i mas gat 77 memba i vot long en.

Gavman i laikim dispela senis i kamap lo bihain long 1992 ileksen. Long dispela senis, vot i no gat bilip i mas kamap mun bihain long ileksen, na i no 6-pela mun olsem nau i stap long en.

Tasol Oposisen i no laikim dispela l8 mun senis. Bikos dispela em i longpela taim tumas. Tingting bilong Oposisen em i olsem i sapos wanpela gutpela praim minista i holim Gavman bihain long ileksen, em i orait. Tasol sapos wanpela praim minista nogut, em bai bagarapim kantri na bihain long l8 mun, bai i hat nau long stretim ol samting. Olsem na vot i mas kamap hariap.

Long las wik yet, Gavman i laik mekim dispela i kamap lo. Tasol Oposisen i no laik. Praim Minista Rabbie Namaliu i tokim ol niusman long las wik olsem ol i toktok pinis wantaim Oposisen na kamap long wanpela tingting.

Pastaim long vot i kamap long tunde moning, Oposisen lida, Paias Winti askim lida bilong Gov-

**Gavman sot long mani**

SEKETERI long Dipatmen bilong Fainens na Plening, Morea Vele i salim pinis toksave i go long olgeta gavman dipatmen long no ken westim nating mani bilong ol.

Minista bilong Fainens na Plening, Paul Pora i bekim olsem ol dipatmen i no gat mani bilong lukautim ol dipatmen na tu long mekim wok bilong

kantri. Lida bilong Oposisen, Paias Wingti i askim tu Minista bilong wanem em i katim mani i go long ol gavman dipatmen na i no laik stap long givim mani ol memba. Long wanem, olgeta samting i mas stat long antap na go daun.

Tasol Pora i tok mani bilong ol memba i stap long baset na i no gat hevi long en.

man bisnis, John Giheno long holim bek dispela bil bikos i gat sampela samting bilong stretim i stap yet.

Tasol Wingti i kirap nogut taim Giheno i go het na tokaut long en long palamen na vot i kamap. Mista Wingti i tok ol i no egensim dispela tingting. Tasol i gat planti samting ol i mas lukluk long en long dispela bil pastaim long ol i ken vot long en. Olsem na ol i bin vot egensim.

Wingti i tok ausait long palamen olsem wanpela samting ol i mas lukluk long en em ol memba i save kalap kalap long ol pait.

Em i skruim toktok olsem dispela em i wanpela bikpela samting i bringim planti hevi na i no vot i no gat bilip. Em i tok olgeta samting long ol bilong vot i no gat bilip i mas stap olsem. Long tripela taim olgeta vot i no gat bilip kamap long palamen na i no gat wanpela samting i rong long en.

Oposisen lida i tokaut tu olsem lo i lukautim ol politikal pati. Em i tok nupela lo i mas tok olsem, sapos wanpela memba i winim ileksen long wanpela pati, na bihain long palamen, em i laik joinim narapela pati. Dispela memba i mas go bek na resis long ileksen long nem bilong pati em i laik joinim.

**Ripot bilong ol stogan faktori i no tru**

I GAT sampela faktori insait long Papua Niugini i save wokim ol sotgan na katres bilong salim.

Memba bilong Oro, Benson Garui i askim minista bilong Plis, Mathias Ijape sapos em i save long dispela o no gat. Sapos em i tru minista i mas tokaut long palamen.

Garui i askim tu minista long painimaut bikos ol dispela faktori i no gat laisens long wok. Em i tok taim ol plis i painimaut husat man i mekim olsem, ol i mas kilim em. Bikos wanem samting em i mekim i no gutpela long kantri.

Minista Ijape i tok em i no save sapos i gat ol faktori bilong sotgan na katres long kantri.

**Kas bilong meri Yakoi**



**Geraldine i pasim olgeta tingting na laik brukim stret string bilong kulele tupela wik i go pinis long Westeco setelmen long Vanimo, Wes Sepik provins. Foto: Felix Ramram.**

YANGPELA Geraldine Samai bilong ples Yakoi long Aitape, Wes Sepik provins i sindaun na laik traim save bilong em long skrapim kulele. Geraldine, husat i gat 5-pela krismas tasol wantaim papa na mama i bin go raun lukim ol wantok long Westeco setelmen long Vanimo taim em i putim han long dispela kulele na mekimsave long paitim i stap.

Westeco setelmen i pulap long ol kain kain lain man na meri bilong Hagen, na Wabag long Hailans rijon, Maprik, Yangoru na Sepik wara long Is Sepik provins na ol pipel bilong Wes Sepik yet olsem long Malol, Sissano, Warupu na ol planti arapela ples klostu.

Papa bilong Geraldine i save wok long Nesenel Brodkasting Komisn (NBC) long Vanimo. Na ol i save stap antap long hap ol i kolim Tower, bikos ol bikpela tawa bilong PTC i stap long dispela hap na ples ya i kisim nem olsem.

**Ed pos na helt senta sot nau long ol marasin**

PLANTI pipel i wok long dai long Markham eria bilong Morobe provins, bikos i no gat marasin lbilong lukautim ol.

Memba bilong Markham, Steven Mambon i tok planti taim ol pipel i save go long ed pos o helt senta na kisim ol bekim olsem i no gat marasin.

Em i askim minista bilong Helt, Gerald Benona long wanem as tru na dispela i kamap. Minista i tok planti memba i bin komplem pinis long dispela.

Beona i tok wanpela as bilong dispela em i no gat mani bilong baim ol marasin. Na narapela as tu em ol provinsal helt opisa i no save salim oda hariap long kisim nupela marasin taim ol i lukim olsem saplai bilong ol i sot.



**LAE:** OL plisman i askim yet tripela man bihain long dai bilong soka pilai, Martin Gure long Luteran Siping kompaun long las wik Fraide.

Ripot i tok ol plisman i no sasim ol bikos ol i painim yet ol arapela wan wokabaut bilong ol. Tu ol plisman i painim yet wanpela man husat ol i bilip i bin kilim wanpela studen bilong Yuni-versiti Ov Teknoloji tupela wik i go pinis.

Ripot i tok dispela man Tolai i bin go long painimaut long wanpela pairap long haus slip bilong ol meri taim em i bungim dispela birua.

Long wankain taim tu ol pipel bilong Bukawa eria ausait long Lae i askim ol plisman long kalabusim ol man husat i kamapim birua pasin long hap bilong ol.

Moa long 200 man bilong 10-pela viles long Bukawa eria i bin kamap long namba tu Primia Mang Kemu long Mande moning na askim gavman na ol plisman long lukautim gut eria bilong ol.

Long las wik Fraide, ol i bin holim 5-pela raskol na paitim ol bihain long wanpela birua pasin i bin kamap long PMV bilong ol. Ripot i tok ol raskol ya i bin pretim ol pasindia long wanpela PMV bilong ol asples yet.

Ripot i tok provinsal plis komanda i amamas long ol plisman i mekim gut wok long kalabusim 70 man husat i bin ranawe long haus kalabus long dispela sotpela taim bilong operesen. Komanda i tok wanpela grup bilong ol plisman "Law Med Squad" i mekim gutpela wok long kalabusim ol dispela man. Na em i givim bikpela tok amamas i go long ol komyuniti insait long Goroka long helpim ol plisman long dispela taim.

**MOSBI:** Plis ripot i tok ol plisman bai sasim olgeta man husat i smok na salim spakbrus insait long kantri.

Dispela em toktok bilong plis Komisina Ila Geno. Mista Geno i mekim dispela toktok bikos wanpela ripot i tok lo bilong dispela kantri i no bilong ol biknem lain olsem ol minista na ol plisman.

Em i tok olgeta ol plisman tu bai kisim wankain sas sapos ol i mekim olsem. Ol plis opisa i no inap pret long sasim ol biknem man o wantok o meri bilong ol.

Em i tok wanpela kibung i bin kamap long Lae long toktok bilong spakbrus na olgeta samting i klia pinis long tingting bilong ol plisman. Nau ol bai wok stretlong daunim dispela hevi.

Nau yet plis Komisina Ila Geno i tok ol plisman bai statim kefiu long Oro provins. Operesen bai stat long 22 Me na bai i stap inap long tupela mun.

Taim bilong kefiu bai stat long 9 klok apinun na i go pinis long 5 klok moning. Na kefiu long Nesenel Kapital Distrik bai i goap long tupela moa mun. Tasol taim bilong kefiu bai bai wankain olsem bilong Oro provins, stat long 9 klok apinun na pinis long 5 klok moning.

Mista Geno i tok dipatmen bilong em bai kisim narapela K1 milien kina long statim dispela operesen. Na em i askim olgeta man husat i gat kefiu pas long senisim olgeta pas.

**MOSBI:** Plis ripot i tok ol raskol i bin brukim het bilong waanpela man long haus bilong em. Dispela pasin i kamap long mande Tunde, 21 Me 1991.

Ripot i tok ol wankain lain tasol i bin brukim planti haus pinis insait long taim bilong kefiu. Nau yet ol manmeri na pikinini insait long Hohola eria i stap wantaim belhevi bikos ol plisman i no holim wanpela bilong ol dispela man yet.

Long wankain taim ol i bin kamap long wanpela haus bilong Word Kampani na askim long mani na ol arapela samting. Ol plisman i kisim ripot pinis na ol i mekim sampela wok painim aut yet long holim ol dispela man.

# Bilong wanem na kalabusman i bikhet yet

OL MAN i pinis long kalabus na kam aut sait bai i mekim wankain pasin, bikos ol samting long kalabus i no gutpela long mekim em i kamap gutpela man o meri gen.

Minista bilong Koreksenal Sevis-es, Tenda Lau i tok dispela long wanem ol kalabus bilong Papua Niugini i stap yet olsem ol haus kalabus taim Australia i lukautim yet PNG.

Mista Lau i tok i no gat gutpela haus bilong ol kalabus long slip. Banis tu i karamapim ol haus kalabus i no gutpela na sampela longpela bilong ol inap olsem 3 mita tasol. Ol woksop bilong wok mekenik na kapenta bilong ol kalabus nau i pas pinis.

I no gat tu ol gutpela redio we ol woda i ken yusim long mekim wok bilong ol. Na tu haus bilong

ol woda i no inap na samting olsem 700 i save slip aut sait na kam wok.

Em i tok sapos yusim skelim ol kalabus bilong yumi wantaim ol narapela kantri, PNG i nogut olgeta. I no gat inap ol haus we ol woda i ken brukim ol kalabus i stap long grup. Olsem ol liklik manki long wanpela hap, ol meri long wanpela hap, ol kalabus i

mekim bikpela trabel na narapela hap. Nau olgeta i stap long wanpela hap tasol.

Namba bilong ol kalabus i stat long Epril 1991 i kam inap nau long olgeta hap bilong kantri i stap olsem:

Bikpela man kalabus 2,522  
Bikpela man wet kot 792  
Yangpela man kalabus 126  
Yanpela man wet kot 79

Bikpela man kalabus (bilong ol narapela kantri) 7

Bikpela meri kalabus 142

Bikpela meri wet kot 38

Yanpela meri kalabus 2

Namba bilong olgeta ol dispela kalabus em 3,708. Tasol Mista Lau i tok i gat 1,200 woda tasol. Olsem na em i laikim planti yanpela man na meri long kamap woda.

## Fores seketeri bai bungim ol Gogol Naru

I GAT bilip olsem Seketeri bilong Fores bai i bungim ol papa graun bilong Gogol Naru Timba eria long Madang, na stretim hevi bilong ol long tude (Fonde 23 Me, 1991).

Michael Komtagarea i tok ol papa graun i mas kisim asua tu. Bikos ol i no bihainim progrem em Fores Dipatmen i makim long toktok moa long Desemba las yia.

Em i tok ol papa graun i save olsem wok bilong lukluk i go insait gen long timba tok orait bai i kamap long namel bilong mun Me, 1991. Ol papa graun i save tu olsem ol i mas kisim askim bilong ol wantaim wanem kain developmen ol i laikim i kam long Fores Dipatmen, bipo i go long Nesenel Eksekutiv Kaunsil long kisim tok orait bipo long Me.

Komtagarea i tok long stat bilong mun Me tasol, Fores Dipatmen i bin kisim namba wan ripot tasol bilong wanem kain developmen ol papa graun i laikim aninit long askim bilong ol. Olsem na i nogat inap taim long Fores Dipatmen i skelim gut dispela ripot.

Komtagarea i askim tu long wanem posisen bilong Yalum Mosol. Mosol em mausman bilong ol papa graun.

Komtagarea i tok em i no save long wanem as na Mosol i stapim kampani long kisim timba klostu long ples bilong em, na bihain komplek long wok timba long arapela hap bilong Gogol naru Timba eria.

"I tru olsem Jant i gat pemit o tok orait pepa long kisim timba long dispela eria.



• Nupela buk i kam aut: Sir Paulius Matane i sainim buk em yet i raitim, na Joseph Tobung i kisim wanpela long ritim. Dispela em long taim dispela buk i kam aut long Tunde 21 Me, 1991 long Boroko Yunaitet Sios.

## 6-pela moa haiskul bai i kamap long kantri Sampela kampani nogut stap yet

DIPATMEN bilong Edukesen bai i wokim gen sikipela moa haiskul long kantri

namel long 1991 inap long 1995.

Minista bilong Edukesen, Utula Samana i

tok dispela ol hai skul bai kamap aninit long namba tu raun bilong haiskul sapot progrem

nau Dipatmen i wok long karimaut.

Dispela ol nupela haiskul em tupela long Salamaua long Morobe provins, wanpela Dreikir long Is Sepik provins, Aiome long Madang provins, Omaguga long Isten Hailans provins. Long wankain taim tu Dipatmen bai pinisim Kompiam haiskul na statim wanpela nupela long Enga. Na tu stretim Palmalmal hai skul long Is Nu Briten provins.

Tasol Mista Samana i tok bai i gat sampela hevi long wokim ol dispela haiskul bikos long planti as. Nesenel Gavman i save yusim K2.4 milien long lukautim ol studen i save slip na kaikai long skul. Dispela kain mani i no save isi long painim na i hat tru nau long dispela taim, taim kantri i stap long hevi.

SAMPELA ol kampani em nem bilong ol i kamap long Barnett Fores Enkwaieri long wokim ol paul pasin i go het yet long wok insait long kantri.

Fores Minista, Jack Genia i tokaut long dispela taim em i wok long bekim ol askim bilong memba bilong Gumine, John Numi long las wik.

Mista Genia i tok dispela i kamap long wanem planti ol dispela ol kampani i kisim sapot bilong ol papa bilong graun yet. Tasol em i tok sampela ol kampani nau i wok long traim long bihainim gut ol long bilong Fores dipatmen.

Mista Numi i askim tu sapos Minista i save olsem sampela kampani i senisim nem bilong ol bikos ol i no laik long baim takis.

Genia i tok em i no save tasol sapos memba i klia long sampela bai givim ol long

em na em bai askim dipatmen bilong em long mekimsave long ol.



Ol meri i kibung: Tumbuna singsing grup i bungim ol meri na sampela bikman husat i bin kamap long bung bilong NGI Rijinel Wimens woksop long Hoskins ples balus long las wik. Poto Amilouyse Tenoa.

**Calculators**

20% OFF Some Models

**ALU SIGNS** PTY LTD

PO BOX 7081, BOROKO PH: 25 4800  
STORE: NEAR BOROKO POLICE STATION

**FRI BAIBEL KOS**  
**YU KEN KISIM SKUL**  
**LONG SALIM PAS**

Salim nem na edres long: WORLD BIBLE SCHOOL, Dept. VD21, P.O. Box 9346, Austin, TX 78766 USA

VD22

**TOR**

TORO I KISIM NUPELA HAUS LONG HOS KEM LONG KILAKILA... NAU EM GO SELEBRET WAN-TAIM OL PORO...

EM SPAK NOGUT TRU NA TEK-OFF I GO LONG NUPELA HAUS BILONG EM...

(HIC!)... BAI MI GO TOKIM KOLE LONG STRETIM BET... NUPELA HAUS YA... YU SANE (HIC!)

EM ABRUS NA KAMAP LONG NARAPELA HAUS NA SINGAUTIM LEWA BILONG EM...

HEY, LEWA! MAI LEWA.. STRETIM BET MI LAIK SILIP INDAI LONG NUPELA HAUS!... HARIAP!

MAN BILONG HAUS I HARIM NA EM ASKIM MERI BILONG EM...

EM HUSATI SINGAUT LEWA LONG YU NA TOKIM YU LONG STRETIM BET, A?? HUSAT?

MI NO SAVE?

OLGETA MAN INSAIT LONG HAUS I MUMUT I KAM AUT...

HEY, YUSANAP! YU TOK WANEM LONG MERI?

POF!!

ZOOOM DISAPIA!

YU SAFA TRU, A?

MAN, TORO I LUKIM OLSEM EM RONG HAUS NA EM DISAPIA OLSEM PANTOM.. (GUST WHO WOKS)...

# WANTOK

NIUSPEPA BILONG OL PAPA NIUGINI STRET

## Hevi bilong PNG stap yet

STAT long namba wan de bilong mun Julai, bikipela senis bai kamap gen long pe, alauwens na arapela mani em ol memba bilong palamen na nesanel minista bai kisim. Sapos yumi lukluk gut tru, mak bilong mani em ol dispela lain i kisim i go antap moa yet.

Olgeta nius na ripot i kamap long olgeta hap i tokaut olsem nesanel gavman i sot long mani na i no inap long helpim stretim hevi bilong ol pipel.

Long Madang, bikipela hevi bilong graun na timba i stap yet. Ol papa bilong graun i wari bikos graun na bus bilong ol i bagarap.

Palamen i laik soim pipel bilong Papua Niugini long wanem samting tru na i wok long apim pe bilong ol memba na nesanel minista i go antap long olgeta yia. Dispela i soim pipel ples klia olsem ol memba i kam long palamen bilong toktok tasol long pe na mani bilong ol. Na i no long hevi bilong ol pipel.

Hamas bikipela toktok i bin kamap long dispela tripela wik taim palamen i bin bung. Olgeta taim planti toktok i wok long sut tasol long vot i no gat bilip, senisim ol lo na arapela samting olsem.

Liklik toktok tru i bin kamap long hevi bilong Bogenvil, wanem samting i kamap long ol timba projek na bisnis bilong Papua Niugini, hevi bilong bisnis na mani long kantri, toktok bilong lo na oda na hevi bilong ol yut.

Long las de bilong kibung, palamen i kirap na oraitim dispela lo bilong apim pe bilong ol memba.

## Ol soldia kisim wankain pe

OLGETA soldia husat i pinis long ami bilong long 20 yia bai kisim wankain pe long Difen Retriamen Benefit Fan (DRBF), maski long wanem bikipela namba ol i gat long ami.

Dispela em wanpela bikipela senis bai kamap long DRBF bilong ami em Difens Minista Benais Sabumei i tokaut long en long Tunde long Palamen. Dispela senis i kamap aninit long seksen 33 bilong DRBF Ekt.

Sampela senis bai kamap tu long rot em ol i bihainim long wokim aut pinis pe bilong ol soldia. We ol i wokim aut pe bai karamapim taim soldia i pinis na amas yia em i wok long en.

Olgeta soldia i mas pinisim 8-yia long ami bihain long ol i ken kisim wanpela pe ol i kolim "gratuity" pe. Dispela pe i karamapim ol taim ol soldia i wok long ami. Husat soldia i pinisim 8-pela hia long ami i kisim dispela pe maski em i gat namba o no gat taim em i stap long ami.

Pe em ol pikinini bilong ol soldia husat i dai taim em i stap long ami bai go antap long nupela pe em Bot bilong DRBF na Gavman bai orait long en. Na tu ol senis tu apim krisman bilong pikinini husat i ken kisim dispela mani long l6 i go anap long l8.

# Ami bilong PNG kisim helpim long ol narapela kantri

PAPUA NIUGINI Difens Fos (PNGDF) bai askim nau Amerika, Isrel, Melesia na Jemeni long helpim em long sampela samting bilong ami.

Minista bilong Difens, Benais Sabumei i tokaut long dispela taim em i toktok long

ripot bilong Foren Afeas na Difens Komiti em siaman, Arnold Marsipal i bringim long Palamen long las wik.

Mista Sabumei i tok PNG i gat gutpela Difens Progam wantaim Australia, tasol em i mas lukluk tu long kisim helpim long ol

narapela kantri.

"Yumi mas lukluk na painim wanem samting i gutpela bilong ami bilong yumi. Ol kain samting olsem ol gan, bom, masin gan na ol balus. Mi bai go long Jemeni klostu taim tasol long lukluk long difens program bilong ol," Mista Sabumei i

tok.

Em i tok yumi wok wok wantaim Australia long l6 yia olgeta nau, olsem na ol narapela kantri i no tingting long helpim yumi. Ol narapela kantri i lukim olsem Australia i gat bikipela wok long PNG long sait bilong sekyuriti.



• Ol pipel bilong Balimo lukim wanem samting kamap long sampela hap bilong PNG. Vidio i soim hevi Jant kampani i kamapim long bus bilong Madang.

## Planti manmeri i no laikim Provinsal Gavman

PLANTI manmeri bilong l2-pela provins em Komiti bilong Provinsal Gavman Reviu i raun long en i laikim provinsal gavman sistem i mas pinis.

Ol man i stap insait long dispela komiti em ol nesanel memba na siaman em memba bilong Finshafen, Henu Hesingut. Komiti i raun long ol provins long las yia na kisim tingting bilong ol manmeri.

Namba tu siaman na

memba bilong Wabag, Albert Kipalan i bin bringim kamap ripot bilong komiti long Palamen long las wik. Mista Kipalan i tok ol kain toktok em ol i kisim em ol pipel i laikim provinsal gavman sistem i mas pinis.

Tasol Mista Kipalan i tok dispela em i no tingting bilong Komiti. Em i tok komiti i no laik rausim provinsal gavman na yumi bai stat gen. Tingting bilong

komiti em long traime long mekim ol sampela senis long sistem nau i stap pinis.

Ol sampela senis em komiti i laik kamapim em:

- mekim sampela senis long Konstitusen na Oganik lo long Provinsal Gavman bai ol memba i stap long provinsal asembli em ol presiden bilong ol lokel gavman kaunsal o komyuniti gavman;

• nupela asembli nau bai makim siaman na dispela man bai kamap olsem wanpela fultaim politisen na i no narapela man moa. Ol

narapela i stap wantaim em long asembli i kisim ol pe tasol; na

• rausim ol wok olsem minista nau i stap long ol provins na bikipela wok bilong asembli tasol em long givim gutpela tingting long siman.

# WANTOK

NIUSPEPA BILONG OL PAPA NIUGINI STRET

P.O. Box 1982 BOROKO  
Telepon Namba: 25 2500  
Feks Namba: 25 2579

## PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00

## BIAZ BIABIA BAIM NUPELA GITA NA GO PILAI LONG HAUS I STAP..



## NAU EM SINGSING LONG DOK BILONG EM...



## EM LUKIM DOK BILONG EM NA EM TINGIM WANPELA SINGSING BILONG DOK YA...



## TASOL SPOTI I LES LONG SINGSING YA... EM KIRAP NA PISPIS ANTAP LONG GITA NA RONAWE...



# Foren Afeas rausim 19 man long kantri

DEPATMEN bilong Foren Afeas i bin rausim l8-pela ovasis manmeri long kantri i go bek long kantri bilong ol namel long Jun 1990 na Epril 1991.

Sampela ol dispela lain i wok long kantri na abrusim tok orait pepa bilong ol long wok na i kisim tok orait long stap sotpela taim, tasol ol i abrusim na stap longpela taim.

Dipatmen i rausim tu l9-pela man bilong narapela kantri i go bek bilong kantri bilong ol bikos ol i kam insait nating long kantri na mekim ol wok i no stret long lo bilong kantri.

Minista bilong Foren Afeas, Sir Michael Somare i tok dipatmen bilong em i gat pawa tu long stapim ol narapela

man long kam insait long PNG long ol ples balus bilong ol narapela kantri em PNG i gat opis long en.

Taim ol opisa i painimaut ol i tokim wanem balus i karim ol i kam i mas karim ol i go bek. Ol opisa i stapim l2-pela man pinis long kam insait long kantri long dispela rot.

Nem bilong ol sampela lain man i kamap tu long nius. Kain ol man olsem Ernest Fraser, wanpela bisnisman bilong Sydney long Australia. Narapela em Robert Moller na ol wokman bilong Channel 9 Televien Network.

Long wankain taim tu Dipatmen i kisim 6l aplikesen bilong manmeri i laik stap sitisen

bilong PNG. Insait long dispela grup, Dipatmen i oraitim 38 na rausim l9 na narapela foapela em Dipatmen i no mekim tingting bilong en yet.

Sir Michael i tokaut tu long sampela senis long ol maigresen fi. Dispela i karamapim ol turis na ol bisnisman. Husat ol man i kam insait long kantri long wok bisnis bai baim namel long K10 na K50. Husat long ol i laik wok sotpela taim bai baim K250. Ol man i save sel long sel bot i kam insait long kantri na ol niusman bai baim namel long K5 na K100.

Em i tokaut tu olsem Dipatmen bai bilip olsem bai givim K2.5 milien profit long Gavman.



□ TELEK em wanpela biknem musik man bilong Papua Niugini. Long taim em wantaim Ben Hakalitz na Pius Wasi bilong Tambaran Culture i go stap pilai raun long Australia las mun, olgeta buai em i bin karim i go long hap i pinis na ol tupela poro i sori long em na ol i go painim buai. Sampela India i salim buai na ol i baim. Tasol dispela buai i strong nogut tru na ol i putim long hatwara long nait. Tasol long moning, buai i strong yet olsem na ol i hatim gen. Tarangu nek bilong Telek i bagarap tasol kol bia bilong Australia i helpim em long singsing gut na winim lewa bilong planti yangpela na lapun wantaim. Gutwan Telek! Na Kanage i no lus tingting tu long Pius wantaim Ben.

Uncle Pranis Davido, Hohola, Pot Mosbi.

□ WANPELA meri Buang wantaim boi Bukawa i raun i stap long Boroko maket long nait na ol raskol i bungim tupela. Na yu save, maket i stap klostu tasol long Boroko Pils stesin. I no longtalm na sampela boi bilong Boroko Maket Bois i kamap na laik raunim dispela boi Bukawa na kisim pren meri bilong en. Meri ya i bun guria wantaim na kirap givim stret kapupu. Ol yangpela man ya i harim bikpela pairap stret na ting ol plisman long stesin i sutim smok bom i kam bikos bikpela smel tu i kamap. Olsem na olgeta i kirap das na lusim tupela ya.

Ian Ork, P.S.R. Badili, Mosbi.

□ SAMPELA lapun bilong Madang i wokabaut long rot i go olsem long Tusbab haikul. Ol yangpela skul meri bilong Karkar i lukim ol na lap na wokim pani. Lapun kandre bilong Toro i harim olsem na tanim tokim ol skul meri, "Now you are in school, you say you are school girl. Bur when you go home, you sit near the fire, like a lapun meri."

Peter Kumi, Madang.

□ PREN meri bilong wanpeola gutpela pren bilong Kanage i gat kaskas long skin bilong em. Olgeta nait na de, dispela meri i save taitim bun long skrapim ol dispela kaskas bilong em. Orait long wanpela nait olgeta yet i bung sindaun na pilai kas i stap. I no longtalm na pren meri bilong poro ya kirap na siksti i go insait long rum na skrapim kaskas bilong em. Taim bilong em long pilai nau na ol arapela i singaut long en. Tasol kaskas i sikarap moa yet na em kirap bekim, "Olaman, mi ya sikarap bilong mi i moa yet ya. Olsem na mi i no inap kam ausait." Kanage i lukluk long pren bilong en, pasim ai tasol long en na tekov.

### Operesen Stretim Wari bilong Gogol Naru

OL papa bilong graun long Gogol Naru timba eria long Madang i kirapim nau Operesen Stretim Wari grup.

Dispela grup i bilong toktok na lukluk long ol bagarap na wanem arapela birua i kamap long bus, graun na wara bilong ol bihainim ol wok bilong katim timba long hap.

Dispela grup bai go long Japan bilong toktok wantaim mama kampani bilong Jant Timba, kampani husat i wok long katim timba, long Madang. Ol toktok bilong ol dispela lain bai sut long ol kain bagarap em i wok long kamap nau long hap.

Bikpela hap graun na bus i bagarap pinis na graun i drai olgeta. Na long narapela sait, planti abus i ranawe pinis na wara tu i bagarap.

Mausman bilong grup, Mosol i autim tingting bilong ol pipel olsem ol bai toktok yet.

## Bikhet man bagarapim tru Maprik

BIKPELA birua na pret i bin kamap long liklik taun bilong Maprik long Is Sepik provins las wiken.

Insait long wanem samting i bin stat olsem pait namel long ol plisman na 5-pela spakman, sampela yangpela man, husat em krismas bilong ol i stap namel long 19 na 21 yia, na i save stap raun nating long Maprik taun i brukim plis stesin, bagarapim olgeta plis redio, na rausim tu telipon waia i save stap long tebol bilong plis stesin.

Provinsal Plis Komanda (PPC) bilong Is Sepik, Siev Inspekta John Wakon i tok kos bilong olgeta dispela bagarap i stap namel long mak bilong K3,000 na K4,000.

"Kos bilong ol bagarap i bikpela tru bikos ol dispela yangpela man i brukim banis na glas bilong plis stesin long fran na baksait wantaim, na brukim plis redio olgeta em kos bilong em inap long K800 o K900.

"Ol dispela yangpela man i holim redio na tromoi i go daun long sait bilong maunten. Olsem na i no gat rot bilong stretim gen dispela plis redio," Siev Inspekta Wakon i tok.

Insait long dispela birua, ol yangpela man i bin paitim nating tu tupela kalabusman em ol plisman i holim i stap long plis stesin. Tupela wantaim i slip nau long haus sik long Maprik. Wasket bilong wanpela bilong tupela i lus olgeta na narapela i kisim bikpela sua tru long het bilong en. PPC Wakon i bilip olsem ol spakman i bin yusim ston long brukim het na maus bilong tupela kalabusman ya.

Dispela olgeta birua na bagarap i bin kamap long Sande, 19 Me, 1991 bihain long 5-pela spakman i bin statim pait wantaim ol plisman long Sarere nait, 18 Me.

Ripot i tok olsem ol plisman husat i bin wok long las Sarere nait i bungim 5-pela spakman long rot na tokim ol long go stret long haus na slip. Tasol ol dispela spakman i kirap na pait wantaim ol. Orait ol plisman i yusim smok bom long raunim ol dispela man. Dispela olgeta samting i bin kamap

olsem long 11 klok long nait.

Bihain long Sande moning, dispela ol yangpela man wantaim narapela 4-pela gen i bung na go spak. Na samting olsem long 4 klok apinun, olgeta i kamap long Maprik plis stesin na paitim tupela duti plisman na brukim nabaut ol samting. Long dispela taim yet, ol i paitim tu tupela kalabusman husat i bin stap long stesin.

Siev Inspekta Wakon i tok ol yangpela man husat i bin statim dispela trabel i save stap raun nating long taun. Ol i no manki bilong ples. Wanpela bilong ol dispela hambak man i save wok olsem draiva bilong Distrik Opisa In-Sas (DOIC) bilong Maprik stesin. Tasol em i no inap autim nem bilong man ya.

Wanpela plis raiot skwat bilong Wewak i bin go long Maprik na kalabusim olgeta 9-pela man husat i bin kamapim birua na bagarap long Maprik plis stesin.

Long ol dispela lain, 5-pela namba wan man bilong statim trabel long nait i slip nau long CIS long Boram bilong wetim kot bilong ol. Ol plisman long Wewak i sasim ol long dring spak na raun wantaim tingting bilong kirapim pait, paitim na bagarapim skin bilong tupela plisman na tupela arapela man husat i stap long han bilong lo, na bagarapim ol samting bilong gavman.

Na ol CID plisman i toktok yet wantaim narapela 4-pela man husat i bin helpim long kirapim trabel na bagarapim ol samting long Sande apinun.

Wakon i skruim toktok olsem olgeta samting long Maprik i stap isi nau. Tasol em i tok, ol pipel insait long Maprik komyuniti na ol ples klostu i no amamas bikos gutpela sevis na helpim ol i save kisim i bagarap pinis. "Mipela long Wewak i save toktok wantaim Maprik nau long telipon tasol. Mipela i no inap yusim redio moa inap nupela i kam."

Em i tokaut tu olsem sampela paul stori olsem ol soldia bilong Papua Niugini Difens Fos 2PIR long Moem Bareks i go antap long Maprik i no tru.

"Dispela em ol tok win tasol," em i tok.

### Wutung pipel i laik save long K20,000 bilong ol i go we tru

OL pipel bilong Wutung Wan konstituensi insait long Sandaun provinsal asembli i laik save long wanem hap em konstituensi gren mani bilong ol i save go long en.

Dispela em stat long taim Yalu na Enda i bin kisim gavman long 1988 yet i kam inap nau.

Wanpela komyuniti lida Wegra Kenu i bin mekim ol dispela toktok bikos i no gat wanpela gutpela projek o wok helpim i kamap insait long konstituensi bilong ol.

Aninit long ol dispela mani bilong konstituensi, Kenu i tok spika bilong provinsal asembli na memba John Leki i save kisim K20,000. "Tasol mipela ol pipel i no save lukim pes bilong wanpela toea long ol dispela mani.


"Em i save yusim dispela mani long klinim ol rot bilong Vanimo taun," Kenu i tok.

Tasol memba i bekim toktok bilong Kenu na tokaut olsem gavman i sot nau long mani. Na tu em i no inap mekim wanpela toktok long dispela mani bilong konstitusen. Em i tok tasol olsem long las yia na dispela yia, gavman i no bin putim sampela mani bilong givim i go long ol konstitusen.

• Ripot bilong Jastis Thomas Barnett nau i kamap long Tok Pisin. Dispela bai helpim ol manmeri long kantri long klia gut moa long wok bilong fores insait long kantri. Ol manmeri tu bai save long wanem ol kampani i no bihainim lo bilong Fores Dipatmen taim ol i katim timba. Sampela long ol dispela kamapani i wok yet long kantri, tasol ol i wok long bihainim gut lo nau

## Barnett Ripot

SOTPELA RIPOT BILONG KOT EMI LUKLUK LONG OL KAIN PASIN BILONG WOK BISNIS BILONG KATIM DIWAI LONG PAPUA NIUGINI



## Papua Niugini Nesenel Ileksen, Me-Jun, 1992

Nem bilong ol olupela na nupela kendidet bai kamap bilong resis long ol sia long olgeta ilektoret. Dispela em i bikpela samting olsem na olgeta man na meri bilong Papua Niugini i mas save gut tru long olgeta samting bilong mekim long taim bilong ileksen.


Sapos yu laikim helpim, go lukim ol Distrik Menesa, na ol Distrik Opisa-In-Sas (DOIC).

Askim ol long wok bilong ileksen em yu no klia long en.

**Tingim gut, ol gutpela lida i kamap long stretpela vot**

### TASOL HUSAT I KEN VOT?

Ol Papua Niugini man na meri husat i givim nem tasol long 1992 ilektoret rol bai tromoi vot. Na dispela i min olsem olgeta sitisen husat em krismas bilong ol i winim 18 yia na i bin stap insait long wanpela ilektoret moa



Authorised by Reuben Kaiulo, Electoral Commissioner Papua New Guinea

long 6-pela mun na mama i bin karim em pastaim long 27 Jun, 1974 bai tromoi vot.

Sapos yu winim olgeta dispela toktok na i no givim nem yet, pulimapim wanpela fom long Provinsal Iektoret Opis, Distrik Menesa o Opisa-In-Sas long hap bilong yu.

Tingim ... lo i tok olsem olgeta Papua Niugini man na meri i mas givim nem bilong vot.

### OL NUPELA LAIN BILONG VOT

Sapos mama i bin karim yu pastaim o long 27 Jun, 1974, yu mas givim nem bilong vot. Yu i no inap vot long neks yia sapos nem bilong yu i no stap long ileksen rol.

Go long Provinsal Iektoret Opis i stap klostu long hap bilong yu na pulimapim wanpela fom bilong vot nau!

**Tingim gut, givim nem nau! Olsem bai yu gen vot long 1992 ileksen.**



# MI LAIK MEKIM WOK BILONG RENBO

*"Taim mi mekim ol klaut i kamap antap long skai, bai renbo tu i kamap."*

DISPELA em i wanpela hap tok God i bin mekim long Noa long buk Jenesis long sapta 9. Ating yumi save long dispela stori.

God i belhat long pasin nogut bilong ol man bilong graun, nau em i laik pinisim ol. Em i salim bikpela ren i kamdaun inap 40 nait. Graun olgeta i karamap long dispela haiwara na tait na olgeta samting i dring wara na i dai. Noa tasol wantaim famili bilong em, na wanpela sip i pulap long kain kain enimal - ol tasol i no dai. Orait, nau haiwara i go daun na ol manmeri na ol enimal i bin stap insait long sip i putim lek i go daun gen long strongpela graun. Nau God i tokim Noa olsem: "Mi putim wanpela renbo bilong mi long klaut olsem mak bilong kontrak mi mekim pinis wantaim yupela

..... bai tait i no ken bagarapim gen olgeta samting i gat laip." (Jen 9:12,13).

Stat long dispela taim i kam inap nau, yumi olgeta i save amamas long lukim renbo i pasim heven na graun bihain long ren i bin pundaun na san i kamaut bek. Long planti tok ples bilong graun, renbo em i mak bilong gutpela taim na taim bilong bel isi. Renbo i skulim yumi long God i save helpim yumi. Renbo i olsem wanpela hinsis i pasim graun wantaim heven insait long liklik hap wil bilong en. Long sampela kantri ol i save kolim renbo em i bris bilong Holi Spirit. Na tru tumas, renbo i gat sevenpela kala olgeta na seven em i biknamba bilong Holi Spriti.

Bilong wokim renbo i mas gat

ren na ol blakpela klaut na tu i mas gat lait bilong san. Ol klaut i mas sanap long pes bilong yu na san i mas sanap baksait long yu. Nau waitpela lait bilong san i sutim ren, na ren i brukim waitpela lait bilong san i kamap lain kala i stat long retpela na i go inap long blupela. Na insait i gat grin na yelo na kain kala olsem.

Long wan wan kantri ol pipel i save yusim kain kain kala bilong bilasim klos na haus na ol samting bilong ol. Na wan wan kala i gat mining bilong en. Long planti kantri waitpela kala i makim taim bilong hepi na amamas. Em i makim tu klinpela pasin. Olsem na long taim bilong marit, meri i save pasim waitpela klos.

Long planti kantri blakpela kala i makim taim bilong sori na kra. Long wanem, blakpela kala

i makim indai. Long PNG blakpela pen long pes i min, wanpela man i kros na i redi long pait.

Long lotu tu, ol kain kain kala i gat mining. Bilong dispela na pris o pasto o bisop i save pasim klos i gat kala i pas long pestode em i wok long selebretim. Retpela kala klos lotu i makim paia bilong Holi Spirit o blut bilong martir. Grinpela kala klos i makim hop, o pasin bilong wetim gutpela samting i laik kamap. Dispela kala i kisim mining long ol gras na grinpela lip i save kamaut gen bihain long paia i bin bagarapim ples.

Olgeta samting nabaut long yumi long dispela graun i gat kala. Em i bilas bilong ol. Tasol ol i lusim kala long tudak bilong nait. Lait bilong san i pulim kala i

kam ausait long samting. Tripela bikpela kala em blu na ret na yelo. Yumi inap wokim olgeta arapela kala sapos yumi miksim dispela tripela tasol.

Nau yumi go bek long renbo na ol kala bilong en. I gut yumi sanap olsem wanpela renbo long laip bilong ol manmeri nabaut. Long taim ol i karim pen na hevi, i olsem ol blakpela klaut i karamapim ol. Orait, nau em i taim bilong renbo bilong pes bilong yumi i mas lait long ol bai ol i ken kisim strong.

## Kavieng i kisim pinis nupela Katolik bisop bilong ol



**Nupela Katolik Bisop Ambrose Piapseni bihain tasol long em i kisim blesing.**

BIKPELA bung na amamas i bin kamap long Kavieng taun taim ol pipel i bung long lukim Ambrose Piapseni, M.S.C. i kisim blesing (odinesen) bilong kamap olsem nupela Katolik bisop bilong ol. Dispela bikpela de bilong ol pipel bilong Kavieng i bin kamap long Sande, 12 Me, 1991. Bisop Ambrose i gat



**Olgeta i bung insait long haus lotu na redi long taim bilong Asbisop Hesse i givim blesing long Bisop Ambrose.**

46 krismas na i bilong Masahet Ailan long Lihir, Nu Ailan provins. Em i lukautim nau Daiosis bilong Kavieng we i karamapim Nu Ailan na Manus provins. Insait long dispela Daiosis i gat 20 peris na moa long 50,000 bilipman na meri bilong Katolik sios. Bisop Ambrose i kisim ples bilong Asbisop Karl Hesse husat i stap nau na lukautim Asdaiosis bilong Rabaul. Asbisop Hesse yet i bin kamap na givim blesing bilong makim Bisop Ambrose long lukautim Daiosis bilong Kavieng.

## Luteran na Yunaited sios wokim haus lotu long Bogia

ELIZABETH SOLOMON i raitim

MOA long 500 pipel i bin bung long Bogia gavman stesin long Madang bilong blesim hap graun em Luteran na Yunaited sios bai sanapim wanpela haus lotu bilong ol long em.

Dispela em i namba wan taim bilong dispela tupela sios long bringim lotu bilong ol i go long hap bilong not kos. Bikos bikpela namba tru bilong ol man, meri na pikinini long hap i save bihainim bilip bilong Katolik Sios.

Long dispela gavman stesin yet, i gat ol pablik sevana na ol wokman na meri bilong ol kain kain kampani. Na namel long ol dispela wokman na meri bilong gavman, 30 em ol memba bilong Luteran Sios na 10-pela em ol memba bilong Yunaited Sios.

Wanpela Luteran seget tasol i save stap long dispela hap bilong Madang em ol lain bilong Gabak. Na olgeta arapela em ol memba bilong Katolik Sios.

Long amamasim dispela de, ol kwaia grup i bin kamap na autim stail bilong ol. Wanpela SDA kwaia grup bilong Bogia yet i bin stap, wantaim narapela bilong Yunaited Sios na ol lain Katolik yut bilong ol komyuniti i stap klostu. Ol lain Luteran yut tu bilong Gabak i bin bringim wanpela kwaia grup bilong ol i kam long amamasim dispela de.

Olgeta samting bilong amamasim de ya i bin stat long Sarere wantaim bikpela pati na kaikai. Bikpela kaikai i bilong tok welkam long ol bikman na meri nabaut.

Namel long ol dispela lain em tupela mausman bilong Luteran Sios long Madang na wanpela mausman bilong Yunaited Sios yet.

## Liklik trening na kos i ken bringim gutpela sindaun long ples

OL liklik trening na sotpela kos inap tru long helpim sindaun bilong ol pipel long ol ples.

Tasol bikpela wok i stap long ol yangpela yet long rot ol i yusim ol dispela save na wanem samting ol i bin lainim. Bikos save i kam long ol dispela liklik kos na trening inap helpim wan wan man na meri long kamap gutpela, stap hepi na gat inap samting long komyuniti bilong sindaun amamas.

Provinsal minista bilong Egrikalsa na Laipstok long Morobe, Gilimbing Yapleh i bin mekim ol dispela toktok long taim em i pasim wanpela kos bilong kopi developmen long Pindiu las wik.

Em i askim ol yangpela man na meri husat i bin kamap long dispela kos long yusim save bilong ol long wanem samting ol i lainim long wok

long ples. Na maski long go insait long taun na traime painim wok long hap.

"Wok bilong egrikalsa i karamapim sindaun bilong mipela long olgeta de. Em i min mani, rot, ol skul, haus sik na ol arapela sevis nabaut."

Yapleh i tokim ol yangpela man na meri tu olsem Morobe provins i gat bikpela na gutpela graun bilong mekim ol wok egrikalsa. Olsem na ol yangpela i mas stap long ples na kirapim ol dispela graun na hap bilong ol. Long dispela we, ol bai inap sanap long lek bilong ol yet na sindaun bilong ol bai i stap gutpela oltaim.

Moa long 60 yut memba bilong Finsafen na Kabwum distrik bilong Morobe provins i bin kamap long dispela kos.

## Meri Enga kamap wimens kodineta bilong Luteran Sios

WANPELA meri bilong Enga i kisim wok nau olsem wimens kodineta bilong Esia long Luteran Sios.

Dispela meri em Dakis Rea bilong Gutnius Luteran Sios long Enga. Bisop Getake Gam bilong Luteran Sios na Bisop David Piso bilong Gutnius Luteran i bin givim nem bilong Misis Rea long dispela wok long bikpela kibung bilong Mission Consultation Council bilong Luteran Sios long Kuala Lumpur long Malesia. Dispela kibung i bin stat long 23 Epril na pinis long 3 Me, 1991.

Na Dakis Rea tu i bin stap insait long kibung.

Dispela tu i namba wan taim bilong wanpela Papua Niugini long kisim dispela wok. Insait long kibung, ol i makim em tu long kamap memba bilong esia Press Consultative Committee. Dispela komiti i gat narapela 10-pela memba na olgeta i bilong ol kantri long Esia rijon.

Dakis Rea i bin stap wok wantaim sios inap long 13 yia nau. Famili bilong em i save strong tru long bihainim skul bilong Luteran Sios. Em i namba tu pikinini long famili na i gat narapela 7-pela brata na susa. Papa bilong em Kisa Kingiandake i bin wanpela bilong ol namba wan man bilong Surinki veli long kamap olsem pasto bilong Gutnius Luteran sios.

Dakis i pinisim komyuniti skul long Surinki veli long 1967 na i go long Sen Pauls haikul long

Pausa. Em i lusim haikul long 1971 na i go long Martin Luther Seminari long Lae bilong skul long kamap pasto.

"Tingting bilong mi i bin pas tru long kamap wanpela pasto olsem papa bilong mi," em i tok.

Long 1980, Dakis i kisim hap pepa bilong em long Peris Setifiket na i go bek bilong wok long Enga.

"Mi bin lukim olsem planti hevi i wok long kamap insait long ol famili. Ol meri na pikinini i wok long painim bikpela hevi. Olsem na mi laik go bek na helpim ol. Planti bilong ol dispela hevi i sut long ol pait na birua em i save kamap long Enga."

Dakis i bin wok tu olsem tisa bilong ol rileses instraksen long ol skul na i bin wok tu wantaim ol meri na pikinini.

Taim Gutnius Luteran Sios i kamap memba bilong Melanesien Kaunsil bilong ol Sios (nau em Papua Niugini Kaunsil bilong ol Sios), Dakis i skruim wok bilong em i go na karamapim tu ol wok bilong Kaunsil.

"Mi bin lainim planti samting long wok bilong Papua Niugini Kaunsil bilong ol Sios. Na nau ol i statim dispela tebol bilong ol meri, wimens program i go bikpela na kamap strong nau," em i tok.

Dakis i marit long wanpela loya husat i save wok long opis bilong Atoni Jenerel. Na i aat tupela pikinini.

# Wokabaut bilong nesenel kot Gavman stat long rausim ol setelmen long Lae siti

OL SAS bilong nesenel kot i orait pinis na makim ol ples bilong holim ol kot insait long ol provins.

**Nesenel Kapitel Distrik**

- Waigani, Boroko, Mosbi.
- Sentrel provins,** Kwikila, Kupiano, Bereina, Tapini.
- Galp provins,** Kerema, Kikori
- Westen provins,** Daru, Kiunga, Tabubil.
- Milen Be provins**
- Alotau, Kiriwina, Samarai, Bwagoia, Misima.
- Saten Hailans,** Mendi, Tari, Koroba
- Noten provins,** Popondeta, Tufi.
- Morobe provins,** Lae, Wau, Bulolo, Finsafen, Menyamy, Wasu
- Is Sepik provins,** Wewak, Maprik, Angoram.
- Wes Sepik provins**
- Aitape, Vanimo, Telefomin

- Madang provins**
- Madang, Bogia, Saido
- Enga provins,** Laiagam, Porgera, Wabag, Wapenamanda.
- Westen Hailans,** Banz, Minz, Hagen
- Simbu provins**
- Kundiawa, Kerowagi,
- Isten Hailans**
- Kainantu, Henganofi, Goroka.
- Manus provins**
- Lorengau
- Nu Ailan provins**
- Konos, Kavieng, Namatanai, Taskul
- Bogenvil**
- Arawa, Buin, Buka, Hutjena, Kieta, Panguna.
- Is Nu Briten**
- Kerevat, Kokopo, Rabaul, Pomio
- Wes Nu Briten**
- Kimbe, Kandrian, Bialla.

**YAKAM KELO i raitim**

OL bikipela masin i rausim pinis Wabag kompaun na Voko Poin setelmen long Lae na em bai rausim nau Jawani strit setelmen.

Primia bilong Morobe Jerry Nalau i tok bikipela tingting bilong rausim ol setelmen i stap long graun bilong gavman em long daunim hevi bilong lo na oda insait long siti.

Em i tok planti man i wok long yusim graun bilong gavman long sindaun na kamapim kain kain bikhet pasin long en. Ol i wokim haus na pulim wara na pawa i go insait. Ol i wokim ol stua na blak maket bilong bia na ol kain samting olsem. Planti sik i ken kamap tu long ol dispela kain setelmen.

Long pasin tumbuna, yu man nabaut i no inap yusim graun bilong narapela. Bikos man ya bai

kirapim pait wantaim yu. Primia Nalau i tok dispela i wankain tasol olsem na ol pipel i no ken yusim graun bilong narapela man na sindaun long en.

Primia i tok em bai i no inap long marimari long ol pipel bilong Morobe sapos ol i stap long graun bilong gavman. Em bai mekim wankain pasin long ol manmeri bilong olgeta provins.

Gavman bilong bipo i bin tok save pinis long 1988 na 1989 long ol lain husat i yusim graun bilong gavman long kirap na go. Tasol no gat wanpela samting i bin kamap long dispela taim inap nau.

Gavman bilong Nalau bai go het long rausim ol setelmen i no bihainim lo bikos em i was papa nau bilong ol samting long provins.

Ol dispela manmeri i mas go bek long wanem hap ol i bin kam long en. Sapos ol i wok orait kampani o gavman dipatmen i mas stretim ples bilong ol long stap.



**Ol bisop i bung • Dispela bung i bin kamap taim Bisop Karl Hesse bilong Kavieng i kamap Asbisop bilong Rabaul. Na long wankain bung long dispela mun, Asbisop Hesse i givim blesing long Bisop Ambrose Piepseni long kamap olsem nupela bisop bilong Kavieng Daiosis. Stori pes 6.**

## Bulolo yunien sapatim Titimur olsem Ila i mas risain long wok minista

PAPUA Niugini Fores wok as Yunien (PNGFWU) long Bulolo i sapatim tingting bilong Papua Niugini Tred Yunien Kongres (PNGTUC) olsem Nesenel Providen Fan wantaim Leba na Emploimen diaptmen i no wok stret.

Presiden bilong

PNGFWU, Cleopas Yawal i sapatim toktok bilong PNGTUC jenerel seketeri, Lawrence Titumur olsem minista bilong Leba na Emploimen Tony Ila i mas risain long wok bilong em. Bikos, em i tok, Leba na Emploimen dipatmen i bagarapim pinis planti

gutpela wok bilong ol woka insait long kantri.

Eksekutiv opisa bilong PNGTUC, John Pasca i bin bungim ol woka bilong Bulolo bilong toktok long dispela hevi. Dispela kibung i painim tingting olsem Ila i mas lusim wok bilong em nau.

Yawal i tok Ila yet i bin

wok klostu wantaim ol yunien bipo na i save gut tru long hevi na wok bilong ol. Tasol nau em i no givim sapat na helpim bilong en. "Minisat i tanim bek long ol yunien na wok ol i mekim. Olsem na em (Ila) i mas risain long wok bilong en," Yawal i tok.

## Ol Wutung amamasim de bilong mama

OL pipel bilong Wutung viles long Vanimo, Wes Sepik provins i bin

baim meri long amamasim de bilong ol mama tupela wik i go pinis. Long de stret planti pipel i bin kamap long amamas na bung wantaim.

Tupela brata bilong ples Wutung i bin maritim tupela meri bilong narapela ples. Dispela i kirapim bel bilong bikman bilong liklik wanpisin bilong tupela brata ya, Francis Chonny Rahe long soim strong bilong em long ol arapela grup insait long Wutung yet. Rahe i redim kaikai

na mani inap long tupela wik olgeta pasitaim long ol i tokaut long baim tupela meri.

Stret long de bilong tingim ol mama, Rahe i no go na askim ol lain bilong tupela meri long wanem samting em bai givim olsem pe bilong ol.

Tasol Rahe i go het na bungim planti kaikai tru bilong givim long ol lain bilong meri. Rahe i no baim tupela meri long mani na kaikai tasol. Nogat bikipela hap bilong pe i kam long mani bilong ol

tumbuna.

Nau em i namba wantaim bilong ol pipel bilong Wutung long amamasim de bilong ol mama olsem. Ol i bilip olsem ol i brukim rekot pinis long amamasim de bilong ol mama.

Nau tupela meri bai kamap memba bilong dispela grup long bringim namba i go antap.

Rahe i bin amamas tru long ol lain famili bilong em long bungim han wantaim na kisim dispela tupela meri i kam insait long grup bilong ol.

## Komyuniti skul op gen long Mumeng

ZEPA Komyuniti skul long Mumeng insait long Morobe provins i op gen long dispela wik.

Helt Inspekta i bin pasim Zepa komyuniti skul inap long wanpela mun nau. Helt Inspekta i pasim skul bikos i gat bikipela hevi long wara na toilet bilong ol sumatin i yusim.

Seketeri bilong Edukesen long Morobe provins, Samson Mangot i tok skul i no bin kisim gutpela helpim bilong komyuniti na ol lida. Em i tok dispela i no gutpela pasin bikos ol komyuniti memba i krai long kisim skul na skul i kamap-tasol ol i no strongim na sapatim skul long sanap strong na go het.

Zepa komyuniti skul i bin stat long 1987. Nau skul i gat 4-pela klasrum wantaim 4-pela tisa. Mangot i askim tu ol distrik opisa long wok bung wantaim ol lain long provinsal level olsem bai ol kain hevi i no inap stap longpela taim.

Ol pipel na komyuniti memba bilong Mumeng distrik i singaut pinis long wanpela vokesenel senta na hauskul long hap bilong ol. Seketeri i tok dipatmen i luksave long dispela askim na ol bai bungim ol pipel bihain long painim tingting na rot bilong kisim helpim long kamapim dispela.

Long las wik, ol papamama i wok wantaim na stretim ol dispela hevi na Edukesen opis long Lae i oraitim skul long op gen long dispela wik.

# Noken peim moa long ol stoa!

**10t 10t 10t 10t**

## Sapos ol askim moa...go long narapela stoa!

**"NAU 63% BIKPELA MOA!"**



• Wanpela plisman bilong Irak ol ami bilong Amerika, Ingran na Frans i helpim em long han bilong ol rebel paitman bilong Kurdistan.

## Kurdistan refuji les long go bek

OL Kurdistan pipel bilong Irak i les long go bek long ples bilong ol. Ol i laik stap yet long refuji kem bilong ol long ol maunten inap olgeta samting i stret long laik bilong ol.

Dispela wik Amerika i bin askim ol Kurdistan ya husat long lusim kem na go bek long ples bilong ol. Ples bilong ol i stap long provinsal kapitel bilong Dahuk. Tasol Dahuk i gat yet sampela soldia

bilong Presiden Saddam Hussein.

Long dispela wik em bikipela Operesen Gallant Provider i kamap. Insait long dispela plen em Amerika i plenim long karim moa long 200,000 Kurdistan refuji i go bek long ples bilong ol. Ol i makim olsem dispela operesen bai i karamapim sotpela taim tasol.

Tasol wan wan refuji tasol i kamap long ol stesin bilong kisim tren

na go bek. Planti i stap antap yet long ol maunten bilong kantri Teki.

Planti Kurdistan refuji i pret long go bek long Dahuk. Bikos ol i pretim soldia bilong Saddam Hussein. Wanpela bilong ol dispela refuji em Ahmad Sharif. Em i tok, Mipela bai i stap hia inap ami bilong Amerika i ken go long Dahuk."

Moa long 10,000 refuji i stap nau long ol

maunten bilong Teki. Planti bilong ol dispela refuji i bilong Dahuk.

Bipo Dahuk i gat moa long 380,000 Kurdistan pipel. Bihain long bikipela Galp woa we Irak i bin tekova long liklik kantri klostu long em, Kuwait, Amerika wantaim ol Alait fos i go insait na winim em.

Ol Kurdistan i sapatim ol Alait fos na holim bikipela protes long rausim Saddam Hussein olsem lida bilong ol. Ol i kamapim tu ol rebel grup nambaut na pait egensim ami bilong Saddam.

Ripot i tok long dispela na Saddam Hussein i salim soldia bilong em i go insait long holim pasim na kilim ol. Ol i pet long dispela na ranawe i go long boda bilong ol arapela kantri olsem Teki.

Ripot i tok 380,000 Kurdistan pipel long Dahuk em sampela bilong ol 400,000 refuji husat i ranawe brukim bodi i go insait long Teki.

Planti i no laik go bek long Dahuk. Olsem na dispela bai i wanpela bikipela wok bilong Amerika nau long grisim ol. Dispela i min olsem ol ami bilong Amerika i mas salensim nau ol soldia bilong presiden Saddam long Dahuk siti.

Amerika i bin traim long noken kamapim trabel moa wantaim Irak long sait bilong tupela ami i pait.

Amerika i tok em i yesa wantaim Irak long salim tasol ol refuji i go insait bek long Dahuk.

Operesen Gallant Provider i karamapim ol Alait soldia husat isave stap long ol fri trenspot long ol stesin long planti Irak taun olsem Amadiya, Sarsank, Sakho.

Dahuk tasol em wanpela soldia bilong Alait fos i no stap insait.

## Toktok bilong salim ol plisman i go long ol refuji kem i orait nau

NU YOK: AMERIKA: YUNAITED Nesens na Baghdad i tok orait pinis long salim moa long 400 plisman i go lukautim ol refuji kem bilong ol Kurdistan pipel insait long noten eria bilong Irak.

Tasol Yunaited Nesens Seketeri Jenerel, Javier Perez de Cuellar i no inap tokaut sapos ol i tok orait pinis o nogat. Em i tok ol i mas tingting gut long tok orait bilong dispela hevi bikos ol toktok i no stret yet.

Jenerel de Cuellar i tok Amerika, Ingran, Frans na ol arapela kantri i askim pinis Yunaited Nesens long lusim ol i stap i go inap 400 o 500 plisman i kamap long noten Irak. Orait bihain ol i ken lusim kem bilong ol Kurdistan refuji.

Yunaited Nesens i toktok yet long ol plisman bilong go long noten Irak pastaim long ol ami i ken go bek long kantri bilong ol, Jenerel Perez i tok. Em i no gutpela long tokaut olsem ol i tok orait pinis long dispela o nogat.

Taim ol arapela man i askim em long hamas man bai stap na lukautim dispela eria, Jenerel de Perez i tok namba bai i stap namel lor g 400 na 500 plisman.

Mausman bilong Irak long Yunaited Nesens Abdul Amir al-Anbari i tok

## Saddam Hessein orait long ol Kurdistan pipel i lukautim ol yet

OL rebel paitman bilong ol Kurdistan pipel bai askim Presiden Saddam Hussein long lukautim kem bilong ol yet sapos Yunaited Nesens i no salim ol plisman hariap.

Dispela tok i kamap bikos ol i laikim ami bilong Amerika, Ingran na Frans long lusim noten Irak.

Lida bilong ol dispela rebel i bilip olsem ami bilong Amerika, Ingran na Frans bai i no inap go insait long ples we hevi i stap long en. Tasol ol opisa bilong Yunaited Nesens bai toktok gen long dispela wik long kisim tok orait long polisi bilong Irak.

Em i tok ol i mas kisim tok orait long yusim ol plisman bilong Yunaited Nesens long lukautim kem bilong ol Kurdistan refuji.

Wanpela toktok i kamap pinis long kem bilong ol refuji olsem Presiden Saddam i orait long ol Kurdistan yet i yusim ol plisman na ami long lukautim kem bilong ol.

Na ami bilong Irak bai sambai tasol na wok olsem sekyuriti arere long kem. Wanpela bikipela toktok i kamap olsem ol pipel bilong noten Irak bai kisim mani bilong wel long Kirkuk Wel Fil.

Na tu wanpela developmen i kamap taim ol Australia i salim sampela wokman bilong lukautim ol refuji ya. Ol lain ya i kamap pinis long Teki bihain long 19 aua ron bilong balus i kisim ol long Sidni na i go long noten Irak.

Ol bai stretim olgeta samting inap tupela de bikos ol bai wokabout 800 kilomita i go long boda bilong Teki na Irak. Long dispela hap, ol bai mekim sampela wok bilong givim marasin.

Tasol wok bilong kotim ol man husat i pait egensim Irak long taim bilong bikipela pait long Kuwait bai kamap bihain long taim ol i bin makim pinis long en. Kuwait Infomesen minista i tok ol bai statim kot long dispela Sarere. I no gat askim long wanem as stret na ol i senisim taim.

Ripot i tok moa long 628 pipel i kisim sas long helpim ami bilong Irak long woa. Na tu long ol arapela hevi em i bin kamap insait long Irak. Planti bai dai sapos kot i painimaut ol i mekim olsem.

Wanpela diplomat bilong Rasia insait long Irak i tok ami i bin kalabusim pasim wanpela man Ingran taim em i laik ranawe lusim Irak long mun Septemba las yia. Long wankain taim, Baghdad i kalabusim planti man bilong Japan na ol arapela kantri husat i bin birua long Irak.

Yunaited Nesens i givim orait pinis. Anbari i tok em i amamas bikos insait long wanpela wik, olgeta samting bai i orait na bai i no gat moa hevi i stap long Irak.

Ol plisman bai wok fultaim long lukautim ol wokman na tu kem bilong ol refuji. Dispela ol plisman bai i kam long Yunaited Nesens. Na ol bai traim long stapim ol soldia bilong Yunaited Nesens Pis Kiping fos. Al-Anbari i tok orait pinis long namba bilong ol plisman bikos dispela namba bai stapim ol long pait moa.

Em i tok sapos Yunaited Nesens i tok orait pinis, olgeta ami bilong Yunaited Nesens bai i go bek gen long wan wan kantri bilong ol. Planti wik i go pinis ol ami bilong Irak i no laik long ol plisman bilong Yunaited Nesens long lukautim kem bilong ol Kurdistan refuji. Em i tok kain pasin ya bai egensim lo bilong Irak.

Tasol ol plisman bilong Yunaited Nesens i mas stap long kem bilong ol Kurdistan refuji. Em i tok Yunaited Nesens bai kisim sampela tok lukaut long Sekyuriti Kaunsil sapos em i laik stapim olgeta hevi.

Saina na Rasia i tok orait pinis long rausim ol ami bilong Yunaited Nesens long Irak.



•Tupela pikinini karim papa i go long haus sik long kem bilong refuji





• Dispela kain ol protes mas na straik olsem ol studen bilong univesiti na ol yunien grup i save holim bai i no inap kamap nau. Ol bai i kamap tasol sapos i gat tok orait bilong gvaman.

## Mandela tokaut olsem ol toktok bai go het yet

KOT i makim Winnie Mandela long stap kalabus inap long 6-pela yia. Tasol dispela i no inap long stapim ol toktok bilong stretim ol hevi na skelim pawa namel long ol waitman na blakman.

Namba tu lida bilong Afrika Nesanel Kongres (ANC), Nelson Mandela i tokaut long dispela.

Meri bilong Nelson Mandela, Winnie bai kalabus long sas bilong kilim 4-pela yangpela man husat i bin helpim ol arapela lain long ol wok politik. Ripot i tok Winnie wantaim tupela man i bin kisim 4-pela yangpela man ya i go baksait long haus lotu na paitim ol inap ol i dai.

Nelson Mandela i tok kot bilong meri bilong em i no gat wanpela samting wantaim wok ol i mekim nau wantaim gavman long skelim gut pawa namel long waitman na blakman. Tasol i gat bikipela tingting namel long ol manmeri bilong Afrika. Ol i ting bai dispela trabel i autim sampela asua presiden F.W. de Klerk i laik haitim insait long nupela progrem bilong em.

Olgeta blak taun i lukluk tasol long

holim bikipela straik sapos kot i autim wanem kain tingting bilong en long dispela samting. Ol i ting bai gavman i bungim hevi bilong Winnie wantaim wok bilong Nelson Mandela na traim long bagarapim. Bikipela pret i stap yet sapos gavman bai mekim olsem.

ANC i tok ol i gat ol toktok bilong mekim bihainim kalabus bilong Misis Mandela. Tasol ol bai lusim olgeta samting i go long han bilong kot yet long tokaut long en bihainim pasin bilong lo.

ANC i tok bai ol i lusim toktok bilong stretim na skelim pawa namel long ol waitman na blakman sapos gavman i no mekim samting long pait i bin kamap long mun Ogas. Moa long 1500 man i bin dai long dispela birua.

ANC i sutim tok long sekyuriti bilong Saut Afrika long kamapim ol kain kain pait namel long ol pipel. Ol laik mekim kain pasin tu long stapim tingting bilong ANC long fomim namba wan blak gavman bilong Saut Afrika.

## Wok bilong AIDS i laik pinisim namba tu bilong man

WANPELA enimal we i luk wankain tru olsem man em Chimpanzee.


Tasol dispela ol lain enimal i stap wantaim bikipela pret nau bikos man i stat kalabusim nau ol dispela enimal bilong yusim long wok bilong marasin long sik AIDS.

Planti saveman bilong saiens long wok wantaim marasin i laikim nau ol chimpanzee bilong wokim ol eksprimen bilong ol long sik AIDS. Na dispela i mekim blak maket wok bilong ol chimpanzee i go antap olgeta long las tupela yia.

Wanpela grup bilong Amerika husat i save toktok strong long wok bilong lukautim ol enimal na bus bilong yumi i painimaut olsem long las yia tasol, ol man i bin salim 2,000 bebi chimpanzee. Ol man inap salim wanpela bilong ol dispela enimal long K10,000.

Ol lain bilong lukautim ol enimal i ting olsem long olgeta 10-pela chimpanzee em ol saveman bilong marasin i kisim i go long mekim wok bilong ol, wanpela i save stap laip na olgeta arapela i save dai. Long dispela mak, ol i bilip olsem long 150,000 chimpanzee olgeta em ol i bin kisim long las yia, 20,000 bilong ol i bin dai.

Siameri bilong Intanesenel Primate Protection League, Dokta Shirley McGreal husat i bin mekim dispela wok painimaut i givim tok lukaut long las wik olsem namba bilong ol chimpanzee i bin pundaun bikipela tru long las 50 yia. Dispela i kamap long wanem bikipela hap graun na bus bilong ol i save stap long en i bin bagarap.



Kalabus: Ol 4-pela pikinini enimal ya i stap long kalabus we ol dokta i laik yusim ol long mekim tes long painim sik Aids.

Long ol yia i kam bihain, namba bilong ol chimpanzee em ol saveman bai yusim long traim marasin bilong sik AIDS bai winim namba em ol i lukautim nau long banis. Dispela em ol chimpanzee bilong bus yet.

Dokta McGreal i tok, "Sapos wok bilong marasin i go bikipela olgeta na ol i yusim moa chimpanzee, dispela bai i kamapim bikipela bagarap moa."

Long Wes Afrika insait long 50 yia tasol, namba bilong ol dispela

enimal i bin pundaun olgeta long 15,000. Na long 4-pela kantri insait long Afrika, yu i no inap painim ol chimpanzee moa. Olgeta i dai pinis.

Wanpela dokta bilong Amerika husat i mekim ol wok painimaut long namba bilong ol chimpanzee, Dokta Geza Teleki i tok olsem wol bai i no gat chimpanzee bihain long narapela 20 yia sapos dispela kain wok bilong marasin long yusim ol enimal ya i no pinis.

Dispela ol enimal chimpanzee i wankain

tru olsem ol man na meri bilong graun. Klostu 99 pesen bilong olgeta samting em ol i mekim i soim pasin bilong yumi man.

Long sampela kantri long Afrika, pasin em ol man bilong kalabusim ol bebi chimpanzee i save mekim i no gutpela liklik. Wanem samting ol bai mekim em long yusim sotgan long kilim mama chimpanzee na kalabusim pikinini bilong em. Na sapos wanpela famili mamba bilong dispela chimpanzee i laik traim banisim bebi ya, ol bai sutim na kilim em tu.

## Bagarap long India i bikipela moa long Galp bilong Pesia

MOA long 200 tan beg kaikai na ol arapela saplai i wok long go long ol pipel bilong Dhaka long hap bilong India.

Planti manmeri long dispela hap i bin kisim bikipela bagarap tru long bikipela win na tait na wara long mun Epril long dispela yia tasol.

Planti bilong ol i lusim ol haus na kaikai na ol arapela samting bilong ol. Ripot i tok moa long 139,000 manmeri i dai pinis na 10 milien i lusim olgeta samting bilong ol. Ol i no gat haus na kaikai na ol arapela samting bilong sindaun gut.

Ol balus bilong ol arapela kantri i wok long pundaun olgeta de wantaim ol kaikai na ol arapela samting em ol pipel i mas kisim. Ami



HELPIM: Ol manmeri bilong Bangladeshis i karim ol rais bek bilong ol bihain long ol i kisim bikipela taim long win, tait na wara. Sip bilong Amerika i karim ol kaikai na helpim i kam long ol.

sip bilong Amerika i wok long karim ol kago i go tu bilong givim long ol manmeri bilong

Dhaka. Anitim long tok orait, bai i gat 250 na 400 soldia bilong go na

stap wok klostu wantaim ol manmeri bilong Dhakabilong mekim ol wok helpim na givim ol

arapela sevis long ol pipel. Tasol dispela namba i no bihainim tok orait ol i bin sainim.





9th SOUTH PACIFIC GAMES  
PAPUA NEW GUINEA 1991

# CAMBRIDGE

A MAJOR SPONSOR

# CRA painim gol long Hidden Veli na Wafi Kain kain pasin i wok long kamap long palamen

PROVINSAL minista bilong Lens na Minerel long Morobe provins i laikim CRA kampani i tokaut long mun Jun long em bai go het wantaim maining long Hiden Veli eria o nogat.

Minista Kaibe Mauri i tok gavman i no inap long harim ol toktok bilong CRA long skruim taim bilong wok long Hiden Veli i go moa. Em i tok sapos CRA i laik westim taim long kirapim wok long Hiden Veli, orait em i ken kirap na i go. Bikos ol i ken painim narapela kampani long go wok long hap.

Nau CRA i painim tu narapela maining eria long hap bilong Wafi. Olsem na CRA i gat tupela ples em Wafi na Hiden Veli bilong painim kopa na gol. Mauri i tok CRA kampani i bin painim Hiden Veli pastaim long Wafi eria olsem na em i mas kirapim wok pastaim long Hiden Veli. Tupela ples bilong i painim gol i stap long wanpela hap tasol. Olsem na CRA i no ken lusim hap wok i stap na kalap i go long narapela.

Minista i tok hap bilong Wafi i gat bikpela toktok i stap yet. Kampani i no stretim yet ol toktok wantaim ol papa bilong graun. Bikpela tingting bilong gavman nau em, CRA i mas stretim ol pipel pastaim.

CRA opis long Wau tok olsem ol i bin kisim gutpela bekim bilong ol asples long Hiden Veli. Tripela ples, Winima, Kuembu na Nauti i bin orait wok bilong CRA.

Mausman bilong CRA long Wau i tok kampani i mekim yet ol wok painimaut long hap.

Em i tok CRA i bai wok nau long Hiden Veli na Wafi wantaim. CRA bai lukluk long wanem stori ol i kisim long ol wok painimaut long Wafi na Hiden Veli. Na bihain bai ol i stretim rot bilong statim maining.

Provinsal minista bilong Praimeri Sevis na memba bilong Midel Watut, Gilimbing Yapleh i tok em i wanbel wantaim ol pipel bilong em long wok bilong CRA long Wafi eria. Mausman bilong tupela ples, Hengambu na Yanta i bin toktok wantaim em long laik bilong ol na em i wanbel wantaim ol.

## Ol Fores opisa bai sekap long ol timba bisnis

FORES Minista, Jack Genia nau i makim pinis sampela opisa bilong painimaut long ol kampani i save katim timba long Madang provins.

Genia i tok namba wan wok painimaut bai kamap long wok bilong Jant Timba Pty Ltd nau i katim timba long Trans/Gogol eria. Genia i tokaut long dispela taim em i wok long bekim ol askim bilong memba bilong Middle Ramu James Yakip.

Yakip i askim sapos Dipatmen bilong Fores i gat sampela rot long stretim hevi bilong ol papa bilong graun long Madang. Sapos no gat dipatmen i mas kamapim wanpela wok painimaut i go insait long wok bilong timba long provins.

Memba i tokaut tu olsem sampela kampani i senisim ol nem bilong ol na kisim ol nupela ol timba pemit. Na tu taim ol kampani i baim ol royalti, ol kampani yet i kisim K250, gavman i kisim K20 na ol papa bilong graun i kisim tasol K4 na dispela em liklik tru.

Genia i tok i gat ol sampela samting i tru long ol askim bilong Yakip, tasol gavman nau i traim olgeta samting long stretim wok bilong timba i no long Madang tasol, long ol narapela hap bilong kantri tu.

Dispela ol plen bilong gavman em olpela Fores Minista, Karl Stack i bin tokaut long Palamen long las yia.

## Lae PNGBC gat masin bilong stapim ol stilman

PAPUA Niugini Benging Kopresen (PNGBC) long Lae bai givim moa sevis long ol kastoma bilong en.

Dairekta Allan Bigg i putim K80,000 bilong kamapim sampela senis long ol sevis em beng i save givim long ol kastoma.

PNGBC i luksave olsem hevi bilong lo na oda i wok long go bikpela insait long Lae siti na ol kastoma i mas gat gutpela sekyuriti oltaim long mani bilong ol.

Olsem na PNGBC bai putim ol nupela masin long tela na ol hap bilong kisim mani, senisim sek, ovasis mani, putim mani long beng na ol arapela hap olsem.

Ol dispela senis bai helpim sevis long go hariap long ol kastoma na ol woka bilong beng.

WANPELA waitman, husat i gat bisnis long Cairns, Australia nau i wok long palamen haus na i save givim saplai bilong kaikai na ol narapela sevis long palamen.

Palamen i save baim em K40,000 long wanpela yia na em i save karim ol bisnis kat bilong palamen na raun. Em i wanpela kontrak opisa, husat i mas pinis long las yia. Tasol palamen i holim em yet long long wok olsem edvaisa. Em i gat fri ka na opis bilong em Palamen Haus.

Man Papua Niugini yet, husat i kisim ples bilong em i

no gat save long long wok bilong lukautim na wokim ol haus. Em i save wok olsem redio teknisen. Na i luk olsem wanpela as bilong holim bek dispela waitman em bikos man i kisim ples bilong em i no save long wok bilong em.

Ol ripot i tokaut tu olsem long namel bilong las yia, palamen i bin kisim ol nupela masin bilong hatim kaikai, plet, spun, kap na sospen long haus kuk bilong palamen yet. Tasol nau i no klia long wanem hap ol olpela samting bilong haus kuk i stap long en.

Long wankain taim tu, Palamen i givim ol kontrak long ol kampani bilong mekim ol liklik wok olsem sekyuriti banis, haus bilong ol sekyuriti, ples bilong ol dok na ol narapela wok.

Aninit long lo bilong Fainens, ol dispela wok i mas kamap long tenda na ol kampani i aplai na winim kontrak. Tasol i no gat wanpela kain samting olsem i kamap.

Palamen i no bihainim dispela lo tu long kisim ol saplai bilong marasin bilong klinim plua, ol samting bilong opis na ol kaikai, bia na ol nara-

pela liklik samting.


Na tu, tupela yia i go pinis, palamen i bin rausim ol olpela wokman na kisim ol nupela. Planti man i bin aplai long tupela bikpela wok.

Namel long ol lain i aplai, wanpela em olpela Komisina bilong CIS na wanpela plisman, husat i wok pastaim olsem sekyuriti bilong olpela Praim Minista.

Palamen i lukadaun daun long tupela man ya wantaim ol narapela na givim wok long narapela man. Man ya i no gat inap save na ekspirrens.

# WINA

## KOLIM HAMAS MANI



Glasim gut poto na kolim hamas mani i stap long poto.

WANTOK i kirapim wanpela nupela kain resis long winim mani. Resis i go olsem: Yu mas glasim gut piksa antap ya. Traim kaunim ol mani i stap long piksa. Taim yu kaunim pinis, orait, raitim namba bilong mani long fom ya na salim i kam long Kaunim Mani Box 1982, Boroko

Sapos i no gat man i kolim namba stret orait husat i kam klostu tru i kisim K20.

Nem:..... K. BOBEN..... G..... P O Box: 2070, Boroko...

Taun:..... Papua New Guinea

Namba bilong Mani K20 25 K20 35

WANTOK i amamas nau long tokaut long nem bilong man husat i winim resis bilong Kolim Hamas Mani. Bikpela lain man, meri na pikinini tru i bin traim dispela resis, tasol oltaim i save gat wanpela.

Planti lain i bin kam klostu tasol no gat wanpela i givim stret mak bilong mani em i stap long niuspepa. Mak tru bilong mani em i stap long niuspepa em K20. 32. Na ansa bilong wina bilong yumi em K20.35.

Wina bilong mipela long dispela resis em K. BOBEN G. bilong dispela adres: P.O. Box 2070, Boroko, N.C.D.

Sapos yu em wina bilong resis o sampela pren i lukim dispela tok save, tokim K. Boben G. long kam lukim mipela long Wantok Niuspepa opis long Spring Gaden Rot Hohola. Askim long Barry Kalib o Willie Kotson. Yu ken toktok tu wantaim tupela man ya long telipon namba 25 2500.

## Nupela lo tambuim pablik kibung na ol setelmen

### SAM VULUM i raitim

NUPELA lo nau i kamap pinis long stapim ol manmeri long holim nating ol pablik kibung o protes mas na sindaun nating long graun bilong narapela manmeri.

Palamen i tok orait long dispela long Tunde na ol i kolim Pis na Gut Oda Bil em Jastis minista Bernard Narokobi i bringim kamap.

Dispela lo i givim pawa tu long ol plisman long stapim ol pablik kibung na protes mas sapos dispela i bagarapim gutpela sindaun bilong ol narapela manmeri. Na tu husat ol manmeri i laik holim pablik kibung protes mas i mas kisim tokorait pastaim long wanpela komiti em bai kamap bilong lukluk long dispela samting.

Long wan wan provins bai i mas gat wanpela long ol dispela kain komiti. Ol man i stap insait long komiti em siaman bilong taun atoriti, wanpela sinia plis opisa, na primia bilong provins.

Ol manmeri i laik protes i mas aplai i go long komiti. Komiti bai skelim gut tru na bihain givim tingting bilong en. Dispela aplikesen em long kisim pemit.

Ol manmeri i ken raitim pas o tokim tasol komiti long wanem hap bai kibung o protes mas i kamap long en, bilong wanem na i kamap,

husat i go pas long en na hamas pipel bai stap long kibung o protes mas.

Sapos komiti i no oraitim pemit, ol manmeri i ken kisim dispela i go long distrik kot na kot i ken tokaut long tingting bilong en.

Husat ol manmeri i painim olsem ol i no gat pemit na holim nating kibung o protes mas bai baim K1,000 o sapos nogat, ol bai kalabus long 12-pela mun.

Ol plisman tu i ken stapim kibung o protes sapos pemit, o sapos kibung i brukim ol rul bilong pemit. Taim plisman i painimaut olsem i no gat pemit, em i ken raitim pas i go long grup o tokim ol long maus long no ken go het long kibung.

Husat man i no harim tok bilong plis bai baim K400 o go kalabus long 6-pela mun o kisim tupela sas wantaim. Husat man i stap long kibung wantaim ol samting bilong pait, i ken kisim sas tu. Sapos ol plis i painim em bai em i baim K1,000 o kalabus long wanpela yia.

Na husat man i stap long kibung o protes mas na mekim ol toktok nogut we i sutim bel bilong ol narapela o bagarapim gutpela sindaun bai i kisim sas tu. Sapos ol i painim em bai em baim K500 o go kalabus inap long wanpela yia.

Ol plisman i ken banisim ol rot long strit sapos ol i lukim



• Dispela kain ol protes mas na straik olsem ol studen bilong yunivesiti na ol yunien grup i save holim bai i no inap kamap nau. Ol bai kamap tasol sapos i gat tok orait bilong gavman.

olsem protes mas o kibung bai bagarapim gutpela sindaun. Na man husat i brukim dispela baim baim K400 o go kalabus inap long 6-pela mun. Ol plisman i gat pawa tu long sekim ol ka. Husat man i laik stapim ol plisman, em i brukim dispela lo na em bai baim K400 o go kalabus inap long 6-pela

mun. Dispela lo tu i tambuim ol manmeri long no ken go bek long graun em papa bilong graun tru i rausim ol long en.

Husat man i no harim toktok bilong papa bilong graun i brukim lo na bai baim K1,000 o go kalabus long wanpela yia.

# PLIS RIPOT

**SIMBU:** Pait bilong paulim meri bilong arapela man i go het yet long Keu viles long Chuave, Simbu provins. Wanpela man, Kewa Kou i bin dai bihain long narapela man i katim em tupela taim wantaim tamiok.

Pait ya i bin kamap namel long tupela lain wanpisin, Komdu-lumo na Koisam long Sarere na i stap inap long tupela aua. Ol plisman bilong Kundiawa i tokim tupela lain wanpisin ya long stapim kain pait olsem.


Ripot i tok moa long 2,000 man i bin stap insait long dispela pait. Ol plisman i painim yet ol man husat i bin go pas long dispela pait.

**KAVIENG:** Plis ripot i tok wanpela bikpiela birua i bin kamap long Bunuwe eria long Buluminski Haiwe. Ripot i tok wanpela Mazda dabol keb ka i bin bam na wanpela liklik meri i dai. Ripot i tok Singia husat i gat 9-pela kris-mas i bilong ples Kungusgus long Nu Ailan provins.

Ripot i tok ka ya i bin ron i go long taun taim em i painim dispela birua. Ol plisman i painimaut yet na bai sasim man husat i bin draivim dispela ka.

**GOROKA:** Plis ripot i tok ol plisman i bin holim wanpela man long kilim wanpela meri long Asaro eria long Goroka, Isten Hailans provins.

Dispela birua i bin kamap long Tunde, 21 Me 1991. Ripot i tok dispela man i bin kros wantaim Veronica Namu na katim em long susu bilong em. Misis Namu i dai stret bikos naip i kisim lewa bilong em.



## ol pikinini kakaruk bilong mipela ol save flai i go long eniwe long PNG!

★ Baim helti pikinini kakaruk i save kamap long wanpela bikpela Poultry kampani long PNG.

★ Ol oda i moa long 3,500 kakaruk bai mipela setaim balus na dilivaim long yu. Yu ken bungim taim ol pren o wantok long kisim namba.

★ Edvais long we long ronim na lukautim na mekim haus bilong kakaruk bai mipela ken givim yu.


### PRAIS K50.50 TASOL

Long wanpela bokis i gat 50 beloi kakaruk na antap i tupela pikinini kakaruk bai yu kisim fri long wanwan bokis.

FARMSET LIMITED	PHONE
KAINANTU	77 1041
GOROKA	72 1955
BANZ	56 2244
MT. HAGEN	52 2916
RABAU	92 2175
<b>MOALE TRADING</b>	
LAE	42 3212

NAMBA LONG BAIM	MOALE 5 MILE LAE	FARMSET MT. HAGEN, BANZ & GOROKA
50	50.50	52.00
100	101.00	104.00
150	151.50	156.00
200	202.00	208.00

\* MOALE TRADING OPEN 5 DAYS A WEEK.



NIUGINI  
**Tablebirds**

# Sasim ol bikman tu long brukim kefiu aua Maski bagarapim biknem Dagua

Dia Edita,

Mi wanpela paul bodi bilong Mosbi Siti. Mi laik autim wari bilong mi i go long *Wantok Niuspepa* long olgeta manmeri i mas lukim.

Long wanpela progrem bilong EM TV long olgeta Sarere apinun, mi lukim ol plisman na ami i bin pasim rot na sekim ol ka. Long 10 klok nait stret Minista, Aruru Matiabe i bin draivim ka bilong em i go long wankain hap.

Taim em i kamap, ol plisman i giaman stapim ka na askim em long kefiu pas. Em i soim ol plisman, na ol i lusim em i go isi tasol.

Insait long dispela 4 WD ka, tupela meri i bin stap na ol plisman i no mekim wanpela samting

long tupela. Olsem wanem, yupela laik pilai wantok sistem o nogat?

Kain bikman olsem i kisim ka na raun painim meri long nait i no gutpela long ai bilong mipela ol pipel bilong em.

Kain pasin yupela i mekim long dispela bikman i hatim bel bilong mipela ol arapela grasrut pipel. Ol plisman, yupela i mas harim gut olsem lo em bilong olgeta man. Maski yu bikman o liklik man, o lapun man mer. Mipela olgeta i stap aninit long wanpela lo tasol.

Em tasol liklik bel hevi bilong mi.

**Don T. K. Bross  
MOSBI**

Dia Edita,

Mi wanpela manki Dagua long Is Sepik provins, tasol nau mi stap long Kapore long Wes Nu Briten provins. Mi laik bekim pas bilong brata Jeffrey M. Pas bilong em i bin kamap long *Wantok Niuspepa* bilong 14 Epril, 1990.

Preu, yu mas kolim nem stret bilong husat ol dispela manki Dagua i save mekim dispela kain pasin, na i no gutpela long kolim bikhet Dagua. Bikos ol arapela manki i no save long dispela samting yu toktok long an.

Mipela ol manki Dagua nau i stap long Kapore i no ol trip manki. Papa bilong mipela em ol nambawan lain husat i kisim blok long hia. Ol i karim mipela long hia na mipela i stap long hia inap long 99 yia olgeta nau.

Yu dispela man i raitim dispela pas i wanpela skin dai man, na yu no inap long stapim ol manki Dagua. Ating sapos ol man i kam na pulim meri bilong yu o mekim nabaut long yu, bai yu ranawe. Tasol mipela ol Dagua em yu save pinis, han i wok-abaut na haus i bruk. **Wawan P.S.,  
KIMBE**

# Stretim Kimbe na Hoskin rot Strongim lo bilong hangamapim trabel man

Dia Edita,

Mi wanpela manki Sepik, tasol nau mi stap long Kimbe long West Nu Briten provins. Mi gat liklik bel hevi long autim long *Wantok Niuspepa* bai menesmen bilong Kimbe Taun Atoriti i ken lukim.

Mi lukim olsem rot namel long Kimbe na Hoskins i no luk gut liklik.

Olsem wanem, yupela ol bikman i slip o?

Traim opim ai na mekim wok long

## Ol meri noken kalapim kaikai



Dia Edita,

Mi wanpela manki Morobe, tasol nau mi stap long Kavieng taun, Nu Allan provins.

Mi laik komplem long pasin mi lukim long Rabaul na Kavieng taun taim ol meri i save sindaun antap long ol basket kaikai bilong salim long maket.

Dispela pasin i no gutpela long tingting bilong mipela ol arapela long Moinase na Hailans rijon. Bikos long hap bilong mipela, i gat bikpela tambu tru long ol meri i kalapim ol samting bilong kaikai.

Kaikai yupela i salim long maket em bilong mipela long baim na kaikai. Olsem na no ken sindaun antap. Bikos mipela bai i pret long baim na kaikai.

Em tasol, na husat i laik bekim em laik tasol.

**Nini A. Yunga  
KAVIENG**

## Maski daunim ples

Dia Edita,

Planti taim mi harim olsem ol meri i save daunim ples bilong man bilong ol. Dispela i no gutpela pasin tumas. Taim yu maritim dispela man, em i soim olsem yu laikim em, klos bilong em, mama papa, susa na brata bilong em, ples na olgeta samting bilong em.

Na maski long mekim kain rabis toktok long bagarapim nem o laip bilong em. Sapos yu lukim olsem yu kain meri bilong daunim ples bilong ol arapela man, orait em i moa gutpela yu marit long asples bilong yu yet.

**Noah Timoty  
KIMBE**

lukautim ol pipel husat i stap insait long taun olsem ol longlong manmeri.

Na maski long pulapim poket nating na les long mekim wok.

Rot namel long tupela hap ya i luk olsem wanpela rot bilong trakta long kisim wel pam i go long fektori.

Plis tingting long taun bilong yupela. Na mekim gut wok.

Em tasol liklik wari bilong mi.

**David K Lepus  
KIMBE**

Dia Edita,

Mi wanpela ful taim rita bilong *Wantok Niuspepa*. Mi no amamas long presiden bilong ol mama, Maria Kopkop. Em i tok ol mama i no laikim gavman long pasim vot bilong hangamapim ol bikhet man long rop.

Mis Kopkop, mipela olgeta manmeri bilong dispela graun i gat mama na papa. Na sapos wanpela mama o papa i no lainim pikinini bilong em gut, gavman i mas pasim vot long stapim ol kain pik na dok olsem.

# Isi long smel sanda Kirapim vokesinal senta long Madang

Dia Edita,

Mi laik bekim pas bilong brata Robert Petnais. Pas bilong em i bin kamap long Fonde 28 Februeri, 1991.

Brata Petnais i komplem long ol meri Tolai i save karim ol smel marasin long bilum na mekim ol yet i save smel narakain stret.

Mi laik egensim toktok bilong brata Petnais. Bikos dispela em i laik bilong ol long mekim skin bilong ol i smel nais.

Sapos yu jeles long ol meri Tolai orait, go bek long provins bilong yu na komplem long ol meri wantok bilong yu yet.

Em tasol na husat i laik bekim em laik tasol.

**Joseph Korabi  
KOKOPO**

## Maski salim buai nambaut

Dia Edita,

Mi wanpela manki Sepik, tasol nau mi stap long Mosbi Siti. Mi save lukim ol manmeri i save salim buai na smuk arere long ol stua na opis.

Mi laikim olsem gavman i mas putim wanpela lo long rausim ol dispela kain manmeri i go long maket stret, na salim ol samting bilong ol.

Husat i sakim tok, orait kisim em i go long plis stesin na sasim. Na larim eria bilong stua na ol opis i mas klin olgeta taim.

**Ian B Ork  
MOSBI**

## Maski kolim olgeta Hailans


Dia Edita,

Mi laik sapotim pas bilong brata Jerry Waibe. Em i tok long ol Hailans i save salim ol kaikai nabaut long stret bilong Lae Siti.

Tok bilong brata Jerry i tru, tasol em i mas tokaut stret long wanem hap tru bilong Hailans i save mekim kain pasin olsem.

Long ai bilong mi yet, mi save lukim ol Simbu na Wabeg i mekim dispela pasin. Ol i save salim ol kuk kaikai olsem m u m u, karamapim mit long kumu, na salim. Ol i save salim tu ol lus smok na buai nabaut long ples.

**Frank Badavi  
LAE**



Dia Edita,

Mi wanpela manki Madang, tasol nau mi skul long Morobe provins. Mi laik sapotim pas bilong tupela brata ya, Michael Sikson na Kenny Kay Uripi.

Wari bilong mi olsem inap Madang provinsal gavman i lukluk gut na wokim wanpela vokesinal senta long Madang provins yet. Dispela askim nau i stap long ol memba bilong Madang long bekim hatwok bilong ol

pipel husat i votim ol.

Mipela i les long ol skin dai memba husat i tingting long ol yet. Na i no tingim hevim na sindaun bilong ol pipel.

Dispela em long wanem Madang provins yet i no gat planti vokesinal senta.

**M. Lehrric Lileb  
LAE.**

# Pasin bilong baim meri egensim Baibel

Dia Edita,

Mi wanpela manki Morobe tasol nau mi stap long Braun Riva ausait long Mosbi siti. Mi laik sapotim pas bilong brata ya Simon Bokie em i bin kamap long *Wantok Niuspepa* bilong Fonde 21 Mas, 1991.

Brata ya i tok Adam i no baim Eve na maritim. God yet i givim Eve olsem wanpela presen bilong em. Em i no sasim Adam long baim Eve. Tasol mipela ol manmeri bilong dispela graun i brukim pinis dispela lo bilong em.

Mi ken tok piksa long wanem as na planti gutpela marit i save bruk o bagarap. Bikos ol man i belhat long ol i save baim meri nating, na ol meri i no save mekim gut wok long helpim ol mama papa bilong man.

Nau yet planti hevi bai i stap sapos mipela i no senisim pasin bilong kompensesen na baim meri.

Dispela tupela samting i bikpela stret long laip bilong mipela. Ol mama papa bilong meri i mas tingting olsem, sapos yupela mekim olsem long

ol arapela yangpela man, ol bai i bagarapim pikinini meri na ranawe long em.

Sapos yu laik luksave moa long dispela, opim Buk Baibel, na lukim long Jon Saptu 3, lain 16. Dispela bai i kliam tingting bilong yu.

Em tasol liklik sapot bilong mi.

**James Wekari  
MOSBI**

## Lukautim Wewak taun

Dia Edita,

Mi laik autim kros bilong mi bai olgeta manmeri long Wewak, Is Sepik provins i ken lukim. Mi laik mekim wanpela askim olsem. Bilong wanem na ol manki i save stap long taun, na i bagarapim tru gutpela taun bilong mipela **Wewak?**

Ol i raitim ol kain kain rabis nem bilong ol long olgeta stua na haus long taun.

Mi laik askim, bai yupela kisim wanem samting long ol nem yupela i raitim? Plis traime na yusim het bilong yupela.

**Pita Takondu  
WEWAK**

# Hevi bilong bagarapim meri i no bikpela

Dia Edita,

Planti taim me harim ol manmeri i save toktok long ol man i mekim pasin nogut long ol meri (rap). Plis mobeta yupela i mas toktok long ol man

husat i save kilim narapela man i dai nating.

Dispela em i wanpela bikpela hevi. Na gavman i mas lukluk long stretim ol kain man olsem.

**Edward Andapiri**

# Kotim ol AIDS sikman Givim spes long ol grasrut

**Dia Edita,**  
Tude mi lukim olsem planti manmeri i gat sik AIDS long bodi bilong ol.

Mi laik askim nesene gavman long mekim wanpela strongpela lo nau. Dispela em long kotim ol manmeri husat i gat AIDS, na i prenim ol gutpela manmeri.

Ol manmeri husat i save olsem ol i gat AIDS, na i prenim yet

ol arapela manmeri i mas kism bikpela sas long dispela. Bikos ol tokaut long pren bilong ol.

Dispela i soim olsem ol i laik bagarapim bodi bilong narapela man o meri.

Nau yet mipela i no save long wanem ol manmeri i gat sik AIDS.

**Nicksy Bilye VANIMO**

**Dia Edita,**

Mi wanpela manki bilong Is Sepik provins, tasol nau mi stap long Wau Vokesinel Senta long Morobe provins.

Mi save lukim planti manki haikul i save go long vokesinel senta. Mi laik askim. Blong wanem na yupela ol haikul studen i kam long vokesinel gen.

Yupela mas pinisim skul na go painim wok stret. Bikos yupela i banisim ples bilong mipela ol grasrut

manki. Mipela ol grasrut manki bai kism liklik save olsem wanem, sapos yupela ol haikul gen i kam banisim ples bilong mipela.

Sapos mipela i askim ol kampani long wok, ol bai i tok nogat long mipela. Yupela ol haikul studen i gat gutpela sans.

Em tasol liklik komplem bilong mi. Mi bai i amamas long lukim wanpela bekim i kamap.

**Peter Kun WAU**

## Maski semim Simbu

**Dia Edita,**  
Mi wanpela manki bilong Simbu, tasol nau mi stap long Kimbe, Wes Nu Briten provins.

Mi laik toktok long sampela Hailans manmeri husat i save giamanim ol plisman, na bagarapim gutpela nem bilong mipela ol Simbu pipel.

Dispela em ol manmeri bilong ol eria olsem Mendi, Tari, Wabeg, na Hagen.

Yupela ol dispela manmeri i mas kolim stret nem bilong ples yupela i kam long en. Na maski long giaman olsem yupela i bilong Simbu.

Yupela bagarapim tru nem bilong Simbu. Na tu daunim provins bilong mipela.

**Steven Key KIMBE**

## Hagen Taun Atoriti mekim gutpela wok

**Dia Edita,**

Mi wanpela manki Sauten Hailans, tasol nau mi stap long Hagen taun.

Mi laik tok amamas i go long ol taun atoriti bilong Hagen long mekim gutpela wok nau long lukautim taun.

Nau mi lukim taun i klin gut tru, na i no olsem bipo.

Sapos ol man i tromoi rabis nabaut long ples, ol i mas baim yet K20. Sapos no gat orait, ol i ken go long Baisu haus kalabus.

Em tasol na husat i laik bekim em laik tasol.

**Jacob Yama HAGEN**

## EM TV, noken stapim ol gutpela piksa long edvetismen

**Dia Edita,**

Mi wanpela manki long Is Boroko long Mosbi. Mi gat liklik bel hevi, olsem na mi laik autim long *Wantok Niuspepa* long ol wokman bilong EM TV long lukim.

Planti taim yupela save stapim ol gutpela piksa, na putim ol rabis edvetismen. Traim na lusim ol gutpela piksa i go pinis stret. Na bihain yupela i ken stapim na soim ol edvetismen.

Na tu yupela i mas rausim ol olupela edvetismen

olsem bilong Hyundai Sonata na Twisties. Bikos mipela ol kastoma i les pinis long lukim ol kain edetismen olsem.

Traim na putim sampela nupela edvetismen, na mipela i ken amamas long lukim.

Yupela i save stapim piksa taim gutpela hap bilong piksa i kamap. Dispela i save mekim mi bel kaskas long yupela.

Em tasol liklik wari bilong mi.

**Popsy D Etinepe BOROKO**

## Maski salim lek bilong kakaruk long maket

**Dia Edita,**

Mi laik toktok long wanpela pasin em i no stret long ai bilong mi.

Mi no amamas long lukim sampela mama bilong Mosbi siti i kukim lek bilong kakaruk na salim ong maket.

Olgeta maket long Mosbi siti em planti mama i save salim lek bilong kakaruk long 10t na 20t.

Planti mama i save baim na givim long pikinini bilong ol. Na bihain bai ol pikinini i pekpek wara long nait, na lusim skin. Na dispela i save givim bikpela hatwok long ol mama gen.

Mi laik tok lek bilong kakaruk em i wanpela out-

pela abus. I nogat tambu long kaikai.

Tasol ol mama long maket i no save lukautim gut kaikai bilong ol. Ol i save sindaun stori i stap, na blu lang i save flai i kam sindaun antap long ol lek bilong kakaruk.

Olsem na taim ol manki i kaikai, ol i save painim sik long en.

Sapos dispela hevi i kamap bikpela, mi laik askim sapos Nesenel Kapitel Distrik Komisen (NCDC) i ken putim tambu long ol mama i salim lek bilong kakaruk.

**Morry Moses PORT MORESBY**

## Maski apim nating nem bilong Helsingut

**Dia Edita,**

Mi wanpela manki Pindiu long Morobe provins, na nau mi stap long Goroka taun, Isten Hailans provins.

Mi laik egensim pas bilong brata Mekodas Malengu bilong Bulolo. Em i tok Henu Helsingut i mekim bikpela wok long hap bilong em.

Brata noken tru apim nem bilong Henu Helsingut. Bikos em i abrusim pinis planti samting mipela ol pipel i askim long em.

## "Tingim ol yut bilong tumora"

**Dia Edita,**

Mi wanpela manki Tolai long Rabaul, Is Nu Briten provins. Mi laik toktok long raskol pasin em i kamap bikpela nau long olgeta hap bilong kantri.

Mi lukim olsem raskol pasin i kamap bikpela, bikos gavman i no "tingim ol yut bilong tumora".

Plen bilong ol gavman i bilong nau tasol. Gavman i nogat wanpela strongpela plen bilong kamapim inap wok long bihain taim, we i ken daunim hevi bilong raskol.

Raskol pasin i kamap bikpela nau. Na sapos gavman i no mekim wanpela samting nau yet, dispela hevi bai i kamap bikpela moa bihain.

Hevi bilong dispela i no go long Namaliu gavman. Mi ting olgeta gavman bilong 1975 i kam inap nau i mas kism hevi long dispela.

Sapos raskol pasin i kamap bikpela, orait mipela i mas hensapim ol bikman bilong mipela na bagarapim ol. Bikos ol tasol i as bilong hevi. Na mipela i noken bagarapim ol grasrut pipel.

**Tom Wera RABAUL**

No ken tru giaman mauswara, na sapotim em nating. Bikos yu no klia long olgeta samting em i mekim.

Ating em i mas giamanim ol pipel bilong yupela tasol long sampela samting o toktok nating tasol. Em tasol, na husat i laik bekim em laik tasol.

**Kaiko Jicka, na Jasper Akick GOROKA**

## Lowa Wage memba we?

**Dia Edita,**

Mi wanpela manki bilong Enga provins. Mi laik autim wanpela wari i go long provinsal memba bilong mi yet long lukim.

Mi no amamas tru long provinsal memba bilong Lowa Wage konstituensi. Em i save tingim em yet na ol pipel bilong em nogat tru. Nau yet em i maritim planti meri, bikos em i gat nem. Dispela nem o namba em mipela ol pipel i givim em. Tasol memba i no save tingim dispela.

Wanpela taim em i tok nogut long mipela long Titip maket. Man, mipela i sem nogut tru.

Mi ting i no gutpela long ol memba i mekim olsem. Yu mas save olsem mipela i stap, na yu stap.

Na tu pasin yu mekim long ol pipel i mas bihainim wok bilong yu. Olsem na rispektim liklik ol grasrut pipel bilong yu.

**Akipe Kly KANDEP-WABAG**

## Noken smok long bas

**Dia Edita,**

Mi wanpela manki Minj insait long Westen Hailans provins. Mi laik autim wari bilong mi i go long *Wantok Nius-*

*pepa* long ol man husat i save smok insait long bas i ken lukim.

Pasin bilong smok insait long bas i no gutpela. Ol kain manmeri olsem i nogat rispek long ol arapela pasin-dia husat i sindaun klostu long ol.

Plis yu husat man i save mekim kain pasin olsem i mas tingim olsem em i no haus bilong yu. Planti manmeri i save kism sik kensa, bikos ol arapela pik na dok i stap i nogat rispek long ol gutpela manmeri.

Em tasol liklik bel hevi bilong mi.

**Thomas Burum MINJ**

## Manui bas mas stapim so op

**Dia Edita,**

Mi wanpela manki Begesin long Madang provins. Mi laik komplem long pasin mi lukim long Manui bas long Madang na Lae haiwe.

Bas bilong Manui i save mekim planti so op pasin long ai bilong mipela long Madang. Olsem na mi laik askim em long stapim dispela kain pasin.

Ol so op pasin bilong Manui bas i mekim mipela i belhat pinis. Olsem nau mi tokaut long em i mas lusim, na ran isi tasol long wok mani bilong em.

Em tasol na husat i laik bekim em laik tasol.

**Jose Marri MADANG**

**Dixon Bunn MADANG**



Painim gutpela pren

Nem: Joseph N. Moroka  
Krismas: 22

Adres: Catholic Mission Warapu, P.O. Box Aitape, Sandaun Province.

Hobis: Mi save amamas long pilaim kain kain spot. Na tu long mekim ol samting olsem wok sios, makim wok long pepa wantaim pen na pensel (art & craft), lukim vidio, raitim leta ma raun wantaim ol poroman.

Mi bai i amamas long bekim olgeta pas.

**Dia Edita,**

Mi wanpela manki bilong ples Undiapu long Pangia, Sauten Hailans provins, tasol nau mi stap long Ramu Suga.

Mi painim yet wanpela gutpela pren bilong mi. Nem bilong em Nelson John Kumuna.

Em i bin stap long Moem Bareks long Wewak. Tasol wanpela yia i go pinis, na mi no save wanem hap em i stap nau.

Sapos yu lukim dispela pas orait, rait i kam long dispela adres aninit:

Vincent Tokopa, Stores Section, Ramu Sugar Ltd, Box 2183-Gusap, Morobe Province. Phone: 44-3291/3299 EXT: 154.

Husat wantok i lukim dispela toksave orait, plis toksave long em.

Nem: Mark Tuai

Krismas: 20

Adres: Box 393, Badili-NDC.

Hobis: Mi wanpela boi bilong Rigo long Sentrel provins. Mi laikim wanpela meri olsem pren bilong Niugini Ailan (NGI) rijon. Meri ya mas i gat 20 krismas, na tu i bilong SDA sios olsem mi.

Mi save laikim long pilaim ol bal gem olsem soka, ragbi, basketbal. Na tu save amamas long mekim ol arapela samting olsem harim lotu singsing, rit na raitim leta long ol wantok na pren.

## Ol meri Okapa, maski bringim sem

**Dia Edita,**

Mi wanpela manki Okapa long Isten Hailans provins, tasol nau mi stap long Madang taun.

Mi laik komplem long ol meri Okapa husat i save kam long Yonki na giaman paul wantaim ol Korja wokman.

Taim ol i go bek long ples, ol i gat bel na karim ol wait skin pikinini. Dispela pasin i save givim sem long mipela ol manki wantok. Bikos mipela ting ol i go long Yonki long stap gut wantaim ol wantok.

Yupela ol meri i mas sem long dispela pasin. Na go stap gut long ples wantaim papa mama bilong yupela.

Em tasol na husat i laik bekim em laik tasol.



***BENSON***  
*and*  
***HEDGES***



*Government Warning  
Smoking is Dangerous to Health*


# Liklik boi na ol wara bilong Goroka,

BIPO tru wanpela meri wantaim liklik brata bilong em i stap long wanpela ples antap long maunten Otto long Goroka.

Antap long dispela maunten i no gat wara bilong waswas, dring o kukim kaikai long en. Tupela i save kaikai kaukau nating wantaim pipia bilong paia. Wanpela gutpela moning tupela i sindaun hatim baksait long san i stap na tupela i lukim smok i kamap long Lufa.

Taim tupela i lukim dispela smok sista bilong em i salim liklik brata bilong em long go daun na lukim husat man i wokim dispela paia. Pastaim long liklik barata i wokabaut, susa bilong em i pasim rop long han bilong em na tokim em long wokabaut i go. Biu ya i putim wanpela hap gras long het na sisti i go daun long maunten. Taim em i kalap long baret, gras long het i tanim i go blak. Liklik boi i wokabaut isi tasol i go kamap long ples we smok i kamap long en. Taim em i kamap klostu em i lukim wanpela hul na wokabaut i go long sut i kam ausit long en. Em i kalap i go daun long dispela hul na wokabaut isi tru i go insait. Insait long dispela hul i gat planti bun bilong ol man i slip nabaut i stap.

I no long taim em i lukim wanpela lapun meri i sindaun long kona i stap. Lapun meri i lukim em na askim, "Tumbuna yu kam painim wanem



long dispela hap." Manki i tokim lapun meri ya. Mi tupela sista bilong mi i no gat wara, olsem na mi lukim smok bilong paia na mi kam long askim long wara.

Hariap tru lapun meri i go pulamapim wanpela sotpela na longpela mambu long wara na givim dispela boi. Em i tokim liklik boi ya long wokabaut i go hariap bikos tumbuna man bilong em i save kilim na kaikai ol man. Em i tokaut long wanem samting em mas wokim long tupela mambu ya. Insait long longpela mambu em i pulamapim ol binatang. Na sotpela em i pulamapim tru

wara bilong manki ya long dring na i go long susa bilong em.

Long rot manki i pinisim wara long sotpela mambu. Longpela mambu i stap yet. Taim em i kamap klostu long haus em i bagarap gen long wara na opim long dring. Taim em i opim ol binatang i kam ausait na bagarapim stret maus bilong trangu liklik boi ya.

Em i tromoi wara na singaut bikpela stret. Em ranawe i go long susa bilong em na tokim em olsem ol binatang i kaikaim em. Long nait tupela i slip i stap na harim pairap bilong wara long sait bilong

tupela. Taim ol i kirap long moning tupela i lukim wanpela bikpela wara i ron arere long sait bilong maunten.

Tu i no wanpela han wara tasol bikos taim liklik boi ya i tromoi mambu wara i kapsait na bruk i go long 5-pela hap. Long Maunten Otto em wara Hao yet. Ol arapela 4-pela em wara Bena Bena, wara Asaro, wara Kotuni na wara Zogizo. Tupela i amamas stret long ol i gat bikpela wara bilong dring na waswas long en. Nau yet ol dispela wara i helpim planti manmeri long Goroka long waswas, dring na kukim kaikai long en.

**Hani Evati Jomino GOROKA**

## Fektori bilong swit kaikai i kamap

TUPELA gutpela dring insait long olgeta tropikal kantri Sugakein na Todi bai sevim foren eksens na stapim liklik kantri ya long baim vinegar long arapela kantri.

Sugakein i groa

bikpela stret long olgeta hotpela kantri long solwara bilong India. Wankain tu long Todi. Tupela dring ya i moa gutpela long ol arapela dring olsem kokonat.

Nau tupela dring bai i senisim vinegar long


fektori bilong em. Dispela fektori i statim operesen long Epril. Fektori i kamapim 6-pela wok bilong ol man husat i stap insait long kantri ya.

Fektori i wokim sampela swit kaikai olsem

pikols na Chutni. Na tu long ol arapela frut bilong bus. Fektori ya i bringim planti mani bilong kantri taim em i stat operesen long Epril.

Fektori i wokim moa long 100 kilogram vine-

gar na 50 kilogram pikols na chutni insait long olgeta de. Dispela em i inap stret long populesen bilong dispela kantri. Fektori i kism wok helpim long Teknikol Industrial Yunit bilong Komonwelt.



**Skul bilong lukautim bus:** Tupela saveman bilong Melanesian Envrionmen Faundeses, Topa Hersley na Julius Booyer. Tupela i sindaun wantaim ol studen na pipel bilong ples Balimo i welkamim tupela. Tupela i soim ol vidio muvi na skulim pipel long wanem kain bagarap i ken kamap long bus graun sapos ol timba projek i kamap.



□ WANPELA dokta i raitim kat bilong ol sikman na meri i stap. I no longtaim na em lukim olsem wanpela susa i no sindaun gut. Em kirap tasol na tokim olgeta arapela sikman, meri na pikinini i sindaun i stap olsem, "Ating em inap nau. Bilong wanem, sik bilong yupela i winim mi pinis."

**Yurex Malkus, Lae, Morobe provins.**

□ WANPELA Wabag i pilai ragbi long Lae na ol birua i bamim em stret long bros. Boi nogut kism taim na wokabaut i kam ausait long fil na go stret long kosa bilong em. Em tokim kosa olsem, "Playing is important or life is important? Here's your jersey and bring my shirt. Never play rugby in my life." Bai kros na tekov lusim fil.

**Yurex Malkus Lae, Morobe provins.**

■ Wanpela taim long skul, wanpela manki Sepik i stap. Sampela turis i kam na tokim Sepik ya i kalap wantaim ol long ka. Ol i laikim bai em i soim ol long ples.

Ol i tekov na long hap rot wanpela Turis meri i laitim smok. Gawi i lukim na i bagarap tru long smok. Klostu Misis i laik tromoi hap smok na Gawi i no wet.

"Masta! Masta! Masta! One smoking is floating over here!" Turis meri i kirap na givim tupela long em. Tasol Gawi i nogat masis long laitim. Em i askim Misis gen, "O Masta! Masta! I forgot. One masis too is floating over here too quickly."

Ol arapela Turis i harim olsem na i lap nogut tru. Tasol Gawi no wari long ol. Em mekimsave long pamim smok i stap.

**Rumex Saringnuc Ramu Sugar**

□ Wanpela foitnait, sampela wokman bilong Pogera i go long Hagen taun, na i baim wanpela nupela Toyota Land Cruiser ka. Bihain ol i baim sampela katen bia, na spak raun long ka. Klostu tudak na ol i givim siksti i go bek long Pogera.

Long hap rot, ol i lukim wanpela bikpela haiwe ka (mek) i kam. Rait lait bilong dispela haiwe ka i bagarap. Olsem na em i yusim lep lait tasol.

Ol lain long ausait i lukim na pasim tok pinis. Na wanpela i tokim draiva olsem, "Draiva! Rausim motobaik ya i go arere." Na draiva i bekim, "Pasim maus bilong yupela! Mi save pinis longtaim yet."

Tasol abrus long pamim motobaik, ol i salim kaikai stret long dispela haiwe ka. Nupela Toyota Land Cruiser i no winim wanpela de yet na i bagarap.

**Daniel Yokowai Kairiru Ailan WEWAK**

■ Wanpela man Sepik i kirap long bikpela moning tru, na i wokim paia i stap. Kas ya i no save olsem dok bilong em i kam sindaun arere na pekpek i stap.

Em winim paia i go na hap paia i kalap na kukim han bilong em. Em painim wara stret long kolim han bilong em.

Em i tanim na putim han antap stret long pekpek wara bilong dok, na i tok, "Tenkyu tru Kapitano! Mi ting pinga bilong mi bai i lus, tasol yu yet i gat save na olgeta pinga i orait tasol."

**Tonnie Mall Ramu Sugar**

□ Wanpela manki Sepik i sindaun i stap long haus na wanpela waltman i draiv long ka i kam. Waltman i lukim manki Sepik ya na i stap na askim long tok Inglis, "Did you see the electrician going up there?"

Manki Sepik i kirap na bekim olsem, "Yes! They is going antap to the big bush. Why not you ask for? Come on pack off and going for good!"

**Jay Mixson Leo BIALLA**





# Pacific Gold MUSIC

NAMBAWAN 24 TRACK REKODING STUDIO INSAIT LONG PACIFIC

## Tripela Papua Niugini kirapim das wantaim Australia

FRANCIS ULIAU i raitim

TRIPLEA biknem musik man bilong Papua Niugini husat i bin go pilai long Australia i kam bek pinis long las wik.

Dispela tripela man em Ben Hakalitz wantaim Pius Wasi bilong *Tambaran Culture* grup long Mosbi, na George Telek Mamua bilong *Maop* stringben long Rabaul. Ol i bin lusim kantri long 7 Epril na kam bek long Trinde 16 Me long las wik tasol.

Ol tripela musik man ya i bin go na pilai long kain kain konset long Nu Saut Wels, Viktoria, Kenbera na Tasmania wantaim wanpela lektrik ben, *Not Drowning Waving* (NDW). Dispela ben bilong Australia i bin kam pilai bipo long Papua Niugini na katim wanpela kaset bilong ol "Tabaran" wantaim Telek long Pacific Gold Studio long Rabaul. Insait long dispela kaset, Telek i bin singim tu sampela singsing.

Namba tu taim gen em NDW i bin kam long Papua Niugini em long dispela ya tasol aninit long 1991 Kalsarel Rilesens Program bilong Australia Hai Komisn long Papua Niugini. Long dispela taim tu, NDW

i bin amamas tru long kain stail bilong Pius na Ben long wokim musik. Olsem na ol i askim ol tripela long go raun pilai wantaim ol long Australia.

Pacific Gold Studio bilong Papua Niugini i bin helpim long saptim wokabaut bilong ol dispela tripela man.

Wokabaut bilong ol tripela i bin karamapim olgeta hap bilong Australia. Tasol dispela wokabout i no go nating. Ol i raun aninit long kontrak bilong pilai wantaim *Not Drowning Waving* wanpela taim long olgeta nait. Dispela i min olsem ol i no inap long pilai namba tu taim wanpela narapela ben. Na tu, ol dispela tripela man i pilai aninit long ol musik lo bilong Australia.

Bikpela as tingting bilong ol tripela long go na pilai raun long Australia em long autim stall na musik bilong dispela kaset bilong NDW em ol i bin katim wantaim Telek long 1988.

Na long Sidni na Melbon, olgeta stua i salim ol dispela kaset bilong ol.

Mausman bilong ol tripela ya, Pius i bin tok bihain long ol i kamap long kantri

long las wik olsem kain stail bilong musik em ol i autim wantaim *Not Drowning Waving* i narakain olgeta. "Olsem na wanem hap mipela i go pilai long en, bikpela lain manmeri na pikinini tru i save bung."

Em i tok long stail bilong musik yet, Australia i bikpela moa long Papua Niugini. Bikos ol i gat lo i karamapim olgeta wok bilong musik. Tasol long Papua Niugini i no gat. Long Australia yet, musik i stap olsem namba tu bikpela bisnis bilong pulim mani.

Hakalitz i tokaut tu olsem wanem samting em NDW i mekim long askim ol tripela long go pilai i gutpela tru. Bikos long dispela pasin, "mipela i bungim tupela musik na kaisa wantaim."

Em i tok, "Ol dispela lain i no save long dispela kain stail bilong yusim mambu flut na garamut bilong putim sam-pela ekstra pairap insait long musik. Tasol taim mi, Pius na Telek i mekim olsem mipela i winim laik na ai bilong planti pipel long hap."

Telek yet i bin singim planti singsing bilong em long hap. Tasol dispela poro bilong Toro na man bilong kakaal buai i bin



• Tripela biknem musik man bilong Papua Niugini husat i bin go long Australia i malolo bihain long wanpela konset. Sanap wantaim ol em bos bilong Pacific Gold studio long Papua Niugini, Greg Seeto. Lephani go long raitan em Ben Hakalitz, Greg Seeto, George Telek Mamua na Pius Wasi.

kalap nogut liklik long wanpela samting em i lukim. Long taim ol tripela i sanap holim ol samting bilong pilai ol singsing, ol yangpela man na meri i no inap sindaun. Olgeta i save sanap na meknais wantaim pairap bilong musik na singsing.

"Maski mipela i wok long givim ol singsing bilong mipela long tok ples olsem wanpela bilong mi yet na narapela bilong Pius long tok ples Cham-

bri, ol dispela lain i harim tasol tok ples na ol i samsam pinis." Telek i tok.

Long taim ol i go kamap na namba wan nait bilong pilai, Telek i bin stap isi liklik. Tasol long namba tu nait na i go long olgeta 6-pela wik em ol i stap long Australia, Telek i no sarap na stap isi moa. Em i bagarapim stret ples long hap.

Tasol long lukluk bilong ol tripela, wanpela bikpela wok bilong Papua Niugini

long musik i stap yet. Olsem Pius i tok, "Mipela i mas putim nau singsing na musik bilong ol tumbuna i kamap ples klia. Na dispela ol musik na singsing i mas kisim ples bilong roken rol. Wankain tasol long wanem samting ol Afrika i mekim long *reggae* musik." Pius i tok.

Long lukluk bilong ol tripela, planti yangpela manmeri na ol lapun tu i save laikim kain musik na singsing bilong Papua Niugini.

Olsem na musik bisnis long kantri i mas go het. Tasol bikpela wok i mas stap long sait bilong ol singsing na musik bilong tumbuna.

Long wokabaut bilong ol, wanpela televisen nius ripota i bin toktok wantaim ol tu long *Channel 9*. Na dispela toktok bilong ol i bin stap wanpela de olgeta. Ol i bin go lukluk raun tu long wanpela bikpela rekoting kampani long hap, Werner Brothers Recording Company.

## EMTV

THURSDAY 16TH MAY, 1991  
6.00 TEST PATTERN AND MUSIC  
6.27 STATION OPEN  
6.30 ITN WORLD NEWS  
7.00 TODAY SHOW  
9.00 STATION CLOSE  
2.12 STATION RE-OPEN  
2.15 MIDDAY WITH RAY MARTIN  
3.30 KIDS KONA  
4.00 FAT CAT  
4.00 PLASTIC MAN  
4.30 TEENAGE MUTANT NINJA TURTLES  
5.00 THE FLINTSTONES  
5.27 EMTV TOKSAVE  
5.29 NATIONAL EMTV NEWS  
5.30 HOME AND AWAY  
6.00 NATIONAL EMTV NEWS  
6.30 A CURRENT AFFAIR  
7.00 NEIGHBOURS  
7.25 EMTV NEWS UPDATE (G)  
7.30 HEY DAD  
8.22 EMTV TOKSAVE  
8.22 EMTV NEWS UPDATE  
8.30 21-JUMP STREET (PGR)  
9.24 EMTV NEWS UPDATE  
9.29 EMTV NEWS MAGAZINE  
9.30 SPORTS ACTION  
10.30 CHARLIE'S ANGELS: "Angels in Love" (PGR)  
11.30 EMTV NEWS (REPLAY)  
11.57 MEDITATION WITH PASTOR WALO ARNI  
12.00 STATION CLOSE

FRIDAY 24TH MAY, 1991  
6.00 TEST PATTERN AND MUSIC  
6.27 STATION OPEN (G)  
6.30 ITN WORLD NEWS (G)  
7.00 TODAY SHOW  
9.00 STATION CLOSE (G)  
2.12 STATION RE-OPEN  
2.15 MIDDAY WITH RAY MARTIN  
3.30 FAT CAT (G)  
4.00 PLASTIC MAN  
4.30 TEENAGE MUTANT NINJA TURTLES "Turtles Track"  
5.00 THE FLINTSTONES  
5.27 EMTV TOKSAVE  
5.29 NATIONAL EMTV NEWS BREAK (G)  
5.30 HOME AND AWAY  
6.00 NATIONAL EMTV NEWS  
6.30 A CURRENT AFFAIR  
7.00 NEIGHBOURS  
7.25 EMTV NEWS UPDATE  
7.30 FAMILY TIES (G)  
"Keaton on the Run"  
8.00 AUSTRALIA'S FUNNIEST HOME VIDEO SHOW  
8.22 EMTV TOK SAVE (G)  
8.25 EMTV NEWS UPDATE (G)  
8.30 SPORTS SPECIAL "Rugby League"  
10.24 NATIONAL EMTV NEWS UPDATE  
10.29 EMTV NEWS MAGAZINE  
10.30 CHARLIE'S ANGELS

"Unidentified Flying Angel"  
11.30 EMTV NEWS (REPLAY)  
11.57 MEDIATION  
12.00 STATION CLOSE  
SATURDAY 25TH MAY, 1991  
8.00 TEST PATTERN AND MUSIC  
12.57 STATION OPEN  
1.00 WIDE WORLD OF SPORTS (G)  
5.00 LAVERNE & SHIRLEY (G)  
"Playboy Show"  
5.27 EMTV TOKSAVE (G)  
5.29 NATIONAL EMTV NEWS BREAK  
5.30 SPECIAL: "Rabaul" (G)  
6.00 NATIONAL EMTV NEWS  
6.30 HEY HEY IT'S SATURDAY  
8.22 EMTV TOKSAVE  
8.25 EMTV NEWS UPDATE  
8.30 HAWAII 5-0: "Along came Joey" (PGR)  
9.29 EMTV NEWS MAGAZINE  
9.30 SPORTS SPECIAL "Rugby League"  
11.00 EMTV NEWS REPLAY  
11.27 MEDITATION  
11.30 STATION CLOSE

SUNDAY 26TH MAY, 1991  
8.00 TEST PATTERN AND MUSIC  
10.57 STATION OPEN  
11.00 WIDE WORLD OF SPORT  
1.00 BUSINESS SUNDAY  
2.00 SUNDAY (G)  
4.00 SPORTS SUNDAY  
6.00 NATIONAL EMTV NEWS  
6.23 THE ROAD TO THE 1991 SOUTH PACIFIC GAMES  
6.30 SPORTS ACTION  
7.55 CHIT CHAT WITH SIR PAULIAS MATANE  
8.00 60 MINUTES  
8.52 EMTV TOK SAVE (G)  
8.55 NATIONAL EMTV NEWS UPDATE  
9.00 SUNDAY NIGHT MOVIE "The Brave Warrior" (G)  
10.30 EMTV NEWS REPLAY  
10.57 MEDITATION  
11.00 STATION CLOSE  
MONDAY 27TH MAY, 1991  
6.00 TEST PATTERN AND MUSIC  
6.27 STATION OPEN  
6.30 ITN WORLD NEWS

7.00 TODAY SHOW  
9.00 STATION CLOSE  
1.57 STATION RE-OPEN  
2.15 MIDDAY WITH RAY MARTIN (PGR)  
3.30 KIDS KONA (G)  
4.00 PLASTIC MAN (G)  
4.30 TEENAGE MUTANT NINJA TURTLES  
"Enter The Shredder"  
5.00 THE FLINTSTONES (G)  
"Most Beautiful Baby in Bedrock"  
5.27 EMTV TOKSAVE  
5.29 EMTV NEWS BREAK  
5.30 HOME AND AWAY (G)  
6.00 NATIONAL EMTV NEWS  
6.30 A CURRENT AFFAIR  
7.00 NEIGHBOURS  
7.25 EMTV NEWS UPDATE  
7.30 THE GREAT MOROBEEN TV GIVE AWAY GAME SHOW (G)  
8.00 THE YOUNG DOCTORS  
8.52 EMTV TOKSAVE  
8.55 NATIONAL EMTV NEWS UPDATE  
9.00 FLYING DOCTORS (PGR)  
9.54 EMTV NEWS UPDATE  
9.59 EMTV NEWS MAGAZINE  
10.00 SPORTS ACTION  
11.30 EMTV NEWS (REPLAY)  
11.57 MEDIATION WITH

PASTOR WALO ARNI  
12.00 STATION CLOSE  
TUESDAY 28TH MAY, 1991  
6.00 TEST PATTERN AND MUSIC  
6.27 STATION OPEN  
6.30 ITN WORLD NEWS (G)  
7.00 TODAY SHOW (G)  
9.00 STATION CLOSE  
2.14 STATION RE-OPEN  
2.17 MIDDAY WITH RAY MARTIN (PGR)  
3.30 FAT CAT (G)  
4.00 PLASTIC MAN (G)  
4.30 TEENAGE MUTANT NINJA TURTLES (G)  
5.00 THE FLINTSTONES (G)  
"Dino & Juliet"  
5.27 EMTV TOK SAVE (G)  
5.29 EMTV NEWS BREAK  
5.30 HOME AND AWAY (G)  
6.00 NATIONAL EMTV NEWS  
6.30 A CURRENT AFFAIR  
7.00 NEIGHBOURS (G)  
7.25 EMTV NEWS UPDATE  
7.30 THE YOUNG DOCTORS (G)  
8.22 EMTV TOK SAVE  
8.25 PNG WINFIELD LEAGUE 1991  
8.35 THE EQUALIZER (PGR)  
"Beyond Control"  
9.29 EMTV NEWS UPDATE  
9.34 EMTV NEWS MAGAZINE  
9.35 BEYOND 2000 (PGR)  
10.34 EMTV NEWS MAGAZINE  
10.35 CHARLIE'S ANGELS

"Angles"  
11.35 EMTV NEWS (REPLAY)  
12.02 MEDITATION WITH PASTOR WALO ARNI  
12.05 STATION CLOSE  
WEDNESDAY 29TH MAY, 1991  
6.00 TEST PATTERN AND MUSIC  
6.27 STATION OPEN  
6.30 ITN WORLD NEWS  
7.00 TODAY SHOW  
9.00 STATION CLOSE  
3.27 STATION RE-OPEN  
3.30 FAT CAT (G)  
4.00 PLASTIC MAN (G)  
4.30 TEENAGE MUTANT NINJA TURTLES: "Hot Rodding Teenagers from Dimension X"  
5.00 THE FLINTSTONES (G)  
"King for a Night"  
5.27 EMTV TOK SAVE  
5.29 EMTV NEWS BREAK  
5.30 HOME AND AWAY (G)  
6.00 NATIONAL EMTV NEWS  
6.30 A CURRENT AFFAIR  
7.00 NEIGHBOURS (G)  
7.25 EMTV NEWS UPDATE  
7.30 SPORTS ACTION (G)  
10.22 EMTV NEWS TOKSAVE  
10.25 EMTV NEWS UPDATE  
10.30 MEKIM MUSIK  
11.30 EMTV NEWS  
11.57 MEDITATION WITH PASTOR WALO ARNI  
12.00 STATION CLOSE

G - General Exhibition Required AO - Adults Only PGR - Parental Guidance

**WANTOK**

NIUSPEPA BILONG OL PAPUA NIUGINI STRET

**PABLIK NOTIS**

Sapos yu laik advertais, telepon 25 2500 na askim long

MIRI AIORI long Ext 203  
JOHNATHAN BONEPE long Ext 215  
KOSINTO FOSAGU long Ext 216

# OL NUPELA MAK BILONG OL ILEKTORET

Mi laik toksave save long pablik olsem aninit long Seksen 36 bilong Ognanik Lo long Nesenel Eleksens, mipela i wokim pinis ol mep i soim ol dispela ol nupela mak bilong ol ilektoret. Sapos yu laik lukim, yu ken kisim fri long hetkwata bilong Elektorel Komisn long ol Provinsal o Kistrik Iektorel Opis insait long olgeta hap bilong kantri. Sapos yu gat sampela toktok ol senis long mep, yu ken rait long:

The Chairman,  
Electoral Boundaries Commission,  
C/- Electoral Commission,  
P.O. Box 5348, BOROKO  
National Capital District.

Komisn bai lukluk tasol long ol pas em Komisn i kisim stret long Jun 25 o bipo long Jun 25, 1991.

REUBEN TUAKANA KAIULO  
Chairman Electoral Boundaries Commission

## LONG SUPRIM KOT BILONG JASTIS LONG WAIGANI PAPUA NIUGINI SC REFERENCE 1 BILONG 1991

Reference pursuant to Constitution Section 18(2) Concerning the Interpretation and Application of  
Constitution Sections: 18, 19, 34, 44, 45, 53, 54, 55, 57, 86, 248.  
Schedule 2.1 (Recognition etc of Custom)  
Schedule 2.2 (Adoption of a Common Law)  
Schedule 2.3 (Development etc of the Underlying Law)  
Schedule 2.6 (Adoption of Pre-Independence Laws)

**BETWEEN:**

**Wapula Akiye**  
(First Plaintiff)  
**Simon Kambe**  
(Second Plaintiff)  
**Anton Pakena**  
(Third Plaintiff)

**AND:**

**The Hon. Patterson Lowa**  
The Minister for Minerals and Energy  
(First Defendant)  
**Israel Israel**  
the Principal Mining Registrar  
of the Department of Minerals  
and energy  
(Second Defendant)  
**The Independent State of  
Papua New Guinea**  
(Third Defendant)  
**Mt Kare Holdings Pty Ltd**  
(Fourth Defendant)  
**Gaudi Dadi**  
The Acting Government Printer  
(Fifth Defendant)  
**Dibusa Mining Pty Limited**  
(Sixth Defendant)

In accordance with an Order of the Supreme Court of Papua New Guinea dated the 17th of May 1991

**NOTICE IS HEREBY GIVEN THAT:**

1. Wanem man husat i gat amamaslong wanem ol samting i kamap i ken mekim wanpela aplikesen i go long Sas long liv long prosidings long fail i go long Suprim Kot Resistri long Waigani. Dispela em wanpela aplikesen bilong Liv to Inteven long o bipo lgong 31 Me, 1991.
2. Husat man i mekim wanpela aplikesen bilong Liv to Inteven i ken redi long kamap long Sas long kisim kain lip long kain kain taim, namel long failing bilong bilong Aplikesen bilong Liv to Inteven long 17 jun, 1991.
3. Referens bilong yu em ol i no inap harim bipo long 24 jun, 1991.

Gregory Sheppard Warner Shand, Lawyers for the Plaintiffs

**TOKSAVE**

Sapos Kepo Bumbi bilong Bonga viles long Morobe Provins i ridim dispela toksave yu mas rait i kam long dispela adres:

The Share Register,  
Bougainville Copper Limited,  
Mogoru Moto Building,  
(P.O. Box 1274) Port Moresby.

**LAIKIM LAIP PUKPUK**

Mainland Holdings i save baim ol laip pukpuk long OLGETA hap bilong Papua Niugini.


Mipela baim bihainim longpela bilong pukpuk.

Mipela save givim sampela moni long taim mipela kisim ol pukpuk.

Mainland Holdings yet bai lukautim wok bilong redim ol **SAMTING BILONG PASIM NA BRINGIM PUKPUK**. Mainland Holdings bai stretim sata balus long 300 namba pukpuk na igo antap.

Sapos pukpuk i no planti, yu ken salim long Talair, tasol yu mas tok save long mipela pastaim.

Mainland Holdings Pukpuk Fam, **RALPH SIGAP** o **MARK STATON**  
Telipon Namba **42 4322** Fax: **42 1121**.





## OPIS BILONG ILEKTOREL KOMISINA PABLIK NOTIS

### KUNI ILEKOREL ERIA BAI-ILEKSEN-1991

Dispela tok save i go long ol pipel bilong Sentrel provins na i sut moa long ol pipel bilong Kuni Ilekorel Eria (Kairuku) olsem bai-ileksen bai kamap bilong makim nupela memba bilong kisim ples bilong Mista Herman Savura husat i bin dai long Sentrel Provinsal Asembli.

Hia em ileksen program bilong bai-ileksen:-

- |    |                         |                     |
|----|-------------------------|---------------------|
| 1. | Givim aut ol Writ       | Fonde 16 Me, 1991   |
| 2. | Pasim ol Nominesen      | Fraide 31 Me, 1991  |
| 3. | Stat long Kaunim ol Vot | Sarere 22 Jun, 1991 |
| 4. | Kaunim ol Vot i pinis   | Mande 24 Jun, 1991  |
| 5. | Givim bek ol Writ       | Fraide 28 Jun, 1991 |

Ol lain husat i laik resis long dispela sia i ken givim nem bilong ol i go long Ritening Opisa, Allan Kogo long Bereina Distrik Opis pastaim long de namba 31 bilong mun Me, 1991.

Bilong save moa long dispela, toktok wantaim Mista Allan Kogo long Bereina Distrik Opis o Moses Warpulu long Ilekorel Komisn Hetkwata long Boroko long telipon namba: 25 8155

Tok orait i kam long:

R. T. KAIULO  
ELECTORAL COMMISSIONER



INDIPENDEN STET BILONG PAPUA NIUGINI

## SENTREL PROVINS

Provinsal Ileksen (Interim Provisen) Ekt 1978

### TOK ORAIT BILONG HOLIM ILEKSEN BILONG MAKIM WANPELA MEMBA BILONG SENTREL PROVINSAL ASEMBLI LONG KISIM PASTAIM PLES NAU I STAP NATING

I GO LONG: ALLAN KOGO Ritening Opisa  
KUNI Ilekorel Eria

GUTDE:

Dispela i bilong tokim yu long ranim wanpela ileksen aninit long lo bilong wanpela memba bilong Sentrel Provinsal Lejislesa long pulimapim ples bilong Memba bilong Kuni Ilekorel Eria, na mi makim ol dispela de bilong bihainim na holim ileksen:-

- De bilong kisim ol nominesen - 31 Me, 1991
- Namba wan de bilong vot long Ilekorel Eria, ol kendidet bai resis nau long ileksen - 22 Jun, 1991.
- Las de bilong vot long Ilekorel Eria sapos ol kendidet i resis yet long ileksen - 24 Jun, 1991.
- Las de bilong kisim bek ol Writ - 28 Jun, 1991.

Mi bin givim dispela long han bilong mi yet long Mosbi long namba 16 de bilong mun Me, 1991.

REUBEN T. KAIULO  
ELECTORAL COMMISSIONER

## TOK SAVE

### Christian Books Melanesia

Mipela wokim pinis wanpela naispela buk bilong helpim yu kisim save moa long tok kala kala foto na piksa.



Yu ken baim dispela buk long Kristen buk stua long hap bilong yu.

Prata em t  
**K4.95**

He likes to eat  
**RICE** and **TINFISH..**



OH! and he...

SHOPS at major department stores, buys different FOODS, likes SOFT DRINKS, enjoys smoking CIGARETTES, has a family to feed and CLOTHE, sends his kids to SCHOOL, he owns a CAR, has his own HOME, has money invested in a BANK and in his spare time he likes to play SPORT and listen to MUSIC.

OH!.....

and one other thing that advertisers tend to forget - he speaks Pidgin, 90% of the time as his natural language - unlike English!

There are 2,000,000 Others like him in Papua New Guinea!

**WANTOK** The only Pidgin newspaper in PNG



# SOFBAL

## Bomana sofbal i sot long ampaia

### LEO WAFIWA i raitim

OL tim husat i save pilai insait long Bomana op sisen sofbal resis ausait long Mosbi siti mas kamap hariap bipo long taim bilong pilai. Sapos nogat bai yupela i lusim poin long fofit.

Dispela strongpela singaut i kam long wanpela ogenaia bilong dispela resis, Andrew Moi.

Moe i tokaut long dispela wik olsem bihain long em i bungim sampela hevi long ol wik i go pinis. Em i tok planti tim i no save kamap long fil hariap, olsem na ol i save skruim ol gem go long apinun tru.

Moe i tok maski sapos ol ampaia i no kamap yet, ol pilaia bilong tim i mas redi long fil. "Sapos ol pilaia i kamap bihain we ampaia tu i no kamap, dispela tim bai i lusim poin ye long fofit," em i tok.

Long helpim gutpela wok bung bilong resis long go het gut, Moe i askim sapos ol tim i ken kamap samting olsem 15 o 30 minit bipo long pilai i stat.

Long ol arapela samting em Moe i singautim tu ol menesmen bilong asosiesen em ol i makim long "pulim soken" bilong ol na wok bung nau.

Moe i save go pas long ogenaism dispela op sisen resis. Tasol em i askim sapos ol menesmen i ken kamap tu long fil, na helpim long stretim sampela asua.

"Mi wanpela i no inap sanap long fil long mekim olgeta samting," Moe i tok.

Moe i tok olgeta tim i save bringim hevi bilong ol i go long em. Long sem taim em i save lukautim sampela pilai, em bai tingting gen long stretim ol hevi bilong tim. Olsem na em i nogat inap taim tru, na i askim long helpim nau.

Bikpela askim bilong Moe i go nau long ol menesmen long soim

pes long fil, na givim sampela helpim. Bikos em wanpela i no inap long mekim olgeta wok.

Na ol pilai bilong las wiken i bin kamap gut tru, we nogat trabel samting i kamap long bagarapim. Tasol wanpela hevi bilong asosiesen nau em i nogat inap ampaia bilong lukautim ol pilai.

Dispela i bin wanpela bikpela hevi liklik. Long dispela as na ol gem bilong tupela wik i go pinis i bin stat bihain liklik long taim ol i makim long dro.

"Ol tim i save kamap hariap, tasol i nogat ampaia gen bilong lukautim ol pilaia," Moe i tok.

Moe i tingting nau long askim wok bung bilong sampela ampaia bilong Mosbi Sofbal resis. Dispela em long karimaut wanpela ampaia kos antap long Bomana.

Na ol mama husat i laik helpim long kamap ampaia i ken kamap long kos ya. Dispela bai givim ol liklik save long lukautim sampela gem. Na bai daunim hevi bilong sot long ampaia.

Moe i no mekim wanpela samting yet long dispela. Tasol ating em bai i lukim tu Nesenel Kapitell Distrik Komisen

spot opisa, Jackson Sarea sapos em i ken givim sampela helpim.

Sapos dispela i kamap, ating em bai i wanpela gutpela helpim tru long mekim resis i go het gutpela.

Bomana op sisen sofbal resis i bilong ol meri na pikinini meri bilong plis na woda insait na ausait long Mosbi siti.

Ol mama na pikinini husat i save pilai insait long dispela resis i kam long ol bareks olsem Kila, McGregor, Bomana na Gordens.

Gem bilong ol i save kamap long olgeta

Sande.

I gat bilip olsem planti gutpela gem bai i kamap long dispela wiken. Long ol dro bilong dispela wiken (lukim dro), gutpela gem bai i kamap namel long McGregor 1 na CIS, Kila 1 na Kila 2, Bomana 1 na Kila 3 na McGregor 4 na McGregor 3.

Moe i makim olsem long dispela wiken, Kila 1 bai i gat gutpela sans ong autim Kila 2, Bomana 1 bai i gat sans long nekim Bomana 3, McGregor 4 i gat sans long bagarapim sindaun bilong McGregor 3.

Gutpela strongpela gem bai i kamap namel long ol yangpela meri bilong McGregor 3 na McGregor 4.

Long poin lata nau em McGregor 1 wanyaim Dok Yunit i go pas long lata wantaim 8-pela poin. Bihain long tupela em McGregor 3 wantaim McGregor 2 long 6-pela poin.

Ol tim husat i gat 4-pela poin nai ran bihain em McGregor 4, Bomana 4 na CIS.

Olsem na long gem namel long McGregor 3 na McGregor 4, McGregor 4 bai i gat bikpela laik long autim ol yangpela bilong McGregor 3. Tasol ol i mas sambai gut.

McGregor 3 i gat planti gutpela yangpela meri husat i gat save long pilaim sofbal. Planti bilong ol i save pilai long Mosbi sofbal resis.

Las wiken ol i bagarapim stret sindaun bilong Kila 2, 25-3. Dispela i bin wanpela bikpela "up set" bilong wiken. Olsem na dispela wiken, ol meri bilong McGregor 4 i mas sambai gut. Bikos nogut yupela bai i kisim wankain mekimsave.

## Sofbal long PNG i gat longpela rot yet

LONG Septemba 1989, Baselonia (Spen) Olimpik Ogenaising Komiti (COOB) i tokaut olsem sofbal na golp resis bilong ol meri bai i stap insait tu long 1992 Olimpik Gems.

Dispela em long kamap olsem ol nupela spot we ol arapela kantri husat i no save pilaim bai i lukim. Na tu lainim long sem taim, na mekim i kamap wanpela bikpela spot long wol.

Preiden biong Intanesenel Sofbal Federesen (ISF), Don Porter i harim olsem na i amamas nogut tru. Em i tok. "Dispela bai i wanpela bikpela de stret bilong sofbal."

Long Septemba 1990, Intanesenel Olimpik Komiti (IOC) i no yesa long dispela tokorait bilong COOB. Na i tokaut oldem 1992 Olimpik Gems bai i nogat ol nupela spot.

Porter wantaim ol arapela ISF opisal i no amamas tru long dispela. Tasol ol i pait strong yet olsem IOC i mas luksave long sofbal. Nau yet ol i toktok strong yet olsem IOC i mas larim sofbal resis tu i kamap long 1996 Olimpik Gems.

Tasol IOC bai i i kibung long Jun, 1990 na tokaut sapos em bai i yesa long ol nupela spot olsem sofbal long kamap long Olimpik Gems o nogat.

Nau yet sofbal i kamap olsem wanpela bikpela spot long tupela rijon bilong wol. Long Saut Is Esia i gat bikpela tonamen namel long ol kantri olsem Japan, Saina, Not na Saut Korja, na Tai-

wan.

Dispela sempionsip i save kamap long olgeta ya. Na Filipin Ailan i soim laik pinis long stap insait long 1991 sempionsip.

Long Saut Pasifik rijon em sofbal bai i kamap wanpela bikpela spot long 1991 Saut Pasifik Gems, em Papua Niugini bai i lukautim long Septemba. Na yet samting olsem 8-pela kantri i givim nem pinis long salim tim bilong man na meri wantaim long Gems.

Long intanesenel level em nau yet moa long 70 kantri i save pilaim sofbal. Porter i tok dispela gem sofbal i bin stat long 26 ya i go pinis. Na ISF wantaim ol Amasua Sofbal Asosiesen insait long wol i bin developim dispela gem i kam inap nau.

Papua Niugini Sofbal Federesen (PNGSF) em i wanpela memba bilong Intanesenel Sofbal Federesen.

Presiden bilong PNGSF, Jack Pidik i tok PNG i gat longpela rot yet long go, sapos em i tingting long pilai insait long Olimpik Gems.

Tasol Pidik i tok Federesen bai i tingim strong long salim PNG sofbal tim bilong ol man i go pilai long wol sempionsip. Dispela sempionsip bai i kamap long Manila, Filipin Ailan long 1992.

PNG i bin pilai long wol sofbal sempionsip wanpela taim tasol. Dispela em long Setel, Amerika long 1980.

### BOMANA OP SISEN SOFBAL DRO SANDE 26 ME, 1991.

TAIM	GRAUN	PILAI
12.00pm	G1	McGregor 2 vs Gordons 2
12.00pm	G2	Kila 2 vs McGregor 4
1.30pm	G1	McGregor 1 vs CIS
1.30pm	G2	Gordons 1 vs Bomana 4
3.00pm	G2	Bomana 2 vs Dok Yunit
3.00pm	G1	Kila 1 vs Kila 2
4.30pm	G2	Bomana 1 vs Bomana 3
4.30pm	G1	McGregor 3 vs McGregor 4

### Risal bilong las wiken:

McGregor 3 def Kila 2	25-3
McGregor 2 def Kila 1	17-5
McGregor 1 def Bomana 3	9-5
Bomana 4 def Bomana 2	19-8
Dok Yut def Bomana 1	19-8
McGregor 4 def CIS	17-9

### BOMANA OP SISEN SOFBAL LATA

McGregor 1	8
Dok Yunit	8
McGregor 3	6
McGregor 2	6
McGregor 4	4
Bomana 4	4
CIS	4
Gordons 2	2
Gordons 1	2
Bomana 1	2
Kila 1	2
Bomana 3	2
Kila 2	0
Bomana 2	0



# BENSON and HEDGES

# KOKOPO

Sarere 25 Me, 1991.

Taim	Divisen	Graun	Pilaia	
11.00	U/19	1	Murisi	v M/Yunaitet
12.30	U/19	1	Is Arowe	v Ulasen
11.00	U/19	2	Sapa Koru	v Pascol

## Prima Risev

12.30	P/Risev	2	Murisi	v Pascol
2.00	P/Risev	2	Ulasen	v Is Arowe
4.00	P/Risev	2	Royals	v M/Unaitet
1.00	P/Risev (V/Graun)		PTR	v Bismark

## Primia

2.00	Primia	1	Vimi	v Ulasen
4.00	Primia	1	M/Yunaitet	v Ramu
2.00	Primia (V/Graun)		PTR	v Saut Kos

## Sande 26 Me, 1991.

12.00	U/19	1	Ramu	v Ramu
1.00	U/19 (V/Graun)		Bismark	v Saut Kos

## Wimens

11.00	Wimens	1	Pascol	v M/Yunaitet
11.00	Wimens	2	Royals	v Sapakoru
12.30	Wimens	2	Ulasen	v Saut Kos
1.30	Wimens	2	Bismark	v Is Arowe

## Primia Risev

2.30	P/Risev	2	Ulasen	v Saut Kos
2.00	P/Risev (V/Graun)		Sapakoru	v Vimi

## Primia

2.00	Primia	1	Royals	v Bismark
4.00	Primia	1	Paskol	v Is Arowe



# Hevi bilong pilai graun i stap yet

## MADANG RIPOT

### YAKAM KELO i raitim

OLGETA soka divisen bilong Madang Soka Asosiesen (MSA) i redi nau long go insait long namba tu raun bilong sisen propa resis.

Presiden bilong MSA, Peter Angasa i tok primia divisen bai i pinisim namba wan raun bilong em long 25 na 26 de bilong mun Me long dispela wiken. Na long 1 Jun, bai em i statim namba tu raun bilong sisen propa resis.

Namba wan divisen bai i pinisim gem bilong em long 8 Jun

1991. I gat 4-pela gem i stap yet long pilai insait long raun wan.

Wimens divisen bai i pinisim gem bilong em long 30 Jun, na redi long go insait long namba tu raun.

Anda 19 divisen i gat planti gem i stap yet long pinisim bipo ol i go insait long namba tu raun bilong sisen propa. I gat 6-pela gem i stap yet na 9-pela gem tasol pinis.

Anda 19 divisen i statim gem bilong em bihain long ol arapela divisen, bikos i bin i

gat sampela hevi bipo.

Long dispela taim yet planti gem bilong anda 19 divisen i wok long kamap long namel bilong wik. Bikos ol i mas traun long pinisim gem long taim long bihainim kalenda bilong MSA.

Hevi bilong pilai graun long. Madang i no kamap gut yet. Ol i bin kamap wantaim ol rot long mekim ol pilai i go het. Olsem na ol i makim pilai graun bilong Divine Word

Institut.

Tok i bin orait na ol i wok long yusim. Tasol ol i no stretim ol samt-ing olsem rot bilong pulim mani long dua yet.

Angasa i tok MSA wantaim prinsipel bilong skul i no kamap wantaim tok orait long dispela yet.

MSA i wok long stretim YC pilai graun yet. Angasa i tok i gat hevi tu long sait bilong mani. MSA bai i go het long baim pilai graun

tasol.

Em i tok i gat tripela pilai graun i stap klostu wantaim. Na i moa gutpela long pilaia bilong ol klap i stap klostu wantaim long taim bilong pilai.

Dispela i ken mekim isi tu long ol kosa long i go long wan wan pilai graun na lukim ol pilaia bilong ol. Olsem na gutpela toktok i mas kamap wantaim long MSA na ol papa bilong ol pilai graun.

## Morobe sempionsip bai i kamap long Oktoba

MOROBE Kantri Soka Tonamen bai i kamap long nupela soka stedi-um long Lae. Dispela em long 4-6 Oktoba 1991.

Kodineta bilong Morobe Kantri Soka Asosiesen, Ludwig Peka i tok dispela de bilong tonamen i kisim luksave bilong ol eksekutiv pinis. Olsem na tonamen bai i kamap long dispela

salim afiliesen fi bilong ol i kam insait nau. Ol i mas stat long salim fi long mun Me inap long stat bilong mun Septemba.

Ludwig i tok long Septemba em taim bilong Saut Pasifik Gems. Olsem na olgeta fi i mas kam insait kwik.

Bihain tasol long Saut Pasifik Gems em taim bilong Morobe Kantri long go het wantaim soka tonamen bilong em.

Long dispela taim, Morobe Kantri i makim pinis skwat bilong ol meri long makim Morobe Kantri long nesenel wimens sempionsip long Lae long Jun.

taim. Ludwig i askim olgeta distrik senta husat i save kamap long tonamen long

## Kundiawa makim tim bilong Hailans tonamen

Kundiawa Soka Asosiesen i makim pinis fainal tim bilong em long kik insait long Hailans rijonal tonamen.

Tonamen ya bai i kamap long namba 23, 24 and 25 de bilong mun Me, 1991 long Hagen.

Wanpela bilong ol pilaia insait long dispela tim em kepten bilong Kumul ragbi lig tim, Bal Numapo. Hia em nem bilong ful 20 pilaia tim wantaim 5-pela opisal:

Tupela referi bai i go tu wantaim tim long Hagen.

1. Charles Dick
2. Gerry Chalparin (vais kepten)
3. Tiden Sali
4. Jackson Ishmael
5. Bal Mumapo
6. Harold Bagore
7. Kanawi Pongi
8. Francis Chalparin
9. Kale Kua (kepten)
10. Armstrong Munduga
11. Peter Takimba
12. KHock z John
13. Joe Kure
14. Hua Bucks
15. Jummy Hazook
16. Tuna Kuten
17. Bonny Bibari
18. Newman Yaupe
19. Steven Anton
20. Kerapas Akaris

Ol opisal:

1. Francis Hearo - Team Manager
2. Philimon Amo - Ass Team Manager
3. Manape Nawatuo - Coach
4. Buafee Ilai - Trainer
5. Willie Bagore - Association Official

## Kapindi laikim moa taitel



• Poto bilong Kapindi soka klap long Ramu Suga soka resis.

KAPINDI em i wanpela biknem soka klab long Ramu Suga Soka Asosiesen.

Dispela klab i bin kamap long 1982. Dispela nem Kapindi Rangers em ol i kolim bihain long wanpela maunten ol i kolim Maunten Saruwaget insait long Finsafen distrik bilong Morobe provins.

Bikpelaas bilong dispela klab em long kamapim ol nem namba wan soka pialia bilong Papua Niugini long bihain taim. Na tu long bungim wantaim ol yangpela pilaia insait long

komyuniti.

Ol pilaia bilong klab i kam long kain kain kona bilong Papua Niugini. Na i save pilaim gutpela klinpela stail bilong pilai long apim stended bilong pilai.

Nau yet em klab i stap anit long lukaut bilong Fero Mura olsem tim menesa. Tresera em Aiyus Pini husat i save kosim tu tim. Ekting menesa na seketeri em Harry Sessi.

Bikpela tingting na laik bilong Kapindi soka klab long dispela sisen em long kik insait gren fainal.

## GOROKA SOKA WEEK 5

Saturday 18 Me, 1991.

Taim	Div	Pilaia
9:30-10:40	U/16	1 Makis vs M/United 4
9:30-10:40	U/16	4 Rapatona vs Elcom 1
10:50-12:00	U/19	4 M/United vs PTC 0
10:50-12:00	U/19	1 UNI-TECH vs Kalibobo 2
12:10- 1:20	WN	1 Tarangau vs Uni-Tech 5
12:10- 1:20	WN	0 Kalibobo vs Rapatona 2
1:30- 2:40	First	0 NGI vs M/United 2
1:30- 3:00	First	2 NGI vs M/United 3
2:30- 3:20	First	1 Kalibobo vs Rapatona 2
3:10- 4:10	First	6 Unit-Tec vs Tarangau 1
3:30- 5:10	First	6 Makis vs Elcom 6

Sunday 19 Me, 1991.

9:00-10:40	U/16	1 NGI vs Kalibobo 5
9:30-10:40	U/19	0 Tarangau vs Rapatona 1
10:30-12:00	U/19	1 Guria vs Murat 0
10:50-12:00	WN	1 PTC vs Murat 3
12:10- 1:40	WN	10 Guria vs Elcom 0
12:10- 1:40	First	2 PTC vs Murat 1
1:50- 1:30	First	6 Guria vs Elcom 2
1:50- 3:00	Premier	3 M/United vs Kalibobo 1
3:20- 5:00	Premier	1 NGI vs Murat 2
3:40- 5:20	Premier	0 Guria vs Rapatona 2

## BULOLO FORESTRI SOKA DRO A Gret

Forcol	vs	Momase
BLY	vs	Waks
Faze	vs	Makam
Wagas	vs	Blu Kumuls

## B Gret

Forcol	vs	Momase
Faze	vs	Makam
Waks	vs	BLY
Wagas	vs	Blu Kumuls

## RAMU SUGA SOKA DRO

SANDE 26 Me, 1991.

1.00 pm	Sirinum	vs	Guria	(G1)
1.00 pm	Vampire	vs	Buba	(G2)
2.40 pm	Kapindi	vs	Blue Kumuls	(G1)
2.40 pm	Momase	vs	AIGOB	(G2)
4.00 pm	Luteran Yut	vs	Buresong	(G2)

## Ol tok nogut i ken helpim kosa long stiaim tim

DISPELA tok i go pas em mi laikim bai nesanel kosa, John Peka na asisten bilong em Sau Gure i lukim na skelim gut. Olgeta manmeri i save bihainim soka tu i mas skelim na givim olgeta sapot long tupela.

Bikpela stori bilong Papua Niugini soka em nau i go daun long rekot buk bilong soka hia na long Nu Silan long taim ol meri PNG i lus 16-0.

Dispela em i no samting. Em i bikpela samting tru ya. Dispela em i bikos long taim ol manmeri i givim ol tok nogut (criticisms), kosa bilong ol meri i kirap kwiktam tru na paia bek.

Em i no sindaun isi na skelim sampela long ol dispela tok nogut i gat as o bai inap helpim em stiaim tim: bai inap kik gut. Nogut, long lukluk bilong em, olgeta tok nogut... ol tok nogut tasol. Dispela kain pasin na tingting bilong ol manmeri we ai na tingting bilong ol i stap insait long lukluk tasol. Tok Inglis ol i save tok "two heads are better than one." Dispela toktok i nogut o?

### Opim tingting

Em i mobeta ai na tingting bilong



yumi olgeta i op. Wanem gutpela toktok o toktok nogut i kam, yumi kisim tasol. Bel bilong yumi i no ken kirap kwiktam. Nogut. Yumi kisim, na sindaun wantaim sampela arapela saveman husat inap helpim yumi skelim olgeta dispela toktok. Skelim olgeta wantaim ol aidia bilong yumi wan wan. Orait kamap wantaim wanpela plen bilong mekim wok.

Bai yumi wet na lukim skoa bilong Australia. Sapos em i warkain o em i winim bilong Nu Silan. PNGFA tim i save makim ol kosa i mas skelim skul na save bilong ol yet long pasin bilong makim ol kosa. Sapos ol i no gat skul o save long makim ol kosa, ol i no ken sindaun long mekim dispela wok. Ol i mas kisim wanpela saveman husat inap helpim ol long kisim ol kosa we inap kisim PNG i go long rot we PNGFA i makim.

### Nesanel soka tim

Olsem na long pinisim dispela liklik toktok, mi laikim olsem John Peka na Sau Gure bai i mas gat 'open mind' long wok bilong tupela. Dispela em i min wanem ol gutpela tok a tok nogut tupela i kisim, tupela i mas bel isi na skelim olgeta tok. Bihain orait, tromoi ol toktok we i no inap helpim nesanel tim. Ol gutpela long en, em tupela i ken yusim long stiaim rot i go long winim gol medal long Saut Pasifik Gems.

### Sekyuriti bilong ol referi

Wanem hap yu go long en, i gat taim long ol soka sisen we tingting na bel bilong ol pilaia na ol sapota i save kirap. Na long dispela taim, planti trabel i ken kamap. Insait long soka long PNG, wanem ol asosiesen i gat tupela raun, ol i ken luksave olsem i gat tupela taim we planti ol dispela trabel inap kamap. Em long las tu o tripela gem bilong namba wan na tu raun.

Narapela hap taim we planti trabel i save kamp em long ol fainal. Dispela em tupela taim we mi lukim planti trabel tru i kamp. Planti taim ol referi i save kisim nogut long ol dispela trabel. Wan

wan taim, em ol pilaia na sapota i save kisim bagarap.

### Stapim ol dispela birua

Wanpela we long pasim dispela ol kain birua, em i bilong wan wan asosiesen yet long baim ol sekuriti bilong em long raun long ol taim bilong em, na stapim wanem ol trabel i kamap.

O sapos em i bikpela mani tumas, em i ken baim ol kontrak sekuriti long kam was long ol gem. Tasol, sapos dispela i bikpela mani tumas, em i gutpela long baim ovataim bilong wanem plisman i laik kam mekim dispela wok, na ol i kam na givim wok sekuriti.

Mi tok long baim ol plisman bikos kain pasin bilong askim ol plisman long givim fri sevis i mas stap.

### Mosbi Soka Asosiesen

Insait long wanpela gem bilong Mosbi namba wan divisen long las wiken, wanpela referi i kisim bikpela birua tru long long han bilong sampela Maset pilaia na sapota. Oltaim long kolum bilong mi, mi save apim nem bilong Maset, bikos ol i gat gutpela stail bilong kik.

Tasol long las wiken, ol i soim tu

olsem ol i gat gutpela stail tu long pait. Mi laik salensim ol Maset nau long traime winim han bilong wanem mekimsave yupela bai i kisim. Mi yet bai mi no inap sindaun long ol komiti husat bai i skelim tingting long mekim save. Sapos mi sindaun, bai Maset i no gat nem moa long Mosbi soka wantaim ol pilaia we i gat bikpela save long pait.

Bel bilong mi i pen long tim we mi save laik lukim gem bilong ol oltaim.

Watpo bai ol referi i kam wok 2 na hap aua na kisim tasol K14. Dispela K14 i no inap karamapim insurens bilong wanem kain bagarap ol i kisim.

Sapos yupela ol bikman bilong Mosbi soka o PNGFA i save long we bilong skelim wanem kain wok inap kisim wanem kain pe orait, yupela skelim dispela tok bilong mi.

Sampela long ol dispela referi na mi sapos mipela i yusim dispela 2 na hap aua long mekim sampela arapela wok, mipela inap kisim saming olsem K50 i go inap K100. Mipela i no kam referi long mani. Olsem na PNGFA na PMSA i mas pasim tok long sekuriti insurens.

## Fainal tim i redi

ENGA Soka Asosiesen i makim pinis fainal 18 pilaia tim bilong kik long bikpela Hailans rijonal tonamen.

Tonamen ya bai i kamap long Hagen long dispela wik (Fraide 24 na Sarere 25 Me, 1991).

Hia em nem bilong ol pilaia:

Solomon, J. Wanas, Rueben, J. Kibunki, L. Kiwi, E. Kiwi, L. Neah, Alois, Bagama, K. Yambu, Lai, M. Koyari, Wedea, Arnold, J. Tapi, Martin, A. Jacob, Gaiya (pilaia na tim menesa).

Las trening bilong tim ya i bin kamap long Mande 20 na Tunde 21 Me, 1991. Na long Fonde 23 Me, 1991 tim i lusim Enga i go long Hagen.

Tim i bin trening gut aninit long lukaut bilong kosa Stuart Hayfield, na tim menesa, Gaiya.

Ol pilaia i save olsem ol i gat bikpela wok long mekim. Olsem na ol i givim moa taim long trening.

Sampela pilaia insait long trening tim i no stap long fainal tim.

## Kurti Andra i paia nau

KURTI ANDRA i paia nau long primia divisen soka resis bilong Mosbi Soka Asosiesen (PMSA).

Las wiken long Sande 19 Me, 1991 em i daunim Mobil Sobou 2-1. Las wiken tru em i autim nem tim, Guria.

Long kik bilong las wiken, Kurti Andra i go insait long fil na wan tu umben bilong Sobou i mekim nais. Dispela em long 11-pela minit bilong namba wan hap.

Samting olsem 20 minit bihain, James Kome bilong Sobou i bekim dinau. Tupela tim nau i pas 1-1 inap hap taim.

Long namba tu hap tupela tim wantaim i pilai strong. Tasol Kurti Andra i paia moa na skoa gen. Bihain tupela tim wantaim i strong i go inap ful taim, na Kurti Andra i win 2-1.

Dispela win i helpim Kurti Andra i goap long lata nau wantaim 14 pon olsem Sobou.



## Luship autim Lutheran taitel

LUTERAN Siping Yut (Luship) i kamap top soka tim nau. Dispela em bihain long ol i autim Ampo 3-0 long gren fainal kik bilong Lae Lutheran Yut Soka Tonamen. Prais ol i kisim em wanpela bikpela sil. Ampo i kisim namba 2 prais, wanpela tropi.

Long gren fainal bilong ol meri, ol meri Zia i winim Busu haikul na kisim wanpela bikpela tropi.

Dispela soka tonamen i bin stat long 26 Me, 1991. Na 13 yut grup insait long Lae siti i bin kam bung na

pilai. Long gren fainal bilong ol man, olgeta manmeri i kirap nogut long lukim Lutheran Siping i go insait long gren fainal. Planti i ting Balob, Yaros o Martin Luther Seminari bai i bungim Ampo, husat i winim olgeta gem i go long fainal.

Abrus long dispela, ol Luship husat i nogat biknem, na i no bin mekim planti nois long gem, i sambai pinis long traime bung wantaim Ampo.

Gem i kik op na tupela tim wantaim i luk fit. Faiv minit i go insait long namba wan hap, Luship i karim bal i go long mak bilong Ampo. Tasol ol kandre bilong ol i strong na rausim bal i go bek.

I no longtaim, Robert Suma bilong Luship i lukim spes bilong brukim kiau. Dispela namba wan gol i mekim Dora Dora na Mundi Leon bilong Ampo i stat long banisim gut beklain.

Omex Yowa i lukim olsem na i traime long strongim Elton Zamo long fran, na sanapim strongpela banis long katim ol boi bilong Luship. I no longtaim gen, strongpela banis bilong ol boi Ampo i bruk. Na Zaka Michael i hetim narapela bal i go insait long umben bilong Ampo. Dispela i skruim skoa i go antap 2-0 long hap taim.

Long namba tu hap, pilai i kamap strong moa. Ol boi misen i traime strong long skoa. Tasol ol beklain pilaia wantaim golkipa bilong Luship i sanapim strongpela banis stret.

Dispela taim em ol sapota bilong tupela tim wantaim i sanap nau. Kain kain toktok, singaut na tok pait i wok long kamap. I no longtaim Philip Iha i kikim namba tri gol bilong Luship, na bringim skoa i go 3-0. Ampo i moa sans na inap taim long dro. Dispela skoa i sanap olsem inap ful taim.

Long resis bilong winim namba 3 prais em Yaros i bungim Balob na win 2-0.



• Em kas no gut bilong Golo long Mosbi soka bilong primia risev kik.

# Lae makim tim bilong ol meri

ELIZABETH SOLOMON i raitim

LAE Futbol (Soka) Asosiesen i makim pinis 21 pilaia trening tim bilong ol meri bilong 1991 Nesenel Wimens sempionsip.

Dispela sempionsip bai i kamap long Lae long Kwins Betde wiken (8-19 Jun, 1991).

Hia em nem bilong ol pilaia wantaim nem bilong klab ol i save pilai, na tu wanem posisen ol bai i pilaim insait long sempionsip:

Rose Ratura (Bara-beklain), Rina Otti (Bara-beklain), Rina Dickson (Goro-midfil), Stella Kama (Katolik Yut-fulbek), Sophia Tiagit (Katolik Yut-golkipa), Rendally Lee (Guria-beklain), Zina Kens (Guria-straika), Monesta Sami (Guria-fulbek), Elsie Nani (Guria-fulbek), Freda Peka (Yunivesiti-midfil), Christine Samase (Yunivesiti-fulbek), Emma Kamake (Yunivesiti-straika), Oubo Asabi (Borabora-fulbek), Penina Maiyu (Borabora-fulbek), Helen Mare (Faze-straika), Rinas Saun (Poru-midfil), Catherine Ewa (Faze-golkipa), Naing Dimi (Poru-golkipa), Singen Bosuke

(Borabora-straika), na Monica Hakalitz (Faze-straika).

Asisten kosa, Bengen Warry i tok em bai i katim daun tim i go long fainal 18 pilaia. Em bai sekim gut ol pilaia. Na sapos sampela i gat bagarap o hevi, dispela bai i helpim em long katim tim i go daun.

Nau yet tupela pilaia bilong tim, Singen na Monica i stap long nesenel tim, na pilai long Osenia Wimens sempionsip long Australia. Sapos tupela i bungim bagarap long taim ol i kam bek, tupela i no inap stap insait long tim.

Warry i tok i gat planti yangpela na nupela pilaia insait long tim. Wanpela bilong ol dispela pilaia em yangpela Daisy Otti.

Warry i givim strongpela tok lukaut olsem ol arapela senta i mas lukaut gut long ol 4-pela meri olsem Zina, Susie, Helen na Daisy. Ol bai i wok strong long sanapim strongpela banis.

sempionsip bilong las yia i bin kamap long Hagen. Na Mosbi i bin winim egensim Lae. Olsem na ol i gat bikpela laik long bekim dinau, na winim bek Nesenel Wimens taitel.

Lae i bin winim dispela taitel bipo long 1989.



• Golo i laik mekim sait kik tasol Morobe Yunaitet i stapim em long wiken gem bilong primia risev resis long Mosbi.

# Kokopo soka askim PNGFA long sapot

YAKAM KELO i raitim

KOKOPO Soka Asosiesen (KSA) i askim nau Papua Niugini Futbol Asosiesen (PNGFA) long luksave

long ol liklik soka senta insait long kantri tu.

KSA i tok sapos PNGFA i laik kirapim na strongim soka insait long ol liklik distrik na senta tu orait em i mas lukluk tu long ol. KSA i tok insait long Kokopo,

pilai i save go moa na planti manmeri i save bung gut tru long pilai.

Wanpela mausman bilong Kokopo Soka Asosiesen, Mathew Bala i tok insait long Kokopo eria, ol manki i save pilai soka long

viles level yet.

Ol i save mekim nat-ing wantaim ol raun samting olsem muli. Mathew i tok asosiesen i luksave long dispela samting, na i laik stretim tasol em i sot long planti samting.

Mathew i askim PNGFA long i mas tingim ol na kamapim ol skol bilong referi na kosa long ol liklik senta tu.

Em i tok planti liklik senta i no klia yet long ol nupela lo na rul bilong soka nau i wok long kamap. Olsem na PNGFA i mas tingim na kisim ol dispela senis i go skulim tu ol asosiesen long ol liklik senta.

Long Kokopo, ol manmeri i soim bikpela laik bilong ol tru long pilai soka long olgeta yia.

Planti tim nau i wok long pilai i kam long ol wokman bilong ol plantesin long Kokopo.

Mathew i tok Kokopo Soka Asosiesen i bin afiliet pinis wantaim PNGFA, tripela yia i go pinis. Olsem na PNGFA i mas lukluk na helpim ol tu. PNGFA i no ken tingting long ol bikpela senta tasol bikos ol lain long liklik senta i laik pilai soka tu." em i tok.



• Pilaia bilong Golo i makim pinis hap bilong kikim bal i go. Morobe Yunaitet i kam bihain tasol bal i go pinis.

# Inta Siti bai kilim soka long PNG-Pohai

PLANTI soka opisal insait long Papua Niugini i kempen nau long kirapim gen Inta Siti soka resis. Tasol long sem taim, sampela opisal i no sapotim dispela aidia.

Wanpela bilong ol dispela opisal em wanpela nem soka sapota insait long Mosbi. Man ya em Mathias Pohai. Mathias i singautim nau PNGFA long noken luksave long askim bilong Inta siti resis.

Bel bilong Mathias i bin paia stret taim em i ritim long *Wantok Niuspepa* bilong las wik olsem Mosbi kosa, Kolis Pombuai i sapotim dispela tingting bilong nesenel kosa na Lae Futbol Asosiesen presiden, John Peka. Em i paia i go insait long opis bilong *Wantok Niuspepa* na autim tingting bilong em.

Em i bekim olsem dispela resis bai i kilim indai soka long Papua Niugini.

"Mi no save long wanem ol man i kam aut ples klia na toktok nau long soka. Long 1963, wanpela yangpela boi mausgras i no kamap yet i makim PNG na pilai long Saut Pasifik Gems long Suva,

Fiji. Em mi ya, Mathias Pohei.

"Mipela i bin lukim long bipo olsem kain sistem bilong inta siti soka resis i no gutpela. Olsem na mipela i senisim," em i tok.

Mathias i tokaut olsem dispela sistem i no gutpela bikos ol nem senta tasol bai i kisim helpim. Na ol arapela senta liklik nogat. "Ol liklik senta olsem Vanimo, Wewak, Manus na Goroka i gat planti gutpela pilaia. Sapos mipela i kirapim inta siti resis, dispela bai i no inap gutpela long ol liklik senta," em i tok.

Em i tok dispela em sistem bilong bipo (colonial system). "Bai i gat gutpela nesenel seleksen long Nesenel Klab sempionsip na PNGFA Kap taitel wantaim ol arapela nesenel sempionsip olsem bilong anda 20, 16 na 19.

"Bikos olgeta senta bai i gat wankain sans long lukim pilaia bilong ol insait long tim," em i tok.

Narapela samting em Mathias i makim olsem nesenel tim aninit long lukaut bilong nesenel kosa, John Peka bai i nogat gutpela sans long winim gol medal long 1991 Saut Pasifik Gems.

# Wewak redi long Somare Sil

LEO WAFIWA i raitim

WEWAK Soka Asosiesen i redi nau long lukautim bikpela tonamen bilong Somare Sil. Dispela tonamen bai i kamap long Rimeterens De lgong Julai 22, 23 na 25, 1991.

Nau yet 12-pela tim i givim nem pinis long kik. Long ol dispela tim em tupela i bilong ausait provins. Nem bilong tupela em Guria tim bilong Tabubil, na Medics tim bilong Mendi.

Ol arapela tim husat i givim nem pinis i bilong Is Sepik provins yet.

Bikpela askim i go nau long ol ausait tim long givim nem hariap, sapos ol i laik kik long tonamen ya. Bikos ol opisal i laik painimaut hariap namba bilong tim na mekim dro.

Wanpela opisal, David Pandi i tok olgeta tim i mas baim K180 membasip fi long kik. De olgeta tim i mas baim dispela fi em bipo long neks wik Fraide 30 Me, 1991.

Dispela tonamen i save kamap long olgeta yia. Na Foren Afeas Minista na Rijonel Memba bilong Is Sepik,

Sir Michael Somare i save sponsorim ol prais mani wantaim wanpela bikpel Sil.

Resis bilong dispela yia bai i gat ol arapela prais tu. Mani bilong baim ol dispela prais bai i kam long K180 membasip fi em wan wan tim i baim.

Wewak Soka Asosiesen yet i pinisim olgeta kik bilong namba wan raun long las wiken. Namba tu raun bai i stat long narapela wiken. Dispela wiken bai i nogat kik.

Long poin lata bilong primia divisen em nem tim bilong Wewak soka resis, Wewak Yunaitet i stat paia gen long dispela sisen. Em i goap pas long lata wantaim 12-pela poin.

Bihain long Wewak Yunaitet em ol arapela tim olsem Tarakum wantaim 10-pela poin. Tupela tim husat i ran bihain long Tarakum em Medics na Sunam. Tupela wantaim i gat 5-pela poin.

Bikpela askim i go nau long olgeta klab na tim long baim K250 afiliesen fi wantaim K5 pilaia resistresen fi



# GFC bai i autim ol boi Westpac

Em taim bilong ol yangpela nau!



• Tupela kas bilong Mosbi junia soka resis i givim stret long Difens soka graun las wiken. Planti kain stail olsem bai i kamap long dispela wiken. Poto Ivan Bayagau.

### YAKAM KELO I raitim

OL BOI bilong Westpac bai i traim hat moa long daunim namba tu lida, GFC long bikpela primia divisen kik bilong Mosbi soka resis dispela wiken.

GFC i bin pilai strong tru long bipo i kam, na i sindaun nau long naba tu ples long poin lata. Ol pilaia bilong em i save givim strongpela gem stret long husat tim i salens wantaim em long Bisini Graun.

Wantaim go pas bilong eksperiens strai-ka olsem John Porove, GFC i no save abrus long skoarim gol. Olsem na wanem birua em i bungim nau i mas sambai gut tru.

Westpac i mas redi gut bipo em i bungim GFC.

Wanpela sik bilong Westpac em planti soka manmeri i save em, Westpac i save strong na kisim gutpela bal long beklain i go antap long fran lain na skoa. Tasol long fran lain, ol fowat pilaia i no save yusim gutpela

dispela bal long skoa.

Dispela em wanpela samting Westpac i mas stretim nau. Em i mas traim long painim ol gutpela fowat pilaia husat i ken pinisim ol "muv" bilong beklain.

Olsem na long midfil, David Geame wantaim Moni Kalong i mas bungim tru tingting wantaim. Na givim ol gutpela bal long John Tutumang long fran lain.

Tupela yet i mas stap klostu tu long John Tutumang. Na sambai long kisim ol bal em beklain bilong GFC i autim.

Beklain bilong West em i wanpela strongpela long Mosbi long bipo. Wantaim go pas bilong intanesenel pilaia, Paulo Sawo long swipa posisen, ol strai-ka bilong GFC i mas traim hat moa long brukim kiau.

Westpac i gat nem tu long stapim planti nem tim i win long bipo. Olsem na GFC i mas pilai strong moa liklik sapos em i laik autim

GFC. Nogat bai tupela tim i dro 1-1 o 2-2.

Olgeta manmeri i save olsem GFC bai strong nau long holim namba tu ples bilong em. Bikos em i pait strong tru i kam antap na kisim dispela ples.

Long ol arapela gutpela primia divisen kik bai yu lukim Rapatona i bungim Golo i mas strong bikos Rapatona i tingting long winim ol pilai bilong em i kamap yet.

Guria i mas traim long autim Verave. Bikos em i bin kisim bikpela taim pinis long han bilong Kurti Andra. Sapos em i luk daun long Verave, bai Verave i mekim nais long umben bilong em olsem Kurti Andra i bin mekim.

Yunivesiti bai i bungim Kurti Andra. I gat bilip olsem dispela gem bai go wansait liklik.

Sapos Kurti Andra i ken pilai wankain gem em i bin pilai egensim Guria long win, ating Yunivesiti i mas rere gut.

• Madang bungim hevi bilong fil ..... p21  
• Wewak redi long Somare Sil kik .... p23

SOFBAL RIPOT - PES 20  
- Bomana sofbal sot long ampaia

### Port Moresby Football (Soccer) Association Inc Premier Division Ladder 22/05/1991

Division	Played	Win	Draw	Lose	Goals For	Goals Against	Points
University	11	7	2	2	30	11	23
GFC	11	6	5	-	20	8	23
Amalpak MU	11	6	2	3	20	22	20
Rapatona	11	4	5	2	18	9	17
Guria	11	4	4	3	17	14	16
Mobil Sobou	11	4	2	5	27	24	14
Kurti-Andra	11	4	2	5	17	21	14
Golo	11	4	1	6	20	19	13
Westpac	11	3	4	4	15	17	13
B/Kumuls	11	4	1	6	15	22	13
T. Defence	11	2	3	6	17	20	9
Verave	11	2	1	8	13	32	7

### First Division Ladder 22/05/1991.

B.F.C	11	2	1	2	18	9	25
Bao-Mitas	11	7	3	1	28	14	24
Koupa	11	6	4	1	25	11	22
Air Niugini	11	6	3	2	19	13	21
Kula	11	4	4	3	19	16	16
Maset	10	4	3	3	21	22	15
Milne - Bay	11	4	1	6	16	20	17
Tarangau	11	3	3	5	16	21	12
Nali	11	3	3	5	9	18	12
S.T.C	11	1	4	6	17	22	8
Buresong	10	2	2	6	14	24	8
Wanzesi	10	1	2	7	12	22	5

### Second Division Ladder 22/05/1989

Korion	11	8	1	2	30	15	25
Lesegu	11	7	4	-	18	6	25
ML Obree	11	8	1	2	26	18	25
Amazon Bay	11	6	3	2	34	19	21
Wanzesi	11	6	2	3	29	11	20
Bao-Mitas	11	5	3	2	16	13	19
Maniota	11	5	3	3	19	18	18
Gala-United	11	4	2	5	16	16	14
Cloudy Bay	10	3	3	4	17	19	12
Elcom	11	2	6	3	14	17	12
Mana	9	3	2	4	12	13	11
Oruka	11	3	2	6	13	17	11
Suler	11	1	1	9	7	27	4
Buresong	11	1	1	9	7	27	4
Tarangau	8	1	1	6	6	18	4

### MOSBI SOKA ASOSIESEN DRO RAUN 2: WIK 13 Sarere 25 Me, 1991.

Taim	Divisen	Graun	Pilai	
9:00	Ris	B1	University	v Kurti Andra
10:30	2nd	B1	Buresong	v Losegu
12:30	1st	B1	B.F.C.	v Tarangau
2:00	1st	B1	S.T.C.	v Wanzesi
4:00	1st	B1	Maset	v Nali
9:00	2nd	B2	Amazon	v Mana
10:30	Women	B2	Milne Bay	v Kurti Andra
12:30	1st	B2	Koupa	v Buresong
2:00	Prem	B2	Rapatona	v Golo
4:00	Prem	B2	Verave	v Guria
10:00	U/19	G.F.C.	Rapatona	v Westpac
11:30	U/19	G.F.C.	Guria	v University
1:00	Women	G.F.C.	Wanzesi	v T/Defence
2:30	2nd	G.F.C.	Tarangau	v B.F.C.
4:00	2nd	G.F.C.	Sulem	v Wanzesi
12:00	U/19	Defence	Buresong	v G.F.C.
1:30	Women	Defence	University	v G.F.C.
3:00	Res	Defence	Golo	v Rapatona
4:30	Res	Defence	Amalpak	v T/Defence

### Sandee 26 Me, 1991.

Taim	Divisen	Graun	Pilai	
9:00	Res	B1	Guria	v Verave
10:30	2nd	B1	Bao Mitas	v Cloudy Bay
12:35	1st	B1	Kula	v Air Niugini
2:00	Pre	B1	University	v Kurti Andra
4:00	Pre	B1	Westpac	v GFC
9:00	2nd	B2	Oruka	v Maniota
10:30	Wom	B2	Guria	v Kula
12:35	1st	B2	Milne Bay	v Bao Mitas
2:00	Pre	B2	Sobou	v B/Kumuls
4:00	Pre	B2	Amalpak	v T/Defence
10:00	U/19	G.F.C.	Amalpak	v Golo
11:30	U/19	G.F.C.	Sobou	v Kurti Andra
1:00	Wom	G.F.C.	Sobou	v Koupa
2:30	Res	G.F.C.	Westpac	v G.F.C.
4:00	Res	G.F.C.	Sobou	v B/Kumuls
10:00	U/19	Defence	T/Defence	v B/Kumuls
11:30	U/19	Defence	Bao Mitas	v Verave
1:00	Women	Defence	Amalpak	v B/Kumuls
2:30	2nd	Defence	Korion	v Gala United
4:00	2nd	Defence	Elcom	v Mt. Obree





# RUGBY

Namba 15

Fonde 23 Me, 1991

## NIUS

## Bombers redi long nekim Vipers

### INTA SITI KAP RIPOT

LAE Siti Bombers i redi pinis long mekim sem-pion bilong las yia, Mosbi Vipers i lusim namba tu gem bilong em. Dispela em long taim tupela i bung long namba tu raun bilong SP Inta Siti Kap resis dispela Sande long Lae.

Dispela em toktok bilong Lae Winfield Lig presiden, George Mack. Mack i mekim dispela toktok bihain long em i lukim gem bilong Lae Siti Bombers egensim Kundiawa Warriors long Kundiawa las wiken. Bombers i lusim dispela gem 14-10.

Dispela wiken Lae Bombers bai i pilai long fil bilong ol yet we ol bai i kisim gutpela sapot. Olsem na ol i redi wantaim bikpela bilip long daunim Mosbi Vipers.

Mack i tok Bombers inap winim gem egensim Kundiawa Warriors. Tasol Warriors i laki liklik bikos long sapota bilong ol.

Em i makim olsem ol sapota long sait lain i no mekim ol Bombers i pilim gutpela. Olsem na ol Bombers pilaia i no pilaim stretpela gem bilong ol.

Mack i tok, "Winga bilong mipela, Wesley Matawai inap skoarim tripela trai long kona sapos ol sapota long sait lain i no pretim em."

### LAE BOMBERS LAIN AP:

1. Terry Gawi
2. Jacob Danny
3. Andrew Goime
4. K. Sinamou
5. Mauwe Kaupa
6. Ngala Lapan
7. David Glipu
8. Nande Yer
9. Michael Matmillo
10. Goro Arigae
11. John Piel
12. Thomas Daki
13. Andrew Kuno

### RISEV:

14. Pipi Dai Boe
15. Oniara Osanda

### STEN BAI RISEV:

16. John Markham
17. Raymond Karl

"Matawai i lusim bal tripela taim we trai bilong Bombers i ken kamap, "Mack i tok.

Tasol Mack i salim bikpela tenkyu i go long Brothers klab na Kundiawa long lukautim ol gut. Lae Siti Bombers i gat olgeta pilaia bilong las wiken wantaim sampela liklik senis tasol.

Terry Gawi bai pilai nau long fulbek posisen, na Goro Arigai bai i lusim sait lain na kisim ples bilong John Markham. Markham bai i stap long risev long dispela wiken. Andrew Goime bai i kisim ples bilong Mauwe Kaupa long senta na poromanim Korul Sinemau. Na i go moa long pes 6



• Kumul na Mosbi Vipers hap bek, Stanley Haru i soim stall bilong holim yet Namba 7 posisen bilong Kumul tim egensim Hagen Eagles. Dispela em long taim tupela tim i bung long namba wan raun bilong Inta Siti resis long Mosbi las wiken. Tasol Eagles i strong na win 28-26. Haru i winim "Man-of-the-Match" prais bilong dispela gem. Poto Ivan Bayagau.

# Winfield League '91

# Norths senisim kompetisen lida Junia Bulldogs bai paia long fainal

TALASEA Norths i bosim nau A gret poin lata bilong Kimbe Ragbi Lig bihain long em i autim kompetisen lida, Umboli Raiders 24-20 long las Sande.

Dispela i bin wangepa gutpela strongpela gem we ol sapota i amamas long lukim.

Ol bagaros bilong Norths wantaim go pas bilong kepten kosa, Joe Baki i givim strongpela salens stret long ol stail pilaia bilong Raiders. Dispela em long taim referi i blowim namba wan wisil i go inap las wisil.

Ol beklain pilaia bilong Raiders wantaim go pas bilong insait senta, Anton Lavu i nogat spes stret long roket olsem smok balus na skoa.

Planti ragbi lig sapota long Kimbe i

save amamas long lukim gem bilong Raiders. Bikos ol Raiders pilaia i save pilaim gutpela stended bilong futbol. Tasol long Sande ol i no pilaim dispela kain gem.

Bihain long namba wan hap bilong pilai, Norths i bin go pas long skoa 12-8.

Long namba tu hap em tupela sait wantaim i pait strong nau. Ol sapota i ting Raiders wantaim gutpela moa stail bilong pilai bai i paia long las minit. Tasol ol kas nogut bilong Norths i strong yet long takol.

Long pinis bilong pilai em Norths i winim dispela gem 24-20.

Olgeta pilaia bilong Country i pilai strong long dispela gem.

BULLDOGS i no bin lusim wangepa gem bilong ol long anda 17 resis bilong Mendi Winfield. Las wik em i bagarapim sindaun bilong Magani 14-0.

Bulldogs i kamap namba wan long lata bilong, anda 17 resis nau, bihain long em i statim gem ya wantaim planti stail na strong. Magani i no gat wangepa taim i stap long ran i go insait long mak bilong Bulldogs. Bulldogs i putim tripela trai na wangepa penelti qol

long bringim skoa i goap 14-0.

Ol fowat bilong Bulldogs i no pilai kaskas long Magani. Man husat i go pas long brukim banis bilong Magani em Samuel Pinpin, rep bilong Mendi junia Muruks.

Pinpin i save mekim planti strongpela ran na gutpela takol olgeta taim em i kisim bal.

Henry Bun tu em i wangepa strongpela pilaia tu husat i bin lukautim bal gut tru long taim bilong skram.

Na dispela gutpela pilai i helpim Bulldogs long putim tripela trai aninit long pos.

Magani i bin pilaim strongpela gem egen-sim Bulldogs. Tasol planti pilaia long beklain na fowat i no pilai bung wantaim long strongim banis bilong ol. Dispela i no bringim ol long putim wangepa trai.

Thomas husat i stap long beklain i pilaim gutpela gem. Tasol olgeta hatwok bilong em i go bagarap. Bikos ol wan pilaia bilong ol i no oge-naisim ol yet.

Long ol arapela anda 17 gem, CPS Royals i pilaim gutpela gem long autim Brothers.

Man husat i bin go

pas long dispela gem egensim Brothers em Samson Kuwa (senta).

Na Tarangau wantaim helpim bilong faiv eit Diya Kambe, na skipa Lemmis Itas, tupela i putim kamap gutpela pilai long winim Hawks 10-6.

Nau em tripela gem i stap yet long long raun wan. Bulldogs nau i go pas long 14 poin, Tarangau i bihainim wantaim 10 poin, Hawks 9, Royals 8, BP Brothers 6 na Magani li stap las wantaim wangepa poin tasol.

Na Magani i mas putim kamap strongpela gem egensim ol arapela tim sapos em laik i stap tu long final bilong dispela resis.

## THE 1991 PTC TELEPHONE DIRECTORY It's a winner for information!

Better and faster than ever with...

- ★ Emergency Numbers...
- ★ Coloured Information Pages
- ★ List of Government Departments
- ★ White Pages section with all phone numbers in PNG
- ★ Green Pages with Fax, Telex and Postal Information
- ★ Yellow Pages - a complete buying guide with the fast find index



LET'S DO IT PNG!  
USE YOUR NEW DIRECTORY



POST & TELECOMMUNICATION CORPORATION



A joint venture publication between PTC and Edward H O'Brien (Enterprises) Pty. Ltd.




### VANIMO RAGBI LIG

DRO BILONG NAMBA TU RAUN:  
SANDE 26 ME, 1991.

- 11.00am Ris Hawks vs Sea Eagles
- 12.00pm Ris Van. Fores vs Works Tigers
- 1.00pm Ris Tarakum vs Difens
- 2.00pm A Sea Eagles vs Hawks
- 3.30pm A Works Tigers vs Van. Fores
- 5.00pm A Difens vs tarakum

• Olgeta gem bai i kamap long Peter Cole oval.



**WAGAMBIE'S**

WHIP



**Vipers i mas senisim tim long win**

Mi bilip planti bilong yupela i wet long lukim wanem samting mi bai toktok long 1991 Inta Siti resis namel long sempion tim, Mosbi Vipers na Hagen Eagles.

Mosbi Vipers i bin winim Hagen eagles long gren fainal bilong las yia.

Bikpela tenkyu i go long Hagen Eagles. Ol i pilaim top klas futbol stret. Bikos olgeta trai em olgeta pilaia i wok bung wantaim i go na skoarim.

Olgeta taim bai yu lukim wanpela pilaia i sambai long kisim bal long narapela.

Dimbi Ongugo na Elias Kamiak i brukim banis bilong Mosbi Vipers planti taim long fowat lain, na givim bal hariap long ol wan pilaia husat isave sambai pinis, na painim sans bilong skoa.

Michael Angra, Max Tiri na Akil Olik i pilaim gutpela gem tru long brukim banis bilong Vipers.

Olik em i wanpela bikpela man. Tasol em i gat moa spit stret. Em i skoarim wanpela trai aninit long pos wantaim spit na gutpela "sait step" bilong em.

Narapela pilaia husat i pilaim gutpela gem taim em i holim bal em Kumul winga Goie Waive. Waive i bin pilai olsem fulbek bilong Hagen Eagles.

Em i bin kisim planti spes taim em i save kisim bal na ran i kam antap long banis bilong Vipers.

Bikpela sapot bilong mi i go long liklik man tru long Eagles tim. Man em huka Paul Kas.

Sampela man i tokim mi olsem em i wanpela junia Kumul pilaia.

Man ya i no pret long kisim bal i go bungim ol strongpela bikpela pilaia bilong Vipers. Mi bilip Vipers bai i no inap lus tingting long gutpela gem bilong dispela liklik man.

Long sait bilong banisim trai lain, Paul Kas bai i sanap strong na takolim ol bikpela fowat pilaia.

Bikpela tok amamas i go long kosa Joe Tepp na Eagles. Yupela i makim stret olsem yupela i namba wan ragbi tim long Hailans rijon.

Na tu yupela i soim olsem yupela i ken pilaim wanpela tim bilong nambis eria. Na winim ol long pilai graun bilong ol yet.

Ol i paul tru long stail bilong pilai. I nogat tru wok bung namel long ol pilaia. I nogat tu wanpela gem plen em ol pilaia i ken bihainim. Nogat tru.

Mi no kalap nogut long dispela. Bikos fainal 13 pilaia bilong kisim fil em ol opisal i no tokaut inap 20 minit bipo long pilai i stat.

Bilong wanem as na kosa i wet inap las minit long tokaut long tim. Olsem wanem bai em i tingim ol pilaia i ken redi na tingting long pilai long kain sotpela taim olsem.

Mi laik tok olsem wanpela kosa i ken i gat ol top pilaia long wol long tim bilong em. Tasol sapos ol i pilai olsem wanpela tim bikos ol i no redi gut, ol bai i salim kaikai long wanpela rabis tim husat i nogat ol gutpela pilaia.

Mosbi Vipers i bin mekim "pisikel" trening long 6-pela wok olgeta. na tupela def tasol long traim ol stail bilong yusim bal na pilai.

Ating dispela i mas wanpela gutpela as we ol pilaia i no wok bung wantaim long fil.

Sapos ol pilaia olsem Joshua Kouoru na Stanley Haru i no skoarim tupela trai long hatwok bilong ol yet, Hagen Eagles bai autim tiket bilong Vipers long bikpela skoa stret.

Kouoru i skoarim tupela trai long hatwok bilong em yet. Na Stanley tu i skoarim narapela tupela trai.

Sapos Vipers i laik winim yet planti gem na go insait gen long gren fainal, kosa i mas mekim sampela senis long tim.

Tingting bilong mi em long bringim Joe Gispe i go long seken ro, Gideon Mati long lok, Ben Biri long prop, Joshua Kouoru mas bungim Richard Wagambie long senta, Kini Tani i go long wing, na Philip Boge i go long fulbek.

Mi no makim wanem ol pilaia bilong lusim long tim olsem yu ken lukim. Bilong wanem? Em i samting bilong kosa long tingting bipo em i makim fainal 13 pilaia.

**Muruks i sambai long Warriors**

**MOA INTA SITI KAP RIPOT**

**MOXIE YORE I raitlm**

MENDI Muruks bai i bungim strongpela salens bilong Kundiawa Warriors. Dispela em long taim tupela i bung long namba tu raun bilong SP Inta Siti Kap resis long Sande 26 Me, 1991.

Ol Warriors bai i kisim haiwe na draiv i go antap long Okuk haiwe na pilaim Muruks long Mendi.

Dispela bai i wanpela gutpela strongpela gem. Bikos long risal bilong las wiken gem.

Ol risal em Goroka Lahanis i bagarapim sindaun bilong Muruks 41-26, na Warriors i autim Lae siti Bombers 14-10.

Muruks i lusim long Lahanis na i putim moa trening pinis. Olsem na ol i redi gut long bungim Kundiawa Warriors long dispela wiken.

Muruks i lus namba wan gem pinis. Olsem na ol i no laik lusim namba tu gem.

Ol i gat bikpela sans liklik bikos ol bai i pilai long fil bilong ol yet. Na tu planti 1,000 sapota bilong ol bai i kamap long givim gutpela sapot.

Ripot i kam long Kundiawa i tok lain ap bilong Warriors bai i wankain olsem bilong las wiken Lae Bombers.

Fowat lain bilong Warriors em strongpela fowat pilaia, Maima Kawage bai i go pas. Na beklain em senta Bal Numapo wantaim Noah Kool bai i lukautim.

Francis Aka, Thomas Undipia na Joe i mas bungim stail bilong pilai em ol birua bai i pilaim. Bikos ol i gat moa hevi, na tu i gat moa save na spit taim ol i ran

**MENDI MURUKS LAIN AP:**

1. Vincent Sonk
  2. Jimmy Peter
  3. Thomas Undipia
  4. Joe Rema
  5. Francis Aka
  6. Anton Malangen
  7. Pater Nane
  8. Kore Seeto (Kepten)
  9. Wesley Pape
  10. Kone Keri
  11. Kevin Kapipi
  12. John Togola
  13. Mose Kiru
- Risev:  
14. Mathias Kombra  
15. Wari Sengiso  
Kosa: Andy Akivi

Olsem na dispela wiken, ol Warriors bai i kisim fil long holim vet nem olsem ol i sempion bilong Hailans rijon. Lae Siti Bombers i painimaut pinis long strong bilong ol las wiken.

Ol Warriors em ol strongpela lain stret long stapim taim ol i spit wantaim bal.

Las wiken ol i sanapim na Lae Siti Bombers i painim hat stret long brukim banis bilong ol.

strongpela banis stret. Olsem Ol i no save sanapim strongpela banis klostu long trai lain tasol. Nogat. Ol i save sanapim strongpela banis long olgeta kona bilong fil.

Kosa bilong Muruks, Andy Akivi i kisim pinis sampela asua ol pilaia bilong em i mekim long las Sande egen-sim Lahanis. Olsem na em i givim pinis strongpela skul long nambawan 13 pilaia long rausim dispela nem nogut.

**Eagles autim Vipers long tim wok**

LONG namba tri taim nau ol sapota bilong Lloyd Robson oval, Mosbi i ting olsem tim ol i makim bai i winim gem. Tasol tebol i tanim long las minit.

Wamp Nga Hagen Eagles i bin winim Mosbi Vipers long SP Inta Siti Kap las wiken long Mosbi wantaim las minit trai. Dispela em i namba 4 taim bilong ol las minit trai i kamap long dispela sisen long Lloyd Robson oval, na helpim narapela tim i winim gem.

Long stat bilong sisen propa resis, Brothers i bin mekim olsem, na senta Tom Jones i skoarim wanpela trai. Dispela em sampela seken bihain long belo bilong pinisim pilai i krai.

Tupela wik i go pinis, West i paia wantaim las minit trai bilong huka Danny Moi. Dispela i helpim West long winim Air Niugini 26-24. Dispeka trai tu i kamap bihain long belo i krai.

Las wiken belo i no krai yet, tasol sampela seken i stap yet na Kone Tigers i skoarim wanpela gutpela las minit trai egensim Fairstar Tarangau. Dispela trai em winga Mabata Noho i skoarim na tupela tim i dro 26-26 bihain long ful taim.

Hap bek Charlie Maiva i kikim gut kik bilong gol, na helpim Tigers i winim gem long tupela na, 28-26.

Las wiken Hagen Eagles i mekim gen. Ol i skoa stret long ful taim na dro 26-26. Senta Gabriel Pepna i stretim gut su na kikim bal i go namel stret long tupela gol pos long win 28-26.

Ol dispela kain gem em planti sapota i laik lukim. Bikos sampela gutpela trai i save kamap long las minit. Asua bilong dispela i save kamap long ol las minit banis em birua tim i sanapim.

Gem namel long Vipers na Eagles em tupela sait wantaim i skoarim trai klostu klostu. Tupela tim wantaim i yusim spit moa long dispela gem.

Tasol Eagles i pilaim moa gutpela gem egensim Vipers. Olgeta 5-pela trai em ol i skoarim bihain long gutpela tim pilai.

Ol fowat i strong na sanap long takol na givim bal long wan pilaia. Olsem na bal bai flai i go long planti pilaia pastaim bipo takol i kamap.



• Michael Angra bilong Hagen Eagles i abrusim takol bilong Vipers winga Mafu Kerekere. Marcus Panga (Namba 10) i rere long givim sapot. Eagles i winim Vipers 28-26. Poto Ivan Bayagau.

**SP INTER CITY CUP DRAW (HOME TEAM NAMED FIRST)**

<del>WEEK 1 - SUNDAY 19TH MAY</del>	<del>Port Moresby Vipers vs Wamp-Nga Mt Hagen Eagles</del>	<del>Sika Kundiawa Warriors vs Curtin Star Mendi Muruks</del>	<del>LBC Lae City Bombers vs LBC Lae City Bombers</del>
<b>WEEK 2 - SUNDAY 26TH MAY</b>	Curtin Star Mendi Muruks vs Sika Kundiawa Warriors	Wamp-Nga Mt Hagen Eagles vs Collins & Leahy Goroka Lahanis	LBC Lae City Bombers vs Port Moresby Vipers
<b>WEEK 3 - SUNDAY 2ND JUNE</b>	LBC Lae City Bombers vs Curtin Star Mendi Muruks	Collins & Leahy Goroka Lahanis vs Port Moresby Vipers	Sika Kundiawa Warriors vs Wamp-Nga Mt Hagen Eagles
<b>WEEK 4 - SUNDAY 9TH JUNE</b>	Wamp-Nga Mt Hagen Eagles vs Curtin Star Mendi Muruks	Port Moresby Vipers vs Sika Kundiawa Warriors	Collins & Leahy Goroka Lahanis vs LBC Lae City Bombers
<b>WEEK 5 - SUNDAY 16TH JUNE</b>	Curtin Star Mendi Muruks vs Port Moresby Vipers	Sika Kundiawa Warriors vs Wamp-Nga Mt Hagen Eagles	LBC Lae City Bombers vs Sika Kundiawa Warriors
<b>WEEK 6 - SUNDAY 23RD JUNE</b>	Wamp-Nga Mt Hagen Eagles vs Port Moresby Vipers	Curtin Star Mendi Muruks vs Collins & Leahy Goroka Lahanis	LBC Lae City Bombers vs Sika Kundiawa Warriors
<b>WEEK 7 - SUNDAY 30TH JUNE</b>	Sika Kundiawa Warriors vs Curtin Star Mendi Muruks	Collins & Leahy Goroka Lahanis vs Wamp-Nga Mt Hagen Eagles	Port Moresby Vipers vs LBC Lae City Bombers
<b>(N. B. PNG)</b>	<b>VS FRANCE</b>		
<b>WEEK 8 - SUNDAY 14TH JULY</b>	Curtin Star Mendi Muruks vs LBC Lae City Bombers	Port Moresby Vipers vs Collins & Leahy Goroka Lahanis	Wamp-Nga Mt Hagen Eagles vs Sika Kundiawa Warriors
<b>WEEK 9 - SUNDAY 21ST JULY</b>	Curtin Star Mendi Muruks vs Wamp-Nga Mt Hagen Eagles	Sika Kundiawa Warriors vs Port Moresby Vipers	LBC Lae City Bombers vs Collins & Leahy Goroka Lahanis
<b>WEEK 10 - SUNDAY 28TH JULY</b>	Port Moresby Vipers vs Curtin Star Mendi Muruks	Collins & Leahy Goroka Lahanis vs Sika Kundiawa Warriors	Wamp-Nga Mt Hagen Eagles vs LBC Lae City Bombers
<b>PRELIMINARY FINAL - 4 AUGUST - VENUE T.B.A.</b>			
<b>FINAL</b>			<b>- 11 AUGUST - PORT MORESBY</b>

**1991 SP INTA SITI KAP**

**SKOA BILONG NAMBA WAN RAUN**

Wamp Nga Hagen Eagles def Mosbi Vipers 28- 26.  
Kundiawa Warriors def Lae Bombers 14-10  
Goroka Lahanis def Mendi Muruks 41-26

**POIN LATA**

Goroka Lahanis	2
Kundiawa Warriors	2
Hagen Eagles	2
Mosbi Vipers	0
Lae Bombers	0
Mendi Muruks	0



# Norths mas lukaut long beklain bilong Muruks

## RABAUl RIPOT

### SAM YAKAM I raitim

RABAUl Ragbi Lig bai i go insait long raun namba 8 long dispela Sande. Na NGIP Muruks i bai traim bun wantaim Twisties Norths. Gem ya i luk olsem bai i wanpela bikipela na gutpela gem long lukim.

Na tu em bai i luk olsem wanpela gren fainal bilong ol sapota bilong Rabaul bikos tupela strongpela tim bai i traim bun nau.

Norths i go pas long lata na em bai i no inap pilai kaskas long NGIP Muruks. Bikos Muruks tu i gat nem long Rabaul.

Las wik Norths i bagarapim sindaun bilong Air Niugini. Na ol bai i traim long dispela Sande long daunim strong bilong NGIP Muruks.

Ol bai i lukluk long ol kain pilaia olsem Barry Russel. Na tu Norths i gat gutpela nem long

Rabaul Lig. Norths i no bin lusim wanpela gem yet long dispela sisen.

NGIP Muruks mas i gat namba wan tingting long winim Norths, na tu i goap moa long lata. Muruks i bin winim Tarangau 24-14 long las wik.

Tupeia tim wantaim bai i yusim ol olupela stail long putim ol i

stap antap long pilai long gren fainal.

Tasol wanem tim i pilai bung wantaim, na i no kamapim planti hevi insait long gem bai i win.

Muruks i gat planti gutpela pilaia long beklain na fowat. Ol beklain pilaia bai givim bikipela hetpen rekot long Norths sapos ol i no inap long lukautim mak bilong ol.

Ol arapela A gret gem bai kamap namel long Balanataman na Brothers. Tupela tim wantaim i gat gutpela rekot.

Gutpela tim long winim dispela gem i mas pilai ful 80 minit long kisim taitel.

Sea Eagles na Tarangau bai i bung long 4 klok apinun long narapela gutpela gem. Na Crusaders na Air Niugini bai i traim bun gen long dispela Sande.

Dispela gem bai i kamap wansait sapos Crusaders i no inap putim gutpela banis long trai lain bilong ol. Air Niugini i gat gutpela sans long winim dispela gem.



• Marcus Panga (Namba 19) bilong Eagles i salim bal long Elias Kamiak taim em i bungim takol bilong Vipers. Eagles i win 28-26.

# Son tim bai i kam aut long Sande 26

## KIMBE RIPOT

### STEVEN KADIKO I raitim

KIMBE RAGBI LIG bai i tokaut long skwat bilong em long pilai insait long Niugini Ailan (NGI) Son resis bihain long ol gem bilong dispela wiken.

Seketeri bilong Kimbe Ragbi Lig, Joe Tepp i tok long Kimbe olsem ol i no tokaut hariap long nem bilong tim bikos de bilong son resis em ol i senisim i go long 15 na 16 Jun, 1991.

Mista Tepp i tok ol bai i tokaut long tim, bihain long bikipela gem bilong Sande 26 Me, 1991. Na tim i bai i stat long ful trening bipo long bikipela resis.

Save i stap olsem son sempionsip bai i kamap long Rabaul. Tepp i tok Kimbe bai i redim wanpela strongpela tim bilong dispela resis.

Em i tok moa olsem autoela stail bilong pilai

## Hevi bungim Vanimo Lig

i kam long pes 8

presiden bai i go olsem kosa, na tresera bai i go olsem asisten kosa.

"Presiden o vais presiden i ken stap insait olsem tim opisal. Na trena wantaim kosa i mas kam long wanpela bilong 6-pela klab insait long lig." Maskim i tok.

Maskim i askim nau Vanimo Lig long sindaun hariap na makim wanpela gutpela kosa na trena bilong 6-pela memba klab long go wantaim tim.

Maskim i toktok moa olsem em i no amamas long 4-pela lig

eksekutiv i raun i go long Vanimo. Bikos ol i westim mani em lig i ken yusim long salim tim i go long Kainantu.

Ol ripot i tok Vanimo Lig i bin tingting long pasim tok wantaim ol bikman bilong Jayapura Spot Kaunsil long ogenaisim wanpela ragbi gem namel long Vanimo na Jayapura.

Ol i bin go long Me 24 na kam bek long Me 26, 1991.

Ripot i tok tu olsem tupela arapela man i stap insait tu long dispela raun.

ragbi long Kimbe i kamap nau. Olsem na planti sapota i save go lukim pilai long olgeta wiken olsem gutpela we bilong malolo.

Tepp i tok ol son resis i gutpela long ol yangpela pilaia long soim stail long ol arapela senta. Na tu long mekim nem bilong ol long kantri.

Tepp i amamas tu long gutpela sapat bilong ol sapota husat i save go lukim pilai long olgeta wiken. Bikos i nogat moa ripot bilong pait na trabel i save kamap olsem bipo.

Tepp i tok dispela i soim olsem ol pipel i save nau olsem ragbi lig em i wanpela spot bilong bung wantaim na amamas. Na i no bilong pait o mekim trabel.



• Souths pilaia i bungim strongpela takol bilong Tarangau long bikipela gem bilong Mosbi Winfield Lig las wiken. Tarangau i winim dispela gem 26-6.



Hagen Eagles faiv eit, Gigmai Ongugo i laik kikim bal long painim sait lain egensim Mosbi Vipers las wiken long Inta Siti resis long Mosbi. Gigmai em Kumul faiv eit pilaia.

# Air Niugini i redi long bekim dinau nau egensim ol Tigers

## MADANG RIPOT

### DOMINIC KAKAS I raitim

MADANG Winfield Ligi go insait nau long namba tu raun bilong sisen propa resis long dispela wiken. Bikipela gem bai i kamap namel long Air Niugini na Tigers.

Long namba wan raun, Tigers i bin bagarapim Air Niugini 6-4 long ai bilong ol sapota bilong em long Ron Albert Oval.

Nau yet tripela nambawan beklain pilaia bilong Tigers i kisim bagarap. Olsem na dispela wiken, bikipela wok bai i hangamap long han bilong ol fowat pilaia long win gen Air Niugini.

Tripela pilaia ya em faiv eit Julius Waninara, fulbek Daniel Kombako, na senta Peter Petroi.

Kepten John Jacob i bin traim hat tru na senisim sampela fowat pilaia i go long beklain. Tasol dispela i no stretim hevi bilong ol yet. Tigers i bin lusim tupela gem bilong ol egensim Panthers na Brothers.

Air Niugini i mas save pinis long dispela hevi bilong Tigers. Olsem na em i redi gut nau long bekim dinau

bilong namba wan raun.

Kepten Joe Tonar bai i go pas long ol Air Niugini pilaia. Em bai i kisim gutpela sapat long tupela senta pilaia, Joe Kubul na Tobias Kulang.

Tonar, Kubul na Kulang i bin kisim bagarap liklik. Tasol ol i pilim orait nau long lukim dispela bikipela gem.

Tigers i stap namba 3 long lata wantaim 8-pela poin. Air Niugini i sindaun long namba tu ples wantaim 9-pela poin. Panthers i go pas long resis wantaim 10-pela poin.

Strongpela prop pilaia, Joe Kam-bian bai i go pas long Tigers long dispela wiken. Kepten John Jacob i tok tripela beklain pilaia bilong em i no bin pilai long tupela gem i go pinis.

Long dispela as na ol i lusim tupela gem.

Jacob bai i traim olgeta fowat pilaia olsem yangpela Tweedy Malagian, Graham Petrus na Kombian long beklain. Tweedy i no bin pilai gut long beklain. Olsem na Jacob i salim em i go bek long winga.

Tasol dispela i no inap stapim Tigers long givim strongpela gem egensim Air Niugini.

# Bombers i redi long Vipers

i kam long pes 1

Kaupa bai kisim pels bilong Matawai long wing.

Mack i tokim RLN long dispela wik olsem olegta pilaia bilong Bombers i stap amamas tasol. Na i redi long bungim Vipers long dispela wiken.

"Hagen i givim ol wanpela isi gem. Tasol mipela i no inap isi long ol," em i tok.

Vipers tim nau yet i gat planti trabel bikos Kumul fowat Joe Gispe i no stap long strongim fowat pilai. Ripot i tok Gispe i bin paul olsem em i stap long fainal tim bilong las wiken o nogat. Olsem na em i ran i go insait long fil na pilai long tim bilong em, Air Niugini bipo long gem bilong Eagles na Vipers.

RLN i no inap kisim kosa bilong Vipers, Sam Kaia long kisim stori bilong em long dispela. Na tu tim menesa Peter Barnanga i stap long Lae.

Faiv eit Aquila Emil na fulbek Joe Mirisa husat i no pilai long namba wan gen bilong Vipers em ating bai stap insait long tim. Dispela em sapos tupela i pilim orait gut.

I luk olsem Aquila i mas redi nau. Bikos las wiken em i pilai long tim bilong em, Twisties Brothers.

I gat bikipela bilip olsem tim bilong Vipers long dispela wiken bai i gat bikipela senis long lain ap. Lukluk long gem bilong las wiken, senis bai i kamap long fowat.



• Oi Hagen Eagles fowat pilala olsem Akel Olik (namba 12), Marcus Panga (Namba 10) na Joseph Paraka (Namba 8) i sambai long takolim Isaac Rop bilong Mosbi Vipers. Tupela tim ya i bung long namba wan raun bilong Inta Siti resis las wiken long Mosbi, na Eagles i win 28-26. Poto Ivan Bayagau.



• Joseph Paraka (Namba 8) bilong Hagen Eagles i sapotim Paul Kas (Iephan) long takolim wanpela fowat pilala bilong Mosbi Vipers. Eagles i win 28-26.

## Abeng i paia yet

TUPELA wik i go pinis Twisties Brothers i gat save bilong pilaim strongpela gem na i stapim win bilong nupela A gret tim bilong Souths. Souths em nupela tim bilong Mosbi Winfield Lig resis.

Souths i gat gutpela stail bilong pilai. Tasol Brothers i pilai longpela taim long Mosbi resis, na i save long pilai graun na pasin bilong ol sapota.

Wanpela pilaia husat i pilai strong long Brothers long Lloyd Robson oval em fulbek Paias Abeng.

Abeng i bin winim "Man-of-the-Match" prais long dispela gem.

Tasol sampela i tok gutpela pilai bilong Abeng i helpim Brothers long winim Souths 16-6.

Dispela em i namba wan gem bilong Abeng wantaim Brothers long dispela yia. Na tu em i namba wan prais em i winim long wanpela ragbi lig gem bilong Mosbi Winfield Lig resis. Dispela em bihain long Abeng i pilai long Mosbi Lig long 5-pela yia.

Planti sapota i gat bilip olsem Abeng bai i winim moa prais olsem long bihain taim.

Long taim pri sisen resis i kamap, Abeng i bin pilai ragbi yunien wantaim Royals klab. Brothers i laikim wanpela gutpela fulbek bilong sisen propa resis. Na i bin amamas tru taim Abeng i go bek joinim ol. Abeng i bin pilai olsem fulbek bilong Brothers long tupela sisen, 1989 na 1990 sisen.

Tasol Abeng i gat 31 krismas nau. Na i tingting long stap pilai ragbi long pinis bilong dispela yia. Em i gat bikpela laik long pinis taim Brothers i winim primiasip taitel.

Dispela i no gutpela nius bilong planti ragbi lig sapota. Tasol Abeng i laik mekim malolo long bodi bilong em.

"Ating mi bai kalap i go na pilai ragbi yunien o stap long tupela spot wantaim," Abeng i tok.

Abeng i save wok olsem wanpela Ditektive Sinia Konstebel plisman wantaim Moto Trefik Skwat. Bikpela laik bilong Abeng nau em long kamap wanpela Kumul pilaia. Dispela bai i wanpela gutpela blesing bipo em i ritai.

# Seleksen bilong Noten son kamapim hevi



• Ol DCA pilaia long raithan i strong yet long takolim winga bilong Air Niugini long Mosbi Winfield Lig A gret gem las wiken. Ol boi Porebada i strong na winim dispela gem 22-18. Poto Ivan Bayagau.

## VANIMO RIPOT

FELIX RAMRAM i raitim

PLANTI klab, ol pilaia na sapota bilong ragbi insait long Vanimo i gat bel hevi long pasin ol eksekyutiv bilong Vanimo Lig i mekim long makim ol pilaia bilong Noten Son resis.

Noten Son resis bai i kamap long Kainantu long 15-17 Jun, 1991.

Ol i tok seleksen bilong ol 25 pilaia em Lig i tokaut long 12 Me, 1991 i wansait. Bikos wanpela klab i gat moa long 6-pela pilaia. Na ol arapela klab i gat tripela na 4-pela pilaia tasol.

Narapela samting em ol sapota i no amamas tu long wanpela raun em ol eksekyutiv i mekim i go hapsait long Jayapura, Indonesia. Dispela raun i bin kamap long Trinde 22, 1991.

Ol ripot em RLN i kisim long Vanimo i tok planti pilaia i bel kaskas long ol eksekyutiv i go long dispela raun. Dispela em long taim Lig i painim hat long bungim mani bilong salim ol tim i go long Noten Son resis long tupela wik taim.

Patrick Waimo na Vitus Dangu bilong Hawks klab wantaim Job

bilong Tigers klab i tokaut olsem mani ol Lig opisal i yusim long raun i go long Jayapura i nogat kaikai long en. Bikos ol Indonesia i no save pilai ragbi, bai ol i ken sponsarim tim i go long Kainantu. Bikos planti pilaia long tim i nogat wok, na bai painim mani olsem wanem.

Lig i bin makim olsem ol pilaia insait long tim i mas baim K50 fi long stap insait long tim. Waimo na Dangu i bekim olsem dispela mani "bai i kam long mani ol i yusim long go long Jayapura." "Ol pilaia husat i wok i ken baim K50. Tasol ol dispela husat i no wok bai kisim dispela kain mani we?"

Olpela presiden bilong Vanimo Lig, na wanpela strongpela ragbi lig sapota long Vanimo, Daniel Maskim i amamas long Lig long yusim dispela K50 fi long katim namba bilong ol pilaia i go daun long 17 pilaia fainal tim.

Tasol em i no amamas long ol lig eksekyutiv yet long go pas, na lukautim tim i go long Kainantu. Bikos dispela i no bihainim lo bilong ragbi lig insait long kantri.

Na yet em kosa na trena bilong tim em ol eksekyutiv bilong lig yet. Lig i go moa long pes 6



• Bikpela fowat bilong Air Niugini i laik mekim dai stret long ausait senta bilong DCA long Mosbi A gret gem las wiken. Tasol DCA i strong na winim dispela gem 22-18. Poto Ivan Bayagau.

## Bulldogs i go pas long anda 17 resis

### MENDI RIPOT

MOXIE YORE i raitim

BULLDOGS i no bin lusim wanpela gem bilong ol long anda 17 resis bilong Mendi Winfield. Las wik em i bagarapim sindaun bilong Magani 14-0.

Bulldogs i kamap namba wan long lata bilong, anda 17 resis nau, bihain long em i statim gem ya wantaim planti stail na strong. Magani i no gat wanpela taim i stap long ran i go insait long mak bilong Bulldogs. Bulldogs i putim tripela trai na wanpela penalti gol long bringim skoa i goap 14-0.

Ol fowat bilong Bulldogs i no pilai kaskas long Magani. Man husat i go pas long brukim banis bilong Magani em Samuel Pinpin, rep bilong Mendi junia Muruks.

Pinpin i save mekim planti strongpela ran na gutpela takol olgeta taim em i kisim bal.

Henry Bun tu em i wanpela strongpela pilaia tu husat i bin lukautim bal gut tru long taim bilong skram. Na dispela gutpela pilai i helpim Bulldogs long putim tripela trai aninit long pos.

Magani i bin pilaim strongpela gem egensim Bulldogs. Tasol planti pilaia long beklain na fowat i no pilai bung wantaim long strongim banis bilong ol. Dispela i no bringim ol long putim wanpela trai.

Thomas husat i stap long beklain i pilaim gutpela gem. Tasol olgeta hatwok bilong em i go bagarap. Bikos ol wan pilaia bilong ol i no oge-naisim ol yet.

Long ol arapela anda 17 gem, CPS Royals i pilaim gutpela gem long autim Brothers.

# Winfield League '91

LONG NAIT YU RAUN LONG BALUS I KAM, BAI YU TING EM SITI, YA...



PAIT LONG BOGENVIL I PINIS NA PIKININI BILONG MAIK, KOPROL HENRI I KAM BEK...



TAIM EM KAMAP LONG PLES, EM KIRAP NOGUT LONG LUKIM OL KAPA HAUS TASOL!!!



EM ASKIM WANPELA LAPUN MAN YA...



LAPUN I POINIM HAUS NA TOKIM EM...



NAU EM GO LONG HAUS NA SILIP LONG VERANDA NA WETIM OL...



# PERSONAL LOANS

Husat i halivim yu long kisim ol samting yu laikim tru?


Sapos yu laikim nupela ka o ol samting bilong haus, PNGBC ken givim yu dinau long baim ol dispela samting.

Yu mas gat gutpela wok na sampela seving long haus moni. Na i no hat tumas long bekim dispela dinau.

Askim long haus moni bilong PNGBC. Bai mipela halivim yu long kisim ol samting yu laikim emi tru!











# OL SAVEMAN BILONG BISNIS YUSIM OL!

**Lister**



**Brian Bell Stores**

● BOROKO — 25 5411  
 ● LAE — 41 3377  
 ● GOROKA — 72 1098

● MT. HAGEN — 52 1999  
 ● RABAU — 92 1966

**Phantom**

Yu tok jenerel Bababu baim yu long kilim Presiden Luaga?

Ah.. Yes. Long bisnis bilong mi, mipela save baim kain kain pati..

Mi gat we bilong mi yet long painimaut.. Husat tru i baim jenerel Bababu.

Tasol Bababu i stap long haus kalabus.

**Dispela em stori bilong bipo**

Sampela yla i go pinis Bangalla i kism independen.. Namba wan jenerel lleksen!

Namba wan jenerel lleksen!

Mi bai strongim ami bilong mipela!

Mi sanap long bringim gutpela sindaun

**BABABU LIAGA**

**Dokta Luaga i winim lleksen!**

..Wina na namba wan presiden bilong mipela .. Dokta Lamanda Luaga!

Long taim bilong lleksen, Dokta Luaga i wok long bus i stap wantalm nes Diana Palmer.

Em i no inap dai!

Gutpela

Dokta Lamanda Luaga..Gutpela nius long kantri bilong mipela. Yu namba wan presiden nau bilong mipela.

Bababu i no amamas lona lus...

Mi lida bilong ami! Mi mas kamap presiden.

Mi em lo nau!

Mi gat nem bilong mi ya! Nem bilong mi em ... em ...

Noken tingting nau. Yu tuk nais tru. Yu painim birua long solwara ya! Olsem na yu lus tingting long nem.

... tasol mipela mas kolim yu wanpela nem .. "PARIN!" Em God bilong solwara. Yu laikim dispela nem?

Simila, harim pastaim. Mi save long trupela nem bilong mi. Mi husat, Mi kamap hia olsem wanem, Mi stap we ..

Hei!

Mi makim yu olsem God bilong solwara!

Orait mi askim yu long joinim kingdom bilong mi!

EEEEEEEE

Er.. ah ekskus mi, Prinses. Papa bilong yu laik lukim yu!

Prinses?..

Oi i painim yet Flash long Mongo...

Dale, mipla sot nau long pensin, mipela mas go bek!

Flash mas stap daunbilo long hia, long sampela hap, Zarkov. Em i mas stap!

**MIKEY MOUSE**

Pluto i stap long beksait?

Long taim yes

RARF!

... tasol nau nogat.

Pluto i bikhet long rot gen!

RARF!

Taim yu kism em i kam, em save raunim pusiket bilong ol man!

Mi mas go aut na kism em.

GRR!

Kisim em i kam. Mi gat wanpela tingting.

Gutpela olsem mi no rausim olupel hat ya.

Mi ting Pluto bai sindaun gut nau!


# GAS

The energy of the future

- EFFICIENT
- INSTANT CONTROL
- CLEAN
- SAFE

Variable Uses

- BAKERIES
- RESTAURANTS
- INDUSTRIES
- HOME COOKING



**GUINEA GAS FOR PNG**  
**BORAL GAS (PNG) PTY LTD**

Pom	Lae	Hagen	Wewak	Rabaul
21 4248	42 2574	55 1216	86 2125	92 1225

# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.